

# البرمجة بلغة البايثون

رحلة ممتعة من الولا حاجة حتى الإحتراف



PINK PYTHON



Pink

PYTHON


CC creative commons

تأليف :

م محمود علي عبداللاه

بِسْمِ اللَّهِ الرَّحْمَنِ الرَّحِيمِ

## نسخة الكتاب



### PINK PYTHON 1.0

قد لا تكون هذه النسخة الأخيرة من الكتاب وصدر بعدها نسخ

أحدث بها تعديلات لأخطاء أو إضافة لمحتوى جديد.

فتابع هنا لمعرفة آخر إصدار [releases](#)

# رخصة الكتاب

هذا الكتاب منشور تحت رخصة المشاع الإبداعي  
[creative commons](#) طبقاً لهذه الشروط

نسب المصنّف - غير تجاري - منع الاستئاق 4.0 دولي



## منع الاستئاق

يُسمح بنسخ، توزيع، وبث نسخة طبق الأصل  
من الكتاب ولا يسمح بالأعمال المشتقة منه.

## غير تجاري

مسموح بنسخ وتوزيع الكتاب بشرط  
عدم استخدامه للأغراض التجارية.

## نسب المصنّف

يجب نسب الكتاب إلى المؤلف.

## عن المؤلف

خريج كلية الهندسة قسم الإتصالات والإلكترونيات جامعة سوهاج  
للتواصل / الاقتراحات / الاستفسارات



<https://www.linkedin.com/in/EngMa7moud31y>



<https://www.facebook.com/EngMa7moud31y>



<https://github.com/Ma7moud31y>

محمود على

6 أكتوبر 2018

## إهداء

لكل مبرمج .. مكتئب.. بائس.. حزين.  
واللى مزنونق فى bug بقاله يومين  
واللى مطبق على بروجكت والناس نايمين  
واللى عايش على القهوة والكافيين  
والفرى لانسرز الشقيانين...  
واللى كل أكواده من stackoverflow  
واللى البوينترز والسىمى كولون جننوه  
وابننا الهاكر اللى الـ CIA هيغتالوه...  
واللى أنتحر من طلبات عميل  
واللى بيقول على أكونت الفيس إيميل..  
واللى عايز يبرمج أندرويد على بانتيوم 4  
واللى بيخلي رقم تلفونه كلمة مرور...  
واللى بيدور على كراك برنامج ومثش عايز يشتريه  
واللى سجل فى ألف كورس ونام عليه  
واللى مالهبوش فيها.. ومثش فاهمني بقول إيه..

Pink Python..

intentionally blank page

هذه الصفحة تركت فارغة عمداً



## فصول الكتاب

- ✓ الفصل 0 - ليه بايثون؟
- ✓ الفصل 1 - البرمجة بلغة بايثون
- ✓ الفصل 2 - أساسيات لغة البايثون Python Basics
- ✓ الفصل 3 - المكتبات في لغة البايثون Libraries
- ✓ الفصل 4 - تخزين البيانات Data Storages
- ✓ الفصل 5 - بعض المكتبات المشهورة
- ✓ الفصل 6 - تطبيقات الويب Web Applications
- ✓ الفصل 7 - التطبيقات الرسومية GUI





## مقدمة عن الكتاب

في البداية كده وقبل ما نبدأ عاوزين نعرف شوية حاجات.

**يعنى أيه بايثون 😊**

لو كنت حملت الكتاب بالصدفه او جذبك الكوفر أو مش عارف يعنى ايه بايثون..

ف ببساطه شديده بايثون دى لغة برمجة , ولغة البرمجة Programming language

عبارة عن مجموعة من القواعد والتعليمات اللى بنوجهها للكمبيوتر عشان ينفذها

فى شكل البرامج والتطبيقات والمواقع والألعاب اللى بنشوفها وبتعامل معاها.

يعنى لغة البرمجة دى حاجة بتعمل بيها برامج وتطبيقات, ولغة البايثون اللى بتكلم

عنها فى الكتاب تعتبر واحدة من أسهل وأشهر لغات البرمجة فى العالم.

**مين يقرى الكتاب ده 😊**

لو كنت متعرفش أى حاجة نهائى عن البرمجة.. أو كنت متخصص و مهتم بالمجال

بسبب الداراسة أو بتتعلم مع نفسك.. لو كنت عاوز تتعلم برمجة ومش عارف تبدأ

بأى لغة.. لو كنت حابب تعمل تطبيقات للموبايل والكمبيوتر وفاكر إن الموضوع

صعب أو مستحيل.. لو عاوز تتعلم لغة برمجة سهلة و مطلوبة فى سوق العمل.

أياً كان سنك وخبرتك فى الكمبيوتر هتلاقى كتاب Pink Python نازل لمستواك بشرح

وأسلوب مبسط وطالع معاك لمستوى متقدم بداية من أساسيات اللغة مروراً بمواضيع

قواعد البيانات واستخدام مكتبات الذكاء الإصطناعى و معالجة الصور و تحرير

الفيديوهات و برمجة المواقع وتطبيقات والموبايل وكله ده بلغة البايثون.



## هحتاج إيه عشان أشتغل معاكم 🤖

مش لازم يكون عندك كمبيوتر او لابتوب بإمكانيات خارقة عشان تتعلم لغة البايثون. ومش لازم يكون عندك كمبيوتر أصلاً تقدر تنزل مفسر اللغة على الموبايل وتكتب أكواد و تتعلم معانا الأساسيات من غير أى مشاكل. او تقدر تشتغل من المتصفح أونلاين فملكش أى حجة.


## ملاحظات عن أسلوب الكتاب

- فضلت إن الكتاب يكون بالعامية المصرية وده لسببين : أحدهما إنها بتوصل المعلومة بشكل أوضح و أبسط والثانى إن مؤلف الكتاب مش الأستاذ انيس منصور الله يرحمه... وكون موضوع الكتاب علمى او برمجى ده ممنعنيش إطلاقاً من استخدام إيموشناتى المفضلة 🤖.
  - بعض المصطلحات البرمجية ليها ترجمات مش مرضيه بالنسبه لى فهتلاقينى بجيب الكلمة بالإجلىزى وجنبها الترجمة بالعربى.. والمصطلحات الغربية بضريلها ترجمة واقعية و مفهومة من عندى 🤖.
  - وجود أى أخطاء إملائية/ لغوية/ برمجية/ لينكات مش صحيحة/ تنسيق مش مزبوط. شىء وارد جداً وهكون مبسوط لو بلغتنى بيها أو بأى أستفسار برمجى على صفحة الكتاب على الـ [Github issues](#) أو على أحد [اكونتاتى الشخصية](#).
- أخيراً أتمنى أن يحقق الكتاب هدفه الرئيسى بأن يكون كتاب مجانى مبسط ممتع و شامل ومناسب لأى حد عنده شغف أو اهتمام بالبرمجة. ولا اسألکم عليه أى حاجة... بس وجهوا دعواتکم بأنکم توصلوا لآخر الكتاب على خير.

(وَرَبِّنَا الرَّحْمَنُ الْمُسْتَعَانُ عَلَى مَا تَصِفُونَ)



## الفصل 0 - ليه بايثون؟



لغة البايثون Python ✓

مميزات لغة البايثون ✓

استخدامات لغة البايثون ✓



## لغة البايثون Python

من التعريف الموجود على الويكيبيديا.. لغة البايثون [Python](#)

Python is an interpreted high-level programming language  
for general-purpose programming.

طبعاً مش عايز أعملك ترجمة للتعريف تصعب عليك فهمه أكثر وهنرجع نتكلم عنه  
نقطه نقطه، بس أعرف شوية عن تاريخ اللغة والهدف منه وهنرجعله..

لغة البايثون أبتكرها المبرمج الهولندي [Guido Van Rossum](#) سنة 1989.. كان فاضى  
فى أجازة الكريسماس فحب يعمل حاجة تشغله فقال يعمل لغة برمجة language

scripting جديدة. وبدأ يشتغل فى لغة البايثون واللى تأثر جداً فى كتابتها بلغة برمجة

اسمها [ABC](#) .. وسنة 1999 الأخ فان روسوم عمل بروبوزال proposal بعنوان [Computer](#)

[Programming for Everybody](#) بيشرح فيها أهدافه من لغة البايثون واللى خُفقت

بشكل كبير ودلوقتى أقدر أعرضها لك كمميزات للغة البايثون.

### مميزات لغة البايثون

- لغة سهلة وبسيطة ولا تقل قوة عن اللغات المنافسة.
- لغة مفتوحة المصدر أى حد يقدر يساعد فى تطويرها  
ونتيجة ذلك بقى ليها مجتمع كبير.
- لغة قريبة من لغة الإنسان و أكوادها سهلة الفهم.
- لغة مناسبة لجميع الأغراض والاستخدامات البرمجية.



فنتج عندنا لغة سهلة التعلم easy-to-learn وسهلة الفهم easy-to-read و portable  
بمعنى إن نفس الكود أو مع إضافات بسيطة تقدر تشغله على جميع أنظمة التشغيل  
Windows, Linux, Mac وحتى على أنظمة تشغيل الموبايل android, ios وسيرفرات  
الإنترنت.. وده سبب أنتشار اللغة بشكل كبير وزيادة شعبيتها.

في الوقت الحالي لغة البايثون كانت تحتل المركز الثالث في تصنيف موقع [Tiobe Index](#)  
للغات الأكثر شعبية في العالم.


Sep 2018	Sep 2017	Change	Programming Language	Ratings	Change
1	1		Java	17.436%	+4.75%
2	2		C	15.447%	+8.06%
3	5	▲	Python	7.653%	+4.67%
4	3	▼	C++	7.394%	+1.83%
5	8	▲	Visual Basic .NET	5.308%	+3.33%

ده غير المركز الثاني بعد لغة الجافاسكربت في اللغات الأكثر استخداماً على موقع [GitHub](#).

## The fifteen most popular languages on GitHub

by opened pull request

GitHub is home to open source projects written in 337 unique programming languages—but especially JavaScript.





## عودة للتعريف..

Python is an interpreted high-level programming language  
for general-purpose programming.

أول حاجة لغة البرمجة [programming language](#) : هي مجموعة من الأوامر نتعامل بيها مع أجهزة الكمبيوتر ومررت بعدة مراحل في تطورها بداية من التعامل مع معالج الكمبيوتر مباشرة لحد ظهور لغات البرمجة عالية المستوى المعروفة واللى بتختلف عن بعضها فقط القواعد والأساليب البرمجية ولكن أغلب اللغات ليها نفس المبدأ والأساسيات.

- في البداية لازم نعرف إن أجهزة الكمبيوتر أو بشكل أدق المعالجات processors مش بتفهم غير لغة الآلة [machine code](#) اللى هي عبارة عن أكواد مكونة من أصفار ووحايد ones zeroes بتتحول لإشارات كهربية بيتعامل معاها البروسييسور.
- ولأن موضوع التعامل بلغة الآلة صعب على الإنسان قروا بسهولة الموضوع شوية فعملوا لغة برمجة تتعامل بشكل مباشر مع الذاكرة والبروسييسور برده ولكن بأوامر يقدر يفهمها الإنسان زي MOV يعني انقل ADD أجمع.
- يعنى اللغة تكلم البروسييسور وتقول له روح خذ القيمة الموجودة في مكان location معين في الذاكرة وخذها في ال register الفلاني (مكان تخزين في البروسييسور) وهات عليها قيمة تانية وأجمعها وحط الناتج في مكان في البروسييسور أو طلعه على بورت معين... اللغة دة أسمها لغة الأسمبلى [Assembly](#) ولأنها بتتعامل بشكل مباشر مع البروسييسور والذاكرة ووحدة الإدخال/الإخراج فبيسموها [Low level language](#) .



- وبعدين حاولوا يبسطوا الموضوع أكثر وقالوا عاوزين نعمل لغات تبعد المستخدم عن التعامل مع الهاردوير بشكل مباشر. وتكون سهلة الفهم والقراءة..ومتعمدش على نوع البروسييسور اللي هيشغل البرنامج ده..لأنك لما تبرمج بلغة الأسمبلى لازم تعرف البنية بناعة المعالج عشان بتتعامل مع الحاجات اللي جواه وكل معالج مع التطور حجم ريجسترته ونواقل الداتا فيه بيزيد أو بيتغير.
- فقررنا يعملوا لغات أكثر سهولة وأقرب للغة الإنسان وسموها لغات عالية المستوى أو High Level Language وطبعاً كل اللغات المشهورة واللى بنستخدمها في الوقت الحالي واللى منها بايثون من النوعية ده .

ده معناه إن البايثون لغة برمجة يعني حاجة بنخلي الكمبيوتر ينفذ تاسكات من خلالها. ولغة High Level يعني بنكتب كود سهل مفهوم لينا بلغة قريبة من لغتنا وبنشغله على أى جهاز مهما كان نوع المعالج بناعه او حجم الرامه وهم الأتئين يولعوا مع بعض مع بقية الهاردوير ده شىء ميهمناش المهم البرنامج يشتغل 😊.

لغة : Interpreted يعني لغة مفسرة، وده هياخدنا لشوية رعى تانى..

نسيت أقولك لما تكتب الكود بلغة الأسمبلى فيه برنامج اسمه ال assembler ده بياخد الكود ويحوله لصورة binary أو hexadecimal جميعه كده للبينارى او الأصفار والوحايد وهى دى اللغة اللي بيفهما بسلامته البروسييسور.

- فى لغاتنا الـ High Level تعالى نسمى الكود الجميل المفهوم اللي شبه لغة الانسان باسم source code .. و ده كود أنت كمرمج تفهمه أما الكمبيوتر يفهمهوش.



- فلزم الأمر حاجة زى الـ assembler يحول الكود ده للغة الآله.. فعملوا حاجة اسمها complier والكومبايلر عموماً ده برنامج بيحول الداتا من صورة لأخرى. بس فى موضوعونا الـ compilers بتحول الـ source code بتاع اللغة اللى أحنأ بنفهمها إلى الـ machine code اللى بيّفهمه مين .. البروسييسور.
- واللغات اللى بتدعم كده اسمها [compiled language](#) زى C/C++/BASIC وغيرهم.
- بس لقيوا مشكلة. أنا شغال على ويندوز كتبت كود بلغة الـ C وعملت له compile وحولته لملف تنفيذى .exe executable code أو binary وشغلته وتمام.
- لكن لو أخذت البرنامج ده وحاولت أشغله على نظام تانى زى لينكس Linux على نفس الكمبيوتر ونفس المعالج.. البرنامج مش هيرضى يشتغل.
- والسبب إن البرنامج لما عملته compile على نظام تشغيل معين الملف التنفيذى اللى طلع مش كله عبارة عن الـ machine code للبرنامج.. لكن فيه جزء أو header أضافه ليه الكومبايلر ينظم طريقة تشغيل البرنامج ده لما تدوس عليه و هيتحمل ازاى ويتحط فى الذاكرة عشان المعالج يتعامل معاه.
- وطبعاً الأسلوب المتبع مع ويندوز يتخلف عن لينكس وبالتالي الـ executable files/binaries بتاعة Linux مش هتتشغل على windows والعكس .
- دى بقى مشكلة فى اللغات الـ compiled إنها مرتبطة بنظام التشغيل platform dependent.
- حاولنا نحل المشكلة دى فقولنا البرنامج اللى هنكتبه بأى لغة البرمجة source code مش هنحوله للغة الآله..هنسيبه زى ماهو بصورته النصية وهنعمل برنامج نثبته





على كل نظام تشغيل windows/linux/android/ios ولما أجي أشغل الكود ده البرنامج هياخده وهيحوله للغة الآله وقت التشغيل وبالتالي أقدر اكتب كود واحد وأشغله على أى نظام تشغيل مثبت عليه البرنامج اللي هيفسره.

- البرنامج الوسيط ده اسمه interpreter وده برنامج بيحول الكود النصى واللى بسميه script للغة الآله وقت التشغيل. وكل مره أشغل السكرت الـ interpreter يببداً من أول سطر في الكود ويحوله للغة الآله على عكس الـ compiler اللي بيحول الكود إلى machine code مرة وحده.

الكلام ده عشان تفهم معنى إن لغة scripting language يعنى البرنامج اللي بعمله بيقتل طول عمره بصورته النصيه وأى حد يقدر يشوف الكود.. ولغة interpreted يعنى السكرت بيتحول للغة الآله وقت التشغيل.

وأخر نقطة فى التعريف .. لغة general purpose يعنى مش مخصصة لمجال معين وتقدر تستخدمها فى أى حاجة والجزئية الجاية هنعرف أنواع البرامج والتطبيقات اللي ممكن تعملها بلغة البايثون.




## استخدامات لغة البايثون

- تطبيقات سطح المكتب desktop application
  - تطبيقات الويب والمواقع web application
  - تطبيقات الموبايل android/ios
  - جمع وسرقة المحتوى من المواقع web scrapping
  - في التطبيقات العلمية والحسابية بديل مجاني للغة الماتلاب
  - تطبيقات الذكاء الإصطناعي AI وتعلم الآله Machine Learning.
  - برمجة الشكبات Networking وإدارة السيرفرات.
  - في الأنظمة المدمجة و الريبوت وبرمجة راسبيري باى [raspberrypi](#)
  - في تعليم لغات البرمجة بأعتبارها لغة ساهلة وتصلح للاطفال والمبتدئين
- وعشان تعرف أكثر عن التطبيقات اللى تقدر تعملها بلغة البايثون تقدر تشوف الموضوع ده على الموقع الرسمي من [apps](#).



## الفصل 1 - البرمجة بلغة بايثون



تثبيت لغة البايثون

- ✓ [على ويندوز Windows](#)
- ✓ [على أنظمة لينكس Linux](#)
- ✓ [على الموبايل IOS و Android](#)
- ✓ [بايثون اونلاين Python Online](#)
- ✓ [أساليب البرمجة بلغة البايثون](#)

[الفهرس](#)



## تثبيت لغة البايثون

عرفنا في الفصل السابق إن لغة البايثون من اللغات المفسرة Interpreted وبنقدر نشغل الكود اللي بنكتبه بلغة البايثون واللى سمناه سكريبت script على أى نظام تشغيل عليه مفسرة لغة البايثون..يعنى دلوقتى أياً كان نظام التشغيل بتاعك هتحتاج يكون على جهازك بيئة تطوير لغة البايثون python environment ودى عبارة عن الـ interpreter و محرر أكواد بنكتب فيه السكريبتات بالإضافة إلى المكتبات الأساسية اللي بتجى مع اللغة واللى هتستخدمها في التطبيقات المختلفة.

في الفقرات الجاية هنعرف طرق تثبيت لغة البايثون على أنظمة التشغيل والأجهزة المختلفة.

## نظام تشغيل ويندوز Windows

من الموقع الرسمي للغة البايثون [python](#) هتحمّل الإصدار المناسب ليك .. في الكتاب ده هنشتغل على بايثون 3 وبالتالي تقدر تحمل آخر release متوفرة.



## الفرق بين بايثون 3.x و بايثون 2.x

جائز تكون دقيق الملاحظة وانت وبتدور في releases أو الإصدارات المختلفة للغة ملقش الإصدارات طالعة بالترتيب او إنهم لازالوا بيعملوا تحديثات للإصدارات 2.X بالإضافة إلى 3.X وإيه الفرق بين الإصدارات الكثير دى وانا المفروض أتعلم مين فيهم ؟

Looking for a specific release?

Python releases by version number:

Release version	Release date		Click for more
Python 3.5.6	2018-08-02	Download	Release Notes
Python 3.4.9	2018-08-02	Download	Release Notes
Python 3.7.0	2018-06-27	Download	Release Notes
Python 3.6.6	2018-06-27	Download	Release Notes
Python 2.7.15	2018-05-01	Download	Release Notes
Python 3.6.5	2018-03-28	Download	Release Notes
Python 3.4.8	2018-02-05	Download	Release Notes
Python 3.4.5	2018-02-05	Download	Release Notes


View older releases

أيه الفرق؟ مالناش دعوة لأنك لحد دلوقتي متعرفش حاجة عن اللغة.. طيب هنشغل على بايثون 2 ولا 3؟! الجواب آخر إصدار نازل على الموقع من بايثون 3.

على الموقع الرسمي [which-python](https://www.python.org/which-python/) بيقول إن بايثون 2.7 الأكثر استخداماً في المشاريع ولكنها هيتوقف الدعم والتحديثات الأمنية لها في 2020 يعنى خلو مشاريعكم متوافقة مع على بايثون 3 بكرامتكم 🙏

لو الفضول قتلك وعاوز تعرف الفرق بين بايثون 2 و 3 والمفروض تتعلم مين فيهم فتقدر تشوف المقالة دى [Python2orPython3](https://python2orpython3.com/) واللى أختصروا فيها الفرق بين الإصدارين..

Short version: Python 2.x is legacy, Python 3.x is the present and future of the language



بأفتراض إنى أقنعتك إنك تحمل أى إصدار بايثون 3 ولا سيما كان الإصدار الأخير و ثبته على جهازك هتروح تبحث فى قائمة ابدأ تكتب كلمة python أو IDLE لو هتشتغل على أى لغة برمجة هتسمع عن حاجة اسمها IDE الكلمة دى معناها ايه ؟

## Integrated development environment

An integrated development environment (IDE) An IDE normally consists of a source code editor, build automation tools, and a debugger. Most modern IDEs have intelligent code completion. Some IDEs, such as NetBeans and Eclipse

بيقولك إن الـ IDE يعنى بيئة التطوير المتكاملة، وهى عبارة عن برنامج فيه محرر نصوص وده مكان بتكتب فى الكود بتاعك بأى لغة كانت ، وفيه أدوات بتحول الكود ده للغة الآله وتشغله وتطلع الاخطاء فى الكود إن وجدت..

- بالنسبة للغة البايثون على نظام تشغيل ويندوز بيجى معاها برنامج اسمه IDLE وده أختصاره الجملة integrated development and learning environment.
- المهم هتفتح برنامج Python IDLE وهتشوف الشكل اللى قدامك وهو مفسر لغة البايثون الـ Interpreter.. وبكده نكون نكون ثبتنا لغة البايثون على ويندوز وجاهزين نكتب ول كود لينا.



```
Python 3.6.3 Shell
File Edit Shell Debug Options Window Help
Python 3.6.3 (v3.6.3:2c5fed8, Oct 3 2017, 17:26:49) [MSC v.1900 32 bit
(Intel)] on win32
Type "copyright", "credits" or "license()" for more information.
>>>
```

بس قبل ما نبدأ مش عايزين ننسى اخواتنا الغلابه بتوع لينكس أو البؤساء اللي معندهم مش كمبيوتر وعاوزين يشتغلوا من على الموبايل..

## أنظمة لينكس Linux

الحقيقة مستخدمين توزيعات لينكس مش غلابة ولا حاجة وعارفين إنهم مش محتاجين يينزلوا أى برامج يا دوب يفتحوا التيرمنال terminal ويتكبوا فيه python أو python3 حسب إصدار لغة البايثون المثبت على التوزيعة اللي شغالين عليها وهيشغل مفسر لغة البايثون على طول.


```
Python 2.6.6 (r266:84292, Aug 19 2016, 11:10:19)
[GCC 4.4.7 20120313 (Red Hat 4.4.7-17)] on linux2
Type "help", "copyright", "credits" or "license" for more information.
>>> █
```



## على الموبايل IOS و Android

من الجميل إنك تقدر تكتب أكواد وسكريتات للغة البايثون على السمارت فوت بتاعك من غير ما يكون عندك كمبيوتر.. ومش بس كده van Rossum بيضحى النهارده 😊 كمان تقدر تعمل سكريتات لتطبيقات أندرويد كاملة من على الموبايل..وده بفضل أليكيشن qpython3 أو [qpython](#) اللى تقدر تخمله من على جوجال بلاي أو الآب ستور وطبعاً مش محتاج أفهمك إن qpython3 ده للغة بايثون 3.

لما تفتح التطبيق على الموبايل هيكون شكله كده ..



و تقدر من خلال الزرار Editor تفتح محرر اللغة وتكتب سكريتات بلغة البايثون أو من الـ Console تفتح مفسر اللغة التفاعلى الـ Interactive Interpreter اللى هنتشوف بعد شوية تفاعلى ازاي وهنعمل بيه أيه 😊.





## بايثون اونلاين Python Online

- تقدر تجرب اكواد لغة البايثون اونلاين من غير ما تحتاج أنك تحمل أى برامج، وطبعاً فيه مواقع كتير تقدر تجرب عليها فلو مش عاوز تسجل وعاوز تجرب على السريع فبرشحك [execute python online](https://executepythononline.tutorialspoint.com) على موقع [tutorialspoint](https://tutorialspoint.com).
- او ممكن تستخدم موقع [PythonAnyWhere](https://pythonanywhere.com) وده من المواقع الجميلة اللي هنستخدمها فى نشر تطبيقات الويب اللي هنعملها بالبايثون فى الفصل قبل الاخير لو كان لينا عمر 🧑🏻.. وتقدر تسجل حساب مجاني على الموقع ده اللي بيديك إمكانية اختيار إصدار البايثون المناسب ليك وتقدر تثبت المكتبات اللي هحتاجها عليه.

بعد ما تسجل دخول على الموقع هتفتح صفحة Dashboard وهتختار مفسر البايثون بالإصدار المناسب..

The screenshot shows the PythonAnywhere dashboard. At the top, there are navigation links: Dashboard, Consoles, Files, Web, Tasks, and Databases. The main heading is "Dashboard". Below this, there are two status indicators: "CPU Usage: 0% used - 0.00s of 100s. Resets in 15 hours" and "File storage: 21% full - 105.2 MB of your 512.0 MB quota". There is an "Upgrade Account" button. The dashboard is divided into two main sections: "Recent Consoles" and "Recent Notebooks". Under "Recent Consoles", it says "You have no recent consoles." and there is a "View all" button. Under "Recent Notebooks", there is a message: "Your account does not support Jupyter Notebooks. Upgrade your account to get access!". Below these sections, there are two more options: "New console:" with a "\$ Bash" button and a "More..." button, and "All Web apps" with an "Open Web tab" button. A "New console:" panel is highlighted in yellow, showing a "Version" dropdown with options for 3.7, 3.6, and 2.7.



## أساليب البرمجة بلغة البايثون

تعالو نكتب اول كود لنا بلغة البايثون. وهنعرف إن فيه 3 طرق عشان تكتب وتشغل الاكواد بتاعتك.

### النظام التفاعلي Interactive Mode

في لغة البايثون ومعظم اللغات المفسرة فيها نظام البرمجة بشكل تفاعلي.. بإنك تكتب الكود البرمجي سطر سطر في الـ Interpreter كأنك بتعمل chat مع الكمبيوتر.

- عشان تشتغل معنا مع المفسر التفاعلي.. لو على ويندوز من قائمة أبدأ هتفتح برنامج الـ IDLE أو هتفتح موجه الأوامر CMD وتكتب فيه `python`.
- ولو على الموبايل هتفتح تطبيق `qpython` وتختار `console`.
- ولو على أى توزيعه لنظام لينكس هتفتح الـ `terminal` وتكتب فيه `python`.

لما يفتح الـ Interactive Interpreter هتكتب فيه الكود ده وتدوس Enter

```
print("Hello World ^_^")
```

شكل الـ IDLE على ويندوز

```
Python 3.6.3 Shell
File Edit Shell Debug Options Window Help
Python 3.6.3 (v3.6.3:2c5fed8, Oct 3 2017, 17:26:49) [MSC v.1900 32 bit (Intel)]
on win32
Type "copyright", "credits" or "license()" for more information.
>>>
RESTART: C:/Users/Mahmoud/AppData/Local/Programs/Python/Python36-32/testsss.py
>>> print("Hello World ^_^")
Hello World ^_^
>>> |
```



شكل المفسر في الـ CMD على ويندوز ومتستناش تشوفه على ليونكس عشان مش

هرسترت الجهاز 😊.

```
C:\WINDOWS\system32\cmd.exe - python
Microsoft Windows [Version 10.0.16299.431]
(c) 2017 Microsoft Corporation. All rights reserved.

C:\Users\Mahmoud>python
Python 3.6.3 (v3.6.3:2c5fed8, Oct 3 2017, 17:26:49) [MSC v.1900 32 bit (Intel)] on win32
Type "help", "copyright", "credits" or "license" for more information.
>>> print("Hello World ^_^")
Hello World ^_^
>>>
```

شكل المفسر على موقع PythonAnywhere

```
Python3.7 console 10543633
Python 3.7.0 (default, Aug 12 2018, 20:40:44)
[GCC 5.4.0 20160609] on linux
Type "help", "copyright", "credits" or "license" for more information.
>>> print("Hello World ^_^")
Hello World ^_^
>>>
```

- المهم في الكود ده أنت استخدمت الدالة print عشان تطبع الجملة المشهورة اللي بتعملها ولما تبدأ في أى لغة برمجة Hello World وظهرت قدامنا على الشاشة.

ولو مستقل باللي أنت عملته فيشوف الكود اللي بيطبع نفس الجملة بلغة Java ولغة C++ وأعرف العز اللي انت فيه 😊.

```
public class Hello
{
    public static void main(String[] args)
    {
        System.out.println("Hello World!");
    }
}
```

Java

```
#include <iostream>
using namespace std;

int main()
{
    cout << "Hello world!" << endl;
    return 0;
}
```

C++




## كتابة سكريبت على Python IDLE

- لو شغال على ويندوز وفتحت الـ IDLE من قائمة File > New File أو تأكد إن لوحة المفاتيح إنجليزي ودوس Ctrl+N وهي فتحك محرر اكواد لغة البايثون..وهو code editor متواضع جداً مكتوب بلغة البايثون.
- وهتنسخ فيه الكود ده `print("Hello World ^_^")` وتشغل السكريبت عن طريق إنك تدوس F5 او من قائمة Run > Run module
- لو مكنتش حفظت السكريبت هيطلب منك حفظه وبعدها هيفتح السكريبت وينفذه في الـ Interactive interpreter

The screenshot shows the Python IDLE interface. The title bar reads: `*hello_world.py - C:\Users\Mahmoud\AppData\Local\Programs\Python\Python36-32\hello_world.py (3.6.3)*`. The menu bar includes File, Edit, Format, Run, Options, Window, and Help. The 'Run' menu is open, showing options: Python Shell, Check Module (Alt+X), and Run Module (F5). The 'Run Module' option is highlighted. The code editor contains the line: `print("Hello From Python ^_^")`.

- وعشان تكتب سكريبت بايثون على برنامج Qpython على الموبايل.. هتتشغل البرنامج وتفتح الـ Editor وتعمل سكريبت جديد تكتب فيه الكود وحفظه بأي اسم مثلاً `test.py` وهيشتغل معاك.



## محركات الأكواد Code Editors


لو مش حابب برنامج Python IDLE تقدر تستخدم أى code editor مشهور زي sublime  
 ++notepad - vscode بتكتب عليه السكرت بتاعك وتحفظه وتعمله تشغيل من  
 خلال الـ Terminal فى لينكس أو الـ CMD على ويندوز.

وبرشحك برنامج فيجوال ستوديو كود vscode برنامج تبع مايكروسوفت مجاني ومفتوح  
 المصدر وبتقدر تضيف عليه extensions للغة البايثون.. وفيه مميزات كتير عن أى code  
 editor تانى فى سهولة تنزيل الـ extensions وتكملة الأكواد وكشف الأخطاء وغيرها...

تقدر تحمل البرنامج لنظام تشغيلك من هنا [visualstudio](https://visualstudio.com)



- كل اللي هتعمله إنك تفتح ملف جديد وتحفظه بصيغة py. مثلاً test.py وعلى طول ه يظهر hint يطلبك منك تثبت extension للغة البايثون و بعد ما تثبتها تعمل reload للبرنامج عشان يفعل الـ extension الجديدة.
- هتكتب الأكواد بتاعتك ومن قائمة debug على الشمال هتدوس على start debugging وهيشغل السكربت وهتشوف الناتج بتاعه فى الـ DEBUG CONSOLE من تحت.



طبعاً فيجوال ستوديو كود فيه debugger بيخلينا نقدر نشغل الـ script من البرنامج نفسه بنسبه الـ IDLE .. لكن لو شغال على أى محرر تانى مفيهوش debugger زي notepad الحقيقه بتاعة ويندوز هتحتاج تشغل الكود بنفسك فى الـ command line.



## تشغيل السكريبتات في الـ command Line

الـ command line أو سطر الأوامر وهو الشاشة السوداء التي اسمها CMD ومبتعلمش بيها أى حاجة على ويندوز أو الـ Terminal التي بتستخدمه على لينكس وبتخيل نفسك هاكر 😁.. المهم في الحالة دي هتكتب الكود بتاعك بأى برنامج محرر نصوص وبتحفظه بامتداد py. وبتشغله فالـ command line بالطريقة دي.

```
python script_name.py
```

- مثلاً في أى مكان هتعمل ملف جديد وتسميه test.py وتكتب فيه الجملة التي بنطبعها من بدري وتفتح الـ Command line توجهه للمسار التي موجود فيه السكريبت ده.

```
test.py - Notepad
File Edit Format View Help
print("Hello From Command Line ^_^")
```

```
C:\WINDOWS\system32\cmd.exe
C:\Users\Mahmoud>E:
E:\>python test.py
Hello From Command Line ^_^
```

- هنا انا حافظ السكريبت test.py في البارتيشن E عشان متقولش إيه التي وداك هنا. و طبعاً لازم تكون بتعرف تتعامل مع الـ command line عشان تستخدم الأخيرة.



وأخيراً واحد هيسألنى هنستخدم انهى طريقة أو برنامج 😊!؟

هتعدى عليك مراحل هتحتاج تستخدمهم كلهم.. بس فى البداية وأنت وبتتعلم هتشتغل على الـ Interactive Interpreter على الـ IDLE أو الـ command line لأنه هيساعدك تشوف كل سطر وجملة فى البرنامج بتننفذ ازاي .. وبعد كده تبدأ تكتب سكريتات على الـ Code Editor بتاع الـ IDLE أو لما تهزق منه هتختار أى Code editor او IDE تانى تشتغل عليه.. وبالناسبة وقبل ما أخلص الشابتري ده هتستغل باقى الصفحة دي وأعرفك على برنامج أو IDE عظيم اسمه [PyCharm](#) تقدر تكتب عليه سكريتات بلغة البايثون وتستخدمه فى المشاريع الكبيرة.

**PC** **PyCharm**

Python IDE  
for Professional Developers


**DOWNLOAD NOW**

Full-fledged Professional or Free Community





## الفصل 2 - أساسيات لغة البايثون Python Basics



- العمليات Operations ✓
- المتغيرات وأنواع البيانات Data types ✓
- الأرقام Numbers ✓
- النصوص Strings ✓
- المصفوفات Arrays ✓
- التعليقات Comments ✓
- الدوال Functions ✓
- البرمجة الكائنية OOP ✓
- جمل الشرط واتخاذ القرار Making Decision. ✓
- جمل التكرار Loop ✓
- الأخطاء والاستثناءات Errors and Exceptions ✓



## العمليات Operations

### العمليات الحسابية Arithmetic Operators

دلوقتى هنتعامل مع المفسر التفاعلى بتاع لغة البايثون كأنه آله حاسبة هنخليه ينفذ العمليات الحسابيه زى الجمع الطرح والقسمة والضرب والأس وباقى القسمة.

- هفتح الـ Interactive Interpreter وهنفذ العمليات دى..

>>> 5 + 5 10	+ للجمع
>>> 5 * 5 25	* الضرب
>>> 5 - 5 0	- الطرح
>>> 10 / 5 2.0	/ القسمة
>>> 5 % 2 1	% باقى القسمة
>>> 5 ** 2 25	** الأس

- العلامات دى `+` `-` `*` `/` `%` `**` أسمها معاملات Operators.. والأرقام اللى بعمل عليها العملية الحسابية اسمها Operands.



- تقدر تنفذ أكثر من عملية حسابية مرة وحده بس ده هياخدنا لموضوع تانى وهو أولوية العمليات الحسابية ..يعنى مثلاً لما يبقى فيه جمع وضرب وطرح هينفذ مين الاول؟
  - العمليات الحسابية يتم تنفيذها بالأولوية دى  
 الأس << الضرب / القسمة / باقى القسمة >> الطرح / الجمع
  - مثلاً العملية الحسابية دى ليه نتيجتها 1 ونفذها ازاي اصلاً ؟  

```
>>> 10-2*8+7
1
```
  - الأولوية فى العمليات الحسابية للضرب وبعدين الجمع والطرح  
 فهتبقى  $10-2*8+7 = 10-16+7 = 7$
  - طيب لو عاوز الطرح يتنفذ قبل الضرب فيه حل ؟  

```
>>> (10-2) *8+7
71
```

 ايوه فيه حاجة رتبته أعلى من الضرب وهى الأقواس (.) ..  
 أى عملية حسابية عايزها تتنفذ الاول حطها بين أقواس دائرية..  
 فهنا نفذ ما بداخل القوس الأول 10-2 فالعلمية بقيت  $8*8+7$  بعدين الضرب  $8*8+7 = 64+7 = 71$
  - طيب لو فيه معامل الأس \*\* هيتنفذ قبل الضرب  

```
>>> 3+2*4**2-30/2
20.0
```

 والضرب والقسمة...  $3+2*4**2-30/2 = 3+2*16-30/2 = 3+32-15 = 20.0$
- يبقى خليك فاكر ترتيب العمليات الحسابية فى لغة البايثون
- ما بين الأقواس << الأس >> الضرب / والقسمة / باقى القسمة << الجمع والطرح..



## عمليات المقارنة (Relational) Operators

العلامة	المعامل Operator
==	يساوي (علامتين)
!=	لا يساوي
>	أكبر من
<	أصغر من
>=	أكبر من أو يساوي
<=	أصغر من أو يساوي

لو عاوز تعمل مقارنة بين قيمة وقيمة ثانية بتستخدم

معاملات المقارنة Relational Operators .

معاملات المقارنة بتقارن بين معاملين Operands يمين

و شمال العلامة وبترجع True في حالة صحة المقارنة

و بترجع False لو المقارنة دي غلط..

>>> 5 == 5 True	هل 5 تساوي 5
>>> 5 != 4 True	هل 5 لا تساوي 4
>>> 5 < 6 True	هل 5 أقل من 6
>>> 5 > 7 False	هل 5 أكبر من 7
>>> 3 <= 5 True	هل 3 أقل من أو تساوي 5
>>> 2 * 3 > 4 True	هل 2*3 أكبر من 4
>>> 2*3+4*5 == 15*2-4 True	

• طبعاً تخلى بالك لو كان أحد أطراف المقارنة عملية حسابية Math Operation

..العملية الحسابية ليها اولوية تسبق عملية المقارنة و هتتنفذ وبعدين هيقارن.



فاضل إنك تسأل فايدتها إيه عمليات المقارنة دي؟! دي من أهم العمليات اللي بتتحكم في سير البرنامج وهنستخدمها بشكل أساسى فى جمل الشرط والتكرار زى ما هنشوف قدام بس أصبر شوية.

## العمليات المنطقية Logical Operations.

لو كنت قبل كده سمعت عن البوابات المنطقية Logic gates.. ودى عبارة عن رمز بيعبر عن دالة بتاخد input او اكثر وتنفذ عليهم علاقة معينة ويطلع output واحد.. وعرفت إن القيم المنطقية دي اما 0 أو 1 ده فى نظام البينارى طبعاً.

فى لغة البايثون أستفادوا من البوابات المنطقية دي وعملوا logical operators معاملات منطقية and و or و not .. والعوامل بتاعتها بتكون قيم True او False بدل 0 و 1 .. والخرج بتاعها بيكون True أو False حسب نوع المعامل and , or , not

False	<b>And</b>	False	False
True		False	False
False		True	False
True		True	False

False	<b>or</b>	False	False
True		False	True
False		True	True
True		True	True

والمعامل الأخير not ده بيعكس لو جاباله قيمة True هخليها False والعكس..



تلافيك بتسأل True و False والعمليات المنطقية دي هعمل بيها إيه؟ 🤔

لو لسة فإكر عمليات المقارنة فهي اللي الناتج بتاعها بيكون True او False وبالتالي بالعمليات المنطقية نقدر نربط عمليات المقارنة مع بعض.. وهتعرف أهمية الموضوع ده قدام لما نأخذ جمل الشرط .. بس أفتح الـ Interactive Interpreter دلوقتي و جرب معايا.

```
>>> True and True
True
>>> True and False
False
>>> True or False
True
```

```
>>> False or False
False
>>> not True
False
>>> not False
True
```

- لو العملية فيها معاملات حسابية ومقارنة ومعاملات منطقية هينفذ العملية الحسابية الأول وبعدين عملية المقارنة وبعدين العملية المنطقية..

```
>>> 5+3 < 4-1 or 3*4 == 2*6
True
```

```
8<3 or 12==12
False or True = True
```

```
>>> 5+2 > 4-3 and not 1 > 3
True
```

```
7 > 1 and not False
True and True = True
```

```
>>> ((5+2)>(4-3)) and not (1>3)
True
```

عشان متوهش في العمليات نقدر نخط كل عملية بين أقواس والكود هيبقى واضح أكثر..



لو أحد العوامل اللي على يمين وشمال and أو or كان أرقام ففى الحالة دى ناتج العملية مش هيكون True او False.

- فى حالة المعامل and الناتج هيكون الرقم اللي على يمينها.
- فى حالة المعامل or الناتج هيكون الرقم اللي على شمالها.
- لو أحد العوامل كان صفر. فى حالة and الناتج طبعاً صفر.
- فى حالة or الناتج هيكون الرقم الثانى.

```
>>> 5 and 6
6
>>> 5 or 6
5
>>> 0 and 2
0
```

```
>>> 0 or 2
2
>>> True and 2
2
>>> 2 and True
True
```



## المتغيرات وأنواع البيانات

### المتغيرات variables

المتغيرات هي أماكن في الذاكرة نخزن فيها قيم values (أرقام ونصوص) بأسماء أحنا بنحدها عشان نقدر نستخدمها في اكثر من مكان في الكود أثناء تشغيل البرنامج.

### تعريف المتغيرات Assigning Variables

تعريف المتغير أو بمعنى آخر إسناد قيمة للمتغير ... أزاى خلى مفسر اللغة ياخذ قيمة منك يخطها في الذاكرة باسم معين وانت تقدر تسترجع القيمة دي فى أى وقت أثناء تشغيل البرنامج.

```
variable_name = value
```

الطريقة سهلة .. هتكتب اسم المتغير وبعدين علامة = وبعدين القيمة اللي عاوز تخزنها فى المتغير ..

- مثلاً فى الكود اللي على شمالك قولنا لل-interpreter أحجز مكان فى الذاكرة وسميه x وخط فيه القيمة 5
- دلوقتى لما أحتاج ارجع القيمة اللي جوة المتغير x اناديه باسمه وهيرجع القيمة على طول .

```
>>> x = 5
>>> x
5
>>> |
```





## اسماء المتغيرات identifiers

في لغة البايثون فيه حاجة اسمها identifier وده الاسم اللي بتسميه لمتغير variable او دالة function او كلاس class وهنعرف آخر أتنين معناهم ايه فيما بعد .. المهم الاسم بتاع المتغير أو الـ identifier مواصفاته ايه ؟ ..

- الـ identifier ممكن يكون أى حرف أو مجموعة حروف وأرقام بس لازم تبدأ بحرف إنجليزي أو عربي (لو شغال على IDLE) ومينفعش تحتوى على أى رموز زي %\$#@ .
- الرمز الوحيد المسموح بيه هو \_ underscore وده ينفع يكون اسم متغير لوحده.
- في حاجة اسمها الـ reserved keywords أو الكلمات المحجوز في اللغة ودي مينفعش تستخدمها كـ identifiers.
- والـ keywords دي كلمات وجمل برمجية ليها استخدامات تانية في اللغة زي جمل الشرط والتكرار تعريف الدوال والكلاسات وفيما بعد هتعرف أغلب الاسامي دي بس.

and	exec	not
assert	finally	or
break	for	pass
class	from	print
continue	global	raise
def	if	return
del	import	try
elif	in	while
else	is	with
except	lambda	yield

جدول بالكلمات المحجوزة في لغة بايثون



## أمثله على تعريف المتغيرات

<pre>&gt;&gt;&gt; x = 2 &gt;&gt;&gt; y = 3</pre>	<p>هنا كتبنا <math>x = 2</math> يعني قولنا للمفسر روح خزن في الرامه متغير اسمه <math>x</math> والقيمة بتاعته 2 . والسطر التاني عملنا متغير اسمه <math>y</math> وقيمه 3 .</p>
<pre>&gt;&gt;&gt; x 2 &gt;&gt;&gt; y 3</pre>	<p>بعدين كتبنا اسم المتغير أو عملنا له استدعاء call يعني قولنا للمفسر روح الرامه هاتلنا قيمة المتغير اللي اسمه <math>x</math> أو <math>y</math> .</p>
<pre>&gt;&gt;&gt; x*y 6 &gt;&gt;&gt; x+y * x-y 5</pre>	<p>بعدين بدأنا نستخدم المتغيرات دي إننا نستخدمهم في العمليات الحسابية.</p>

- اسم المتغير مكن يكون \_ ولو شغال على الـ IDLE مكن يكون بالعربي.

## اسناد متعدد للمتغيرات Multiple Assignment

يعنى ازاي في سطر واحد تعرف اكثر من متغير..

<pre>var1, var2, var3=val1, val2, val3</pre>	<pre>var1=var2=var3 = val</pre>
<pre>&gt;&gt;&gt; x, y, z=1, 2, 3 &gt;&gt;&gt; x 1 &gt;&gt;&gt; y 2 &gt;&gt;&gt; z 3</pre>	<pre>&gt;&gt;&gt; x=y=z=20 &gt;&gt;&gt; x 20 &gt;&gt;&gt; y 20 &gt;&gt;&gt; z 20</pre>



```
>>> x = 1
>>> y = 2
>>> x = y
>>> y = x >= 2
>>> x
2
>>> y
True
```

• إسناد المتغير مش لازم يكون لقيمة صريحة ممكن يكون  
 لـ متغير تانى أو ناتج عملية حسابية او منطقية أو دالة  
 أو أوجكت من كلاس.

## أنواع البيانات Data Types

البيانات أو الـ data اللى بتتعامل معاها فى لغة البايثون أو اللى بتخزنها فى المتغيرات ممكن تقسمها إلى :

### 1- أرقام numbers

والأرقام دى وممكن تكون عدد صحيح integer يختصر بـ **int** زى **1** أو رقم كسر **float** زى **1.5**  
 أو رقم معقد/خيلى **complex** زى **5j**

### 2- نصوص strings

أى حاجة بين علامتين ' ' أو " " زى جملة **"Hello World"** اللى كنا بنطبعها فى الأول دى اسمها نص string أو **str**

### 3- قيم منطقية Boolean

أو **bool** زى **True** أو **False** .. وخلي بالك إن الحرف الأول **capital**.

4- **مصفوفات** ودى 3 أنواع زى **dictionary** , **tuple** , **list** و هنتكلم عنهم قدام.



عشان تعرف النوع بتاع أى قيمة فى لغة البايثون بتستخدم دالة type

```
>>> type(5)
<class 'int'>
>>> type(5.5)
<class 'float'>
>>> type(5j)
<class 'complex'>

>>> type('Hello')
<class 'str'>
>>> type(True)
<class 'bool'>
```

## نوع المتغير Variable type

```
>>> x = 1
>>> y = 1.5
>>> type(x)
<class 'int'>
>>> type(y)
<class 'float'>
```

نوع المتغير هو نوع الداتا اللي خزنتها فيه..

نوع البيانات من الحاجات المهمة لأنه هيفرق فى العمليات بين

المتغيرات وكذلك فى الحجم اللي يشغله كل متغير فى الذاكرة.

البايثون لغة Dynamically typed يعنى نوع المتغير يتم تعرفه بشكل ديناميكى بناءً على

القيمة اللي جخزنها فيه. بالإضافة إنى أفد أغير نوع المتغير بتغيير القيمة اللي جخزنها فيه.

```
>>> x = True
>>> type(x)
<class 'bool'>
>>> x=1
>>> type(x)
<class 'int'>
>>> x="Hello"
>>> type(x)
<class 'str'>
```

• هنا مثلاً المتغير x ممكن ياخذ قيمه True أو False ويبقى نوعه

bool او ياخذ رقم ويبقى نوعه int او ياخذ نص ويبقى نوعه str

من غير أى مشاكل ..



- بقولك كده ليه ؟. عشان لو أتعاملت مع لغات زي الـ #c/c++/java المعروفة بأنها statically typed يعنى نوع البيانات ثابت الوضع هيكون مختلف.
- لو عملت متغير بتحدد نوعه فى الكود ومينفعش تغير نوعه وقت التشغيل.
- مثلاً عاوز تعرف متغير رقمى صحيح اسمه x وقيمته 1 هتكتب `int x = 1` وبعد ما عرفت المتغير مينفعش تخزن فيه قيم لأى نوع تانى غير الـ integer أو ارقام صحيحة.
- لكن لغة البايثون وفى الغالب اللغات المفسرة تعتبر Dynamically Typed

## الأرقام Numbers

الأرقام زي ما قولنا ممكن تكون ارقام صحيحة integer وتختصر بـ int زي 1 و2 و100 أو ممكن تكون أرقام كسرية وتسمى float زي 0.7 أو 1.0 (لو حطيت 0. جنب الرقم الصحيح اللغة بتتعامل معاه أنه float).. أو ممكن تكون أرقام مركبة complex .

### #التحويل بين الأرقام Number Type Conversion

<code>int(value)</code>	تحويل القيمة الى رقم صحيح
<code>float(value)</code>	تحويل القيمة الى رقم كسرى
<code>complex(value)</code>	تحويل القيمة الى رقم مركب
<code>complex(real, img)</code>	عمل رقم مركب بجزء صحيح وآخر تخيلى



```
>>> int(5.5)
5
>>> float(10)
10.0
>>> complex(2, 4)
(2+4j)
```

```
>>> x = 10
>>> type(x)
<class 'int'>
>>> x = complex(x)
>>> x
(10+0j)
>>> type(x)
<class 'complex'>
```

- دالة int بتحول أى قيمة رقمية إلى رقم صحيح
- دالة complex بتأخذ برامترين الرقم الحقيقى real والرقم التخيلى imaginary ويتولد رقم مركب complex.

## مكتبة Math

فى أغلب لغات البرمجة هنلاقوا مكتبة تحمل الاسم Math ودى تحتوى على دوال رياضية

Mathematical Functions للعمليات على الأرقام ..

عشان تستخدم دوال المكتبة لازم تعملها import أو استدعاء بالطريقة دى وهنشرح معنى الطريقة دى فى شابتر الـ Modules ..

```
from math import *
```

المكتبة فيها دوال كتير هنستخدم بعضهم.. و عشان نعرف الدوال نقدر نعملها print

على الشاشة بدالة بدالة dir بالشكل ده ..

```
>>> from math import *
>>> dir(math)
['__doc__', '__loader__', '__name__', '__package__', '__spec__', 'acos', 'acosh', 'asin', 'asinh', 'atan',
'copysign', 'cos', 'cosh', 'degrees', 'e', 'erf', 'erfc', 'exp', 'expm1', 'fabs', 'factorial', 'floor',
'ma', 'gcd', 'hypot', 'inf', 'isclose', 'isfinite', 'isinf', 'isnan', 'ldexp', 'lgamma', 'log', 'log10',
', 'pi', 'pow', 'radians', 'sin', 'sinh', 'sqrt', 'tan', 'tanh', 'tau', 'trunc']
```



<pre>from math import *</pre>	<p>استدعاء كل الدوال من المكتبة math</p>
<pre>&gt;&gt;&gt; pi 3.141592653589793</pre>	<p>الرقم pi أو ط</p>
<pre>&gt;&gt;&gt; sqrt(25) 5.0 &gt;&gt;&gt; pow(2,4) 16.0</pre>	<p>دالة الجذر sqrt دالة الأس pow .. هنا 2 أس 4</p>
<pre>&gt;&gt;&gt; floor(5.6) 5 &gt;&gt;&gt; ceil(5.6) 6</pre>	<p>دالة floor بتجيب أقرب رقم صحيح أصغر من الرقم الكسري. دالة ceil بتجيب أقرب رقم صحيح أكبر.</p>
<pre>&gt;&gt;&gt; log10(10) 1.0 &gt;&gt;&gt; log(100,10) 2.0</pre>	<p>دالة log10 بتجيب اللوغاريتم للأساس 10 دالة log بتاخذ الرقم والأساس. هنا لوغاريتم 100 للأساس 10 = 2</p>
<pre>&gt;&gt;&gt; factorial(4) 24 &gt;&gt;&gt; fabs(-10) 10.0</pre>	<p>دالة factorial بتجيب مضرب الرقم. هنا مضروب 4 = 4 * 3 * 2 * 1 = 24 دالة fabs بتجيب القيمة المطلقة للعدد.</p>



<pre>&gt;&gt;&gt; round(10.12845, 2) 10.13 &gt;&gt;&gt; pi 3.141592653589793 &gt;&gt;&gt; round(pi, 2) 3.14</pre>	<p>دالة round بتقرب الأعداد. بتأخذ برامتين..الأول العدد اللي عاوز أقربه ،والثاني عدد الأرقام الي تسببهم بعد العلامة العشرية.</p>
<pre>&gt;&gt;&gt; sin(90) 0.8939966636005579  &gt;&gt;&gt; sin(radians(90)) 1.0  &gt;&gt;&gt; radians(180) == pi True  &gt;&gt;&gt; x=radians(90) &gt;&gt;&gt; int(sin(x)) 1 &gt;&gt;&gt; int(cos(x)) 0</pre>	<p>الدوال المثلثية زي sin,cos,tan. في لغة البايثون الدالة بتأخذ قيمة الزاوية بالتقدير الدائري radian. لو عملت sin(90) مش هتطلع 1 لأنك لازم تحول 90 إلى راديان بالدالة radians . طبعاً أنت عارف إن 180 بالتقدير الدائري = باي</p>

دى كانت بعض الدوال المهمة في مكتبة Math .. لو عاوز تعرف استخدام باقى الدوال تقدر

تشفوها على الوثيقة بتاعة اللغة [math](#)





## النصوص Strings

من شوية كنا بنتكلم عن الأرقام بأنواعها.. بس فيه نوع تانى من البيانات فى لغة البايثون وفى كل اللغات اسمه string وأختصارته str , وده أى حاجة تتكتب بين علامتين تنصيص من نوع single quotes او double quotes

```
>>> x = "Hello world"
>>> type(x)
<class 'str'>
>>> type('Hi')
<class 'str'>
>>> 'hi'
'hi'
>>> hi
NameError: name 'hi' is not defined
>>>
```

النص لازم يتكتب بين علامات ' ' أو " " لو كتبت النص من غير العلامات هيحصل إرور وهيقولك not defined لأنه بالشكل ده أفنكره identifier لأى متغير أو دالة أنت عرفتتها.. فدور فى المتغيرات وملقوش فحصل الـ error.

```
>>> x = 5
>>> y = '5'
>>> type(x)
<class 'int'>
>>> type(y)
<class 'str'>

>>> x + y
TypeError: unsupported operand
type(s) for +: 'int' and 'str'

>>> x + int(y)
10
>>> str(x) + y
'55'
```

هنا عرفنا متغيرين الاول x نوعه int والثانى y ونوعه str

بعدين حاولت أجمع x مع y فحصل error لأنهم من نوعين داتا مختلفين.

فكان الحل.. إنك تحول المتغير y إلى متغير عددى وتبقى عملية حسابية.

أو تحول x إلى متغير نصى وتبقى عملية دمج بين نصين وخطهم جنب بعض.



## النص متعدد السطور Multi-Line String

لو عاوز نص فيه أكثر من سطر علامتين quote مينفعوش.. لازم خط النص بين 3 علامات  
..single quote /double quote

<pre>&gt;&gt;&gt; x = '''Hello World''' &gt;&gt;&gt; x 'Hello\nWorld' &gt;&gt;&gt; print(x) Hello World</pre>	<pre>&gt;&gt;&gt; x="""1 2 3""" &gt;&gt;&gt; x '1\n2\n3' &gt;&gt;&gt; print(x) 1 2 3</pre>
---	--

- خلى بالك لما كتبت اسم المتغير جابلك شكل النص المتخزن فى اليمورى وياريت تكون ملاحظ إن العلامة \n تعبر عن سطر جديد..والعلامات دى اسمها **escape character** وهى حروف ليها استخدامات مختلفة داخل النصوص هتكلم عليها الفقرة الجاية.
- لما عملت print للمتغير ظهرت السطور.

## الحروف الخفية escape character

مش عارف أضربلها ترجمة بالعربى 🇸🇦 بس الحروف الخفية وصف مناسب ليها لأنها حروف بتتكتب فى النص بعد علامة \ slash ومش بتتنطع non printable لكنها بتأدى وظيفة تانية.



```
>>> x = "Hello\nWorld"
>>> x
'Hello\nWorld'
>>> print(x)
Hello
World
```

```
>>> x = "Hello\tWorld"
>>> x
'Hello\tWorld'
>>> print(x)
Hello    World
```

- الحرف الأهم هو `\n` وده بيكتب الكلام اللي بعده فى سطر جديد.
  - لاحظ على الشمال .. لما كتبنا كلمة `Hello\nWorld` والحرف `\n` متطبعش لما عملت `print` ولكنه خلى اللي بعده يظهر فى سطر جديد.
  - تانى حرف `\t` بيعمل `tab` او بيدى مسافة بين اللي قبله واللى بعده..
- أنت عارف إننا بنكتب النص بين علامات `double/single quotes`.. طيب لو عاوز نكتب علامة منهم جوة النص هيحصل ايه؟! 😊

```
>>> x = "Hello"world"
SyntaxError: invalid syntax
>>> x = 'Hello'world'
SyntaxError: invalid syntax
```

فى الحالة دى "Hello"world" لما شاف `double quote` أفكر إنك قفلت النص بيها وإن نهايته كلمة `Hello` , واللى بعدها ده حاجة غير معروفة فحصل إيرون..



الحل إنك تخط قبل الـ quote علامة slash فتكتبها كده \"

أو حل تاني لو عاوز تخط single quote جوة النص..حطه بين double quotes والعكس.

```
>>> x = "Hello\"world"
>>> x
'Hello"world'
>>> x = "Hello'world"
>>> x
Hello'world
```

باقى الحروف الخفية أو تقدر تشوفهم من هنا [strings](#)

Escape Sequence	Meaning
<code>\newline</code>	Ignored
<code>\\</code>	Backslash (\)
<code>\'</code>	Single quote (')
<code>\"</code>	Double quote (")
<code>\a</code>	ASCII Bell (BEL)
<code>\b</code>	ASCII Backspace (BS)
<code>\f</code>	ASCII Formfeed (FF)
<code>\n</code>	ASCII Linefeed (LF)
<code>\r</code>	ASCII Carriage Return (CR)
<code>\t</code>	ASCII Horizontal Tab (TAB)
<code>\v</code>	ASCII Vertical Tab (VT)
<code>\ooo</code>	ASCII character with octal value <i>ooo</i>
<code>\xhh...</code>	ASCII character with hex value <i>hh...</i>

أغلب الحروف الخفية مش هتعرف تشوف بيعملوا أيه في برنامج IDLE لازم تفتح البايثون في

الـ command line.



## العمليات على النصوص String Operation.

شوفنا العمليات على الأرقام زي العمليات الحسابية وغيرها.. النصوص برده بتدعم بعض العمليات..

### دمج النصوص Concatenation

- المعامل + يدمج نصين أو أكثر بحيث النص الأول جنب الثاني.
  - لازم يكون المتغيرين X و Y من نفس النوع str عشان ميحصلش خطأ.
- ```
>>> x = "Hello"
>>> y = "World"
>>> z = x + y
>>> z
'HelloWorld'
```

### تكرار النص Repetition

- علامة \* الضرب بتكرر النص عدد من المرات
  - السطر الثاني مثال للدمج والتكرار..
- ```
>>> x * 3
'HelloHelloHello'
>>> x * 2 + " : " + y * 2
'HelloHello : WorldWorld'
```

### أقتطاع النص Slicing

- لغة البايثون بتتعامل مع النص كمصوفة مكونة من حروف كل حرف ليه index أو

H	E	L	L	O
0	1	2	3	4

- رقم والترتيب بيبدأ من صفر..مثلاً كلمة Hello ده شكل
- الـ index بتاع كل حرف فيها.



```
>>> x
'Hello'
>>> x[0] # رجع الحرف الأول
'H'
>>> x[0:2] # من الحرف الاول خذ حرفين
'He'
>>> x[3:] # خذ من الحرف الرابع للأخر
'lo'
```

- عشان ترجع حرف من النص بتكتب اسم المتغير النصى وبعده أقواس مربعة وجواه الـindex بتاع الحرف. `str[index]`

- لو عاوز ترجع جزء معين بتكتب بداية الجزء ده وعدد الحروف اللى هتاخده بداية منه `.str[index:length]`

### أدخال متغيرات داخل النص Format

هتشوف قدام أهمية الموضوع ده ممكن متحساش دلوقتى .. بس لو عندك نص عاوز تدخل جواه قيمة متغير عندك حلين :

- الأول تعمل concatenation بأنك تخط جزئى من النص وبعدين علامة + وبعدين المتغير وبعدين + وبعدين باقى النص

- مثلاً عاوز أدخل قيمة المتغير x داخل جملة `the number is .. students` فهيكون

```
>>> x = 120
>>> "the number is " + str(x) + " student"
'the number is 120 student'
```

بالشكل ده.

- بس شايف استخدمنا كام علامة تنصيب ودالة `str` اللى تحول المتغير الرقمى إلى نصى عشان ينفج بتجمع مع النص..الموضوع رخم بعض الشئ..
- الحل التانى تستخدم الـ `formatting operator` .. كل اللى هتعمله إنك تهتط المعامل `%s` جوه النص فى المكان اللى عاوز تدخل بعد قيمة المتغير.



- وبعده علامة **quote** اللي بتقفل النص خط علامة % والمتغيرات بعدد وترتيب علامات %S اللي حطتهم جوة النص.

```
>>> x = 120
>>> "the number is %s students"%x
'the number is 120 students'
>>> name,age,phone='Mahmoud',23,'011'
>>> x="Name : %s\nAge : %s\nPhone : %s"%(name,age,phone)
>>> print(x)
Name : Mahmoud
Age : 23
Phone : 011
```

## دوال النصوص String functions

لغة البايثون فيها دوال مهمة للعمل على النصوص هشرح بعضها وأوضح بتعمل إيه

<pre>&gt;&gt;&gt; x = "Pink Python" &gt;&gt;&gt; len(x) 11</pre>	<p>دالة len بتجيب طول النص أو عدد حروفه. هنا الدالة أعتبرت المسافة الفاصية حرف.</p>
<pre>&gt;&gt;&gt; x.upper() 'PINK PYTHON' &gt;&gt;&gt; x 'Pink Python' &gt;&gt;&gt; x = x.upper() &gt;&gt;&gt; x 'PINK PYTHON' &gt;&gt;&gt; x.lower() 'pink python' &gt;&gt;&gt; x 'PINK PYTHON'</pre>	<p>دالة upper بتحول النص إلى حروف كبيرة capital . ودالة lower بتحولها لحواف صغيرة small . خلي بالك دالة upper أو lower لو طبقتها على متغير نصي بترجع نسخة من النص اللي في المتغير مش بتعدل على المتغير نفسه. لو عاوز أحول قيمة المتغير نفسه لازم أعمله assignment بالقيمة اللي بترجعها الدالة var = var.upper()</p>



<pre>&gt;&gt;&gt; x 'PINK PYTHON' &gt;&gt;&gt; x.find('k') -1 &gt;&gt;&gt; x.find('K') 3</pre>	<p>دالة find بتاخذ برامتر واحد و هو الحرف أو الكلمة اللي عاوزين ندور عليها في النص وبترجع الـ index بتاع الحرف لو موجود..ولو مش موجود بترجع -1.</p> <p>في الاول هنا الدالة رجعت 1-عشان k مش موجود لكن الحرف الموجود هو K كابتال.</p>
<pre>&gt;&gt;&gt; x 'PINK PYTHON' &gt;&gt;&gt; x.startswith('P') True &gt;&gt;&gt; x.endswith('n') False &gt;&gt;&gt; x.endswith('N') True &gt;&gt;&gt; x.endswith('PYTHOn') False &gt;&gt;&gt; x.endswith('PYTHON') True</pre>	<p>دالة startswith بتاخذ برامتر واحد وهو الحرف أو الكلمة اللي عاوزين نعرف إذا كان النص يبدأ بيها.. وبترجع True أو False.</p> <p>دالة endswith بتشوف إذا كان النص بينتهي بحرف او كلمة.</p>

وبرده لو عاوز تعرف أكثر عن النصوص تقدر تكمل من هنا الموقع الرسمي من هنا [string](#)





## المصفوفات Arrays

في أي لغة برمجة المصفوفة هي مجموعة من العناصر أو القيم التي من نفس النوع أو من أنواع data types مختلفة يتم تخزينهم جنب بعض في الميموري باسم او identifier واحد ويتم أسترجاع كل عنصر بترتيبه أو الـ index بتاعه في المصفوفة.

في لغة البايثون بتختفى كلمة مصفوفة أو array وبيظهر أكثر مصطلح أو نوع لسلاسل البيانات أو الـ data sequence ليهم نفس الفكرة... وهنتكلم عن الأنواع المشهورة زي list و tuple و dictionary.

### الليسته List

الـ list ده نوع من البيانات بيتيح ليك إنك تخزن أكثر من قيمة أو عنصر من نوع واحد أو أنواع مختلفة.

طريقة تعريفها List\_name = [data , data , data] حيث data ممكن يكون قيمة رقمية number أو string أو bool أو أي object في اللغة.

<pre>&gt;&gt;&gt; x = [1, 'Hi', True] &gt;&gt;&gt; type(x) &lt;class 'list'&gt;</pre>	<p>هنا عرفنا list اسمها x فيها 3 عناصر مختلفة.</p>
<pre>&gt;&gt;&gt; x[0] 1 &gt;&gt;&gt; x[1] 'Hi' &gt;&gt;&gt; x[2] True</pre>	<p>عشان تطلع عنصر من الـ list بيكون كده list_name[index]. وخلي بالك إن الـ index بيبدأ من 0 مش 1 مثلاً عشان تطلع العنصر الأول الإنديكس بتاعه 0 والعنصر التاني 1 وهكذا..</p>



<pre>&gt;&gt;&gt; x = [0,1,2,3,4,5] &gt;&gt;&gt; x[0:1] [0] &gt;&gt;&gt; x[0:3] [0, 1, 2] &gt;&gt;&gt; x[1:3] [1, 2] &gt;&gt;&gt; x[3:5] [3, 4] &gt;&gt;&gt; x[1:4] [1, 2, 3]</pre>	<p>عشان نطلع عدد محدد من العناصر بيكون بالشكل ده  <code>List_name[start:start+length]</code></p> <p>مثلا في الليسته دي <code>[0, 1, 2, 3, 4, 5]</code> عاوز أطلع  العناصر 1 و 2 و 3.. إنديكس العنصر 1 هو البداية 1 و عدد  العناصر 3 يبقى النهاية عند <math>4 = 3 + 1</math>  <code>x[1:4]</code></p>
<pre>&gt;&gt;&gt; y = ['a','b','c'] &gt;&gt;&gt; x = [1,True,y] &gt;&gt;&gt; x [1, True, ['a', 'b', 'c']] &gt;&gt;&gt; x[2] ['a', 'b', 'c'] &gt;&gt;&gt; x[2][0] 'a' &gt;&gt;&gt; type(x[2]) &lt;class 'list'&gt;</pre>	<p>مكن العنصر اللي في الـ <code>List</code> برده يكون <code>.list</code>.  هنا <code>y</code> ليستة فيها 3 عناصر.. حطينا <code>y</code>  كعنصر في الليسته <code>x</code>.</p> <p>عشان نطلع العنصر الأول (إنديكس 0) من الليسته  الداخلية اللي إنديكي بتاعها 2 في <code>x</code> بالشكل ده  <code>x[2][0]</code></p> <p>كان مكن نطلع الليسته الداخلية في متغير  <code>xx=x[2]</code> وبعدين نطلع العنصر من المتغير الجديد.  <code>xx[0]</code></p>

## بعض الدوال على الليستات

<pre>&gt;&gt;&gt; x = [1,2,4,-2,4,1,5] &gt;&gt;&gt; len(x) 7 &gt;&gt;&gt; max(x) 5 &gt;&gt;&gt; min(x) -2</pre>	<p>دالة <code>len</code> بتحسب عدد العناصر.  دالة <code>max</code> بتطلع أكبر عنصر  دالة <code>min</code> بتطلع أصغر عنصر.</p>
<pre>&gt;&gt;&gt; x.append(10) &gt;&gt;&gt; x [1, 2, 4, -2, 4, 1, 5, 10]</pre>	<p>دالة <code>append</code> بتضيف  عنصر في آخر الليسته.</p>



<pre>&gt;&gt;&gt; x [1, 2, 4, -2, 4, 1, 5, 10] &gt;&gt;&gt; x.insert(0,-5) &gt;&gt;&gt; x [-5, 1, 2, 4, -2, 4, 1, 5, 10] &gt;&gt;&gt; x.insert(4,-9) &gt;&gt;&gt; x [-5, 1, 2, 4, -9, -2, 4, 1, 5, 10]</pre>	<p>دالة <code>insert</code> بتضيف عنصر في إندكس معين في الليسته. بتاخذ برامترين الأول الإندكس اللي هضيف فيه..والتانى العنصر اللي هضيفه.</p>
<pre>&gt;&gt;&gt; x.reverse() &gt;&gt;&gt; x [10, 5, 1, 4, -2, -5, 4, 2, 1, -5]</pre>	<p>دالة <code>reverse</code> بتعكس ترتيب عناصر الليسته.</p>
<pre>&gt;&gt;&gt; x.sort() &gt;&gt;&gt; x [-5, -5, -2, 1, 1, 2, 4, 4, 5, 10] &gt;&gt;&gt; x.sort(reverse=True) &gt;&gt;&gt; x [10, 5, 4, 4, 2, 1, 1, -2, -5, -5]</pre>	<p>دالة <code>sort</code> بتعمل ترتيب تصاعدي لعناصر الليسته. لو عاوزها تعمل ترتيب تنازلي بتديها برامتر <code>sort(reverse=True)</code></p>
<pre>&gt;&gt;&gt; x [10, 5, 4, 4, 2, 1, 1, -2, -5, -5] &gt;&gt;&gt; x.index(2) 4</pre>	<p>دالة <code>index</code> بتاخذ برامتر بالعنصر وبترجع مكانه في الليسته.</p>
<pre>&gt;&gt;&gt; x [10, 5, 4, 4, 2, 1, 1, -2, -5, -5] &gt;&gt;&gt; x.count(-5) 2</pre>	<p>دالة <code>count</code> بترجع مرات تكرار العنصر في الليسته.</p>



## الصفوف tuples

النوع الثاني من المصفوفات وهو شبيه بالـ list ويسمى tuples ويوجد أكثر من فرق بينه وبين الليست..

- طريقة تعريف الـ list باستخدام أقواس مربعة

```
list_name = [data,data,data]
```

- طريقة تعريف الـ tuples باستخدام أقواس دائرية

```
tuple_name = (data,data,data)
```

- طريقة استخراج الداتا من الـ list و tuple واحده

```
list_name [index]
tuple_name [index]
```

يعنى الفرق فى الشكل بس 🤔؟! لا العناصر فى الـ tuples غير قابلة للتعديل يعنى بعد ما تعرفها متقدرش تعدل عليها.

```
>>> x = [1,2,3]
>>> y = (1,2,3)
>>> type(x)
<class 'list'>
>>> type(y)
<class 'tuple'>
>>> x
[1, 2, 3]
```



```
>>> x[0]=-1
>>> x
[-1, 2, 3]
>>> y
(1, 2, 3)
>>> y[0]=-1
TypeError: 'tuple' object does not support item assignment
```

## القاموس Dictionary

النوع الثالث هو الـ dictionary أو يمكن تقوله عليه القاموس .. مثل مجرد مجموعة عناصر مرصوصة جنب بعض وتقدر توصلهم عن طريق الـ index ولكن هنا كل عنصر له اسم تقدر توصله من خلاله.

طريقة التعريف..لاحظ بنستخدم أقواس مجموعة أو curly brackets { }

```
dict_name = { key1 : value , key2 : value , key3 : value }
```

وعشان أطلع الـ value المقابلة لك key معين بالشكل ده.

```
dict_name['key_name']
```



ودي أمثلة على استخدام الـ dicts.

```
>>> x = {'name': 'Mahmoud', 'age': 23, 'country': 'Egypt'}
>>> type(x)
<class 'dict'>
>>> x['name']
'Mahmoud'
>>> x['age']
23
>>> x['country']
'Egypt'
>>> x[0]
KeyError: 0
>>> x['Age']
KeyError: 'Age'
```

- لاحظنا في الأمر الأخير حاولنا نستخرج قيمة المفتاح Age ونتج عنها إررور KeyError لأن الـ key متسجل باسم age اول حرف small وده نفس الحال لما تستدعي متغيرات عادية لأن اللغة case sensitive.

```
>>> x = {'color1': 'red',
'color2': 'green', 'color3': 'blue'}
>>> x['color1']
'red'
>>> x.get('color1')
'red'
```

عشان تطلع value من الـ dict اما عن طريق الأقواس المربعة او عن طريق دالة .get  
dict.get('key')  
dict['key']

```
>>> x['color3'] = 'yellow'
>>> x
{'color1': 'red', 'color2': 'green', 'color3': 'yellow'}
```

عشان حُدث قيمة value في الـ dict بتعملها assignment بالـ key عادي



<pre>&gt;&gt;&gt; x['color4']='orange' &gt;&gt;&gt; x {'color1': 'red', 'color2': 'green', 'color3': 'yellow', 'color4': 'orange'}</pre>	<p>عشان تضيف key و value جداد في الـ dict بتعمل برده assignment ولو الـ key مش موجود هيضيفه ولو موجود هيحدث قيمه.</p>
<pre>&gt;&gt;&gt; x.pop('color4') 'orange' &gt;&gt;&gt; x.pop('color3') 'yellow' &gt;&gt;&gt; x {'color1': 'red', 'color2': 'green'}</pre>	<p>عشان نسمح key من الـ dict بتستخدم دالة pop اللي بتاخذ برامتر باسم الـ key</p>
<pre>&gt;&gt;&gt; 'color1' in x True &gt;&gt;&gt; 'color3' in x False</pre>	<p>عشان نتأكد إن الـ key موجود في الـ dict بتستخدم الامر in اللي بيرجع True أو False.</p>
<pre>&gt;&gt;&gt; list(x.keys()) ['color1', 'color2'] &gt;&gt;&gt; list(x.values()) ['red', 'green']</pre>	<p>عشان نطلع كل الـ key او الـ values من الـ dict بنستخدم الداول keys () و values ().. وطبعاً الدالة list بتخزن القيم دى في لسته</p>

وتقدر من هنا تعرف أكثر عن المصفوفات او الـ [data structures](#) في لغة البايثون.



## التعليقات Comments

في أي لغة برمجة.. التعليق ده كلام أنت بتكتبه في الكود عشان تشرح الأمر أو الجزء ده وظيفته أيه ولكنه لا يعتبر جزء من الكود بتاعك او الـ interpreter مش بيشفه.  
و في لغة البايثون فيه نوعين من التعليقات.

- تعليقات داخل السطر وهو أي كود خط قدامه علامة شبك # hash

```
# single line comment
```

- النوع الثاني تعليق متعدد الأسطر وده بتحوله الكود أو الكلام اللي عاوز تخليه تعليق لنص string بأنك خط الكود بين 3 علامات single/double quotes والمفسر لما يشوفه مش هيعمله حاجة.

```
'''
comment1
Comment2
Comment3
Comment..
'''
```

```
"""
comment1
Comment2
Comment3
Comment..
"""
```





السكربت ده بيوضحلك طريقة عمل كومنت سطر واحد ومتعدد الأسطر وكومنت جوة السطر .. وطبعاً الكلام اللى ملون بالأحمر دى هى الكومنتات واللى مش هيشوفها الإنترنت.

<pre>#Hi! I'm A comment. #the Interpreter will not see me ^_^  print(1) #print(2) print(3); print(4); #print(5)  #for Multiline comment #Turn it to a string  ''' print('you') print("can't") print('see') print('Me :3') '''</pre>	<p>لما تعمل run للكود ده الخرج هيكون كده</p> <p>1</p> <p>3</p> <p>4</p>
---	---

download script [comment.py](#) from GitHub



## الدوال Functions

سمعت اكثر من مرة كلمة دالة function وشوفنا اوامر برمجية كثير قولنا عليها دوال زى الدالة اللى بتطبع حاجة على الشاشة print ودى الدال اللى أستخدمناهم مع الـ list و tuple و dict..

لو فاكرك الدالة فى الرياضة..فهى حاجة بتاخذ معطيات inputs وبتنفذ عليها علاقة معينة وتطلع الخرج output.

فى لغة البايثون أو أى لغة برمجة..الدالة بتاخذ معطيات (متغيرات / قيم / data) وبتنفذ عليهم كود معين وترجع أو مترجعش نتيجة حسب نوع الدالة دى .

الدوال اللى بتتعامل معاها فى اى لغة برمجة نوعين.

- النوع الثانى اللى هنتكلم عنه بعدين اسمها user defined functions يعنى أنت اللى بتعملها وهنعرف بتعملها ليه و ازاي..
  - النوع الأول بقى مش أنت اللى بتعملها ويادوب بتستخدمها عشان تنفذ بيها أوامر معينة والدوال دى اسمها built-in أو دوال تابعة للغة نفسها زى دالة print و min و max و len و type
  - الدوال دى معملاش حاجة غير إننا أستخدامناها بعتنا ليها داتا ونفذت عليها أوامر معينة..ومنعرفش الدالة دى عملت كده ازاي وميهمناش غير النتيجة بتاعتها.
- وهنا جدول وبكل الدوال الـ [built-in functions](#) التابعين للغة البايثون تقدر تشوفهم وهتعرف إنك أستخدمت عدد كبير منهم لحد الآن.



- يمكن تكون لاحظت إن فيه دوال بقدر أستخدمها على طول ودوال تانيه تابعة لمتغيرات أو datatypes معينة.. مثلاً عندي ليستة x عشان أشوف عدد عناصرها بستخدم دالة len(x) وبديها اسم الليستة.  
 >>> x = [1,2,3]  
 >>> len(x) 3  
 >>> x.reverse()  
 >>> x  
 [3, 2, 1]  
 ولو علوز أعملها reverse بكتب x.reverse() طيب أيه الفرق 😊؟

- دالة len من الدوال built-in functions بتقدر توصلها بشكل مباشر مش تابعه لأي مودول أو كلاس.
- أما دالة reverse مثلاً دي تابعة للمتغير x وهنا حسب الأحدث وأقولك إن x مش متغير عادي , ده اسمه object أو كائن لك class اسمها List.
- والكلاس دي مجموعة من الدوال والمتغيرات بتنفذ وظائف معينة ودوال الكلاس List دي أتعاملنا مع بعضها في الجزء بتاع الـ list زي count و index و pop و append وعشان توصل للدوال بيكون عن طريق الـ object أو المتغير اللي بيمثل الكلاس دي وهو الليستة اللي أنت عملتها.

## استخدام الدوال call function

- لما تستخدم أي دالة أيأ كان نوعها ده اسمه أنك بتعملها استدعاء call.. وعشان تستدعي الدالة دي بتكتب اسمها متبوعاً بأقواس بداخلها الداتا أو المعطيات اللي هتبعثها للدالة واللي بييسموها arguments وبتبقى متغيرات أو قيم مفصول بينها ب comma.
- فيه دوال بترجع نتيجة return type فمممكن تاخد الخرج بتاعها في متغير وفيه دوال مش بترجع حاجة مثلاً زي دالة print.



```
function_name(arg1, arg2, arg...)
```

```
variable=function_name(arg1, arg2, arg...)
```

```
>>> x = print("Hello")
Hello
>>> x
```

هنا الدالة print أخذ argument عبارة عن نص وطبعته على الشاشة ومرجعتش حاجة في المتغير x .

```
>>> x = len("Hello")
>>> x
5
```

هنا الدالة len أخذت argument قيمة نصية ورجعت عدد حروفها في متغير x

- بالنسبة للمتغيرات اللي بتمررها للدوال وقولنا أنها تسمى arguments ويمكن تسمع ليها مسمى parameter وده المتغير اللي بيكون في تعريف الدالة نفسها وهتعرف ده اكثر لما أشرحلك الدوال user defined functions .. المهم أى قيم أو متغيرات هنديها للدوال هسميها برامترز للتبسيط 🤪.



## دوال الإدخال والاخراج Input and Output

تتمكن وانت وبتتعامل مع الـ interpreter التفاعلي بتكتب أى حاجة وبيطلعك الناتج او بتكتب اسم المتغير فيظهر قدامك على الشاشة ومفيش مشاكل... لكن لو بتكتب سكريبت إنت مش متفاعل مع الـ interpreter ومحتاج تطبع على الشاشة قيم المتغيرات والنواتج اللي بيطلعها الكود بتاعك فبتحتاج دوال المخرجات output زي دالة print

```
#دالة print
print('Hi') #بتطبع نصوص
print(123) #أرقام

x = [1,2,3]
print(x) #list
y = {'day1':'sat','day2':'sun'}
print(y) #dict

name = "Mahmoud" #متغير نصي
#عشان نطبع نص جنب المتغير
#خلي المتغير برامتر تاني في الدالة
print("1-My Name is:",name)

#أو نعمل دمج بين النص والمتغير النصي بعلامة +
print("2-My Name is:"+name)
age = 23 #متغير عددي
#ينفع نمرره كبرامتر تاني وهيتطبع جنب النص
print("3-My Age is:",age)
#أو نستخدم المعامل %
print("4-My Age is: %s"%age)
#مينفعش ندمج بين متغير نصي و متغير عددي وهيطلع ابرور#
print("4-My Name is:"+age)
```

```
Hi
123
[1, 2, 3]
{'day1': 'sat', 'day2':
'sun'}
1-My Name is: Mahmoud
2-My Name is:Mahmoud
3-My Age is: 23
4-My Age is: 23
Traceback (most recent call
last):
print("4-My Name is:"+age)
TypeError: must be str, not
int
```

Download script [print.py](#) from GitHub



## دالة الإدخال input

لحد الآن احنا بنكتب كل القيم والمدخلات بتاعتنا في الكود ونعمل run فتشغل.. عاوزين أثناء تشغيل البرنامج المستخدم هو اللي يدخل القيم وهو يخرنها في متغيرات ويعمل عليها علمياته ومعالجاته ويطبعتها... وده بيتم بدالة اسمه input وشكلها بيكون كده..

دالة input بتاخذ برامتر واحد وهو الرسالة اللي هيعرضها للمستخدم مثلاً تقوله أكتب نص معين .. وبعدين هترجع القيمة اللي هيكتبها المستخدم ويدوس enter على شكل متغير نصي str وخلي بالك من نوع المتغير..

```
var=input ()
var=input ('Message')
```

ده مثال على استخدام دالة input ..

```
>>> x = input()
Hi
>>> print(x)
Hi
>>> x = input('write something : ')
write something : Hello ^_^
>>> print(x)
Hello ^_^
```

- في ملاحظة مهمة لازم تعرفها على دالة input.. إن القيمة اللي بترجعها بتبقى على شكل نص string حتى لو اللي دخلته كان رقم.
- النقطة دي تفرق معاك لو عاوز تستخدم المدخل ده في عملية حسابية فلازم تحولته إلى متغير عددي int او float..



```
>>> x=input('Enter A number : ')
Enter A number : 10
>>> type(x)
<class 'str'>
>>> x + 5
TypeError: must be str, not int
>>> int(x) + 5
15
```

تعالو نستفيد بدالة الإدخال input ودالة الاخراج print ونعمل سكربت آله حاسبة بسيط  
يطلب من اليوزر إنه يدخل الرقم الاول ويدخل الرقم التانى وبعدين ينفذ عليهم العمليات  
الحسابيه .

<pre>print("HI ^_^")  #أدخل الرقم الأول num1 = input("Enter The First Number : ") #هحول المتغير النصي إلى عددي num1 = float(num1)  #أدخل الرقم الثاني #واحوله إلى متغير عددي في نفس السطر num2 = float(input("Enter The Second Number : "))  #بنفذ على المتغيرين العمليات الحسابية print("num1 + num2 = " + str(num1 + num2)) print("num1 - num2 = " + str(num1 - num2)) print("num1 * num2 = " + str(num1 * num2)) print("num1 / num2 = " + str(num1 / num2))</pre>	<pre>HI ^_^ Enter The First Number : 20 Enter The Second Number : 5 num1 + num2 = 25.0 num1 - num2 = 15.0 num1 * num2 = 100.0 num1 / num2 = 4.0</pre>
--	---

Download [input\\_output.py](#) from GitHub



## دوال المستخدم User Defined Functions

شغالين من بدرى بنتكلم عن الدوال وعرفنا إن فيه دوال built in functions دى تابعة للـ interpreter بتاع اللغة وأتكتبت معاه..منعرفش الكود اللى جواها بيعمل ايه بس يهمننا نعرف اسمها ونعرف نستخدمها ازاي.

فى نوع نوع تانى أحنا بنعمله وبنحدد اسمه والبرامترات بتاعته ونعرف بنعمله ليه..

تعريف الدالة : هى عبارة عن مجموعة من الجمل البرمجية يتم تنفيذها فقط عندما يتم استدعاءها..ويمكن استدعاء فى أى موضع من الكود.

هوضحك معنى التعريف ده قدام شوية بس تعالى نشوف أزي بنعمل الدوال.

### تعريف الدالة Function definition.

```
def name(parameter1, parameter2,parameter n):
    code...
    code...
```

- بتستخدم كلمة def عشان تقول للـ interpreter إن اللى هتشوفه بعد كده دى دالة.
- اسم الدالة تنطبق عليه مواصفات الـ identifier انه مينفعش يكون فيه رمز أو يبدأ برقم وميكونش تبع الـ keywords زى ما عرفنا فى المتغيرات.
- والبرامترات دى الأماكن اللى هممر قيم ومتغيرات للدالة من خلالها.
- بعد ما أقفل الكود بخط علامة colon دى بتعرف للـ interpreter إن اللى جاي هو بلوك من الكود تابع للدالة دى.





## البلوكات Code Blocks.

قولنا الدالة لما أستدعيها بتنفيذ مجموعة من الجمل البرمجية وعشان المفسر يعرف إن الأكواد دي خاصة بالدالة بتاعتنا بتتحط بنظام محدد اسمه block.

شكل الـ block بيختلف من لغة برمجة لتانية .. مثلاً اللغات عائلة الـ c/c++ بيستخدموا أقواس المجموعة curly brackets وفيه لغات تانية بتستخدم جملة start في الأول وبعدين الأكواد بتاعة البلوك وبعدين جملة end وهكذا.. لو عاوز تعرف أكثر عن البلوكات

من هنا [Block \(programming\)](#).

لغة البايثون اللي تهمننا دلوقتى بتستخدم طريقة الـ line indent ... يعنى المسافة من بداية السطر ... بأختصار مجموعة الجمل البرمجية اللي عاوز أخليها في بلوك جليها على محاذاة واحدة بمسافة ثابتة عن بداية السطر والموضوع ده مهم.

تعالى ناخد مثال عشان متوهش.. هنعمل سكربت ونعرف فيه دالة اسمها xx عاوزينها تطبع الأرقام من 1 الى 5

```
def xx():
    print(1)
    print(2)
    print(3)
    print(4)
    print(5)
```

جمل print الخمسة هم البلوك بتاع الدالة xx لو عملت run للكواد على كده مش هيظهر حاجة لازم تستدعى الدالة باسمها.

xx ()



<pre>def xx():     print(1)     print(2)     print(3)     print(4)     print(5) xx()</pre>	<pre>1 2 3 4 5</pre>
--	----------------------

<pre>def xx():     print(1)     print(2)     print(3)     print(4)     print(5) xx()</pre>	<p>لو جملة وحده في الكود مكننتش بنفس محاذاة البلوك هيحصل .error</p>
--	---

<pre>xx()  def xx():     print(1)     print(2)     print(3)     print(4)     print(5)</pre>	<p>لو عملت call للدالة قبل ماتعرفها هيطلعك undefined error لأن للحظة دي الـ interpreter مبيعرفش يعني ايه xx</p> <p><b>NameError: name 'xx' is not defined</b></p>
---	---



من مميزات الدوال إنها بتخلي الكود reusable يعني هيكون عندك أكثر من جملة برمجية بدل ما تكتبهم أكثر من مرة في السكريبت والكود يطول. هتخطهم في دالة وتقدر تستدعي الدالة دي في أى وقت وده الهدف الأهم من استخدام الدوال.

```
def xx():
    print(1)
    print(2)
    print(3)
    print(4)
    print(5)

print('call xx')
xx()
print('call again')
xx()
print('and again')
xx()
```

```
call xx
1
2
3
4
5
call again
1
2
3
4
5
and again
1
2
3
4
5
```

## الدوال اللي بترجع قيم return type

فاكر دوال max و len كانوا بيرجعوا قيم نقدر نخزنها في متغير.. ونفس الكلام مع الدوال اللي بنعرفها نقدر نخليها ترجع قيمة و نخزنها في متغير. والنوع ده اسمه return type يعني دالة بترجع نتيجة.. الفرق الوحيد إنك في نهاية البلوك بتضيف كلمة return وقدامها المتغير أو القيمة اللي عاوز الدالة ترجعها.

```
def name(parameter1, parameter2, parameter n):
    code...
    code...
    return variable...
```



ده مثال على دالة اسمها add الدالة بتاخد برامتين num1 و num2 وتجمعهم وترجع مجموعهم ونقدر نخزن مجموعهم في متغير.

```
def add(num1, num2):
    result = num1 + num2
    return result

x = add(5, 6)
print(x)

y = add(10, 30)
print(y)

print(add(100, 300))
```

هنا عرفنا دالة اسمها add بتاخد برامتين num1 و num2 وتجمع المتغيرين وتخزنهم في المتغير result وترجع قيمة المتغير ده.

```
11
40
400
>>>
```

Download script [functions1.py](#) from GitHub

- لاحظ أهمية جملة return في اخر بلوك الدالة هي اللي بتخلي الدالة ترجع قيمة المتغير result واللى هو مجموع الرقمين.
- دالة print() مش شرط البرامترات بتاعتها تكون قيم أو متغيرات بس ممكن تكون داول من نوع return type ولما خطها كبرمتر جوه الدالة ، هيتعمل call للدالة وتنفذ وترجع الـ result ويتم طباعته بدالة print عادى جداً.



من الملاحظات اللى لازم تعرفها وانت وبتمرر متغيرات للدالة كـ parameters لغة البايثون بتديك أوبشنين لترتيب البرامترات دى.

- الأول إنه يكون ترتيبها فى التعريف وتسمى parameters هو ترتيبها فى الاستدعاء وتسمى arguments من الآخر يعنى المتغير قيمته هتروح للبرامتر المقابل ليه وده شئ بديهى ومعروف.

```
def name(par1, par2, par3, par4) :
    code...

name(arg1, arg2, arg3, arg4)
```

أدينى ملونك الـ argument و الـ parameters ومزيطك 🍷 عشان تعرف إن كل قيمة هتروح للمتغير المقابل وه شئ عادى ومتوقع.

- الطريقة الثانية إنك فى الاستدعاء تحدد البرامتر اللى عاوز تبعته قيمة ومث لازم بالترتيب كمان

```
def name(par1, par2, ..) :
    code...

name(par1=arg1, par2=arg2, ..)
```

شوف المثال ده هيوضحلك الفرق فى الطريقتين



```
def xx(x, y, z):
    print("x = %s , y = %s , z = %s" % (x, y, z))
```

```
x=1
y=2
z=3
```

```
xx(x, y, z)
xx(x=x, y=x, z=x)
xx(z, y, x)
xx(z=z, y=y, x=x)
```

```
x = 1 , y = 2 , z = 3
x = 1 , y = 1 , z = 1
x = 3 , y = 2 , z = 1
x = 1 , y = 2 , z = 3
```

Download script [functions2.py](#) from GitHub

المثال ده فيه أكثر من فكرة لازم تخلى بالك منهم.

- المتغيرات x,y,z اللى برة الدالة مالهمش علاقة بالبرامترات x,y,z اللى جواها والفقرة الجاية هنعرف الفرق بينهم.
- أول استدعاء للدالة xx(x,y,z) كل متغير هنتمر القيمة بتاعتها للبرامتر المقابل xx(1,2,3) فالـ interpreter هيشوفها كده (xx(x=1,y=2,z=3) مفيش مشاكل..
- تانى استدعاء xx(x=x,y=x,z=x) اللى لونهم احمر دول البرامترات اللى جوة الدالة. هيبقى كده xx(x=1,y=2,z=3) يعنى انا حددت على طول قيمة كل برامتر ومكنتش محتاج الأتزم بترتيب البرامترات زى ما عملت فى الاستدعاء الأخير وعملت كده xx(z=z,y=y,x=x) فكانت xx(z=3,y=2,x=1) برده قيمة x,y,z متغيرتش ومعتمدتش على الترتيب.
- اللى أنغير فى الاستدعاء التالت xx(z,y,x) اللى قيم المتغيرات فيه xx(3,2,1) فالإنترپريتر هيمرر القيم بالترتيب كل قيمة للبرامتر المقابل فهتبقى xx(x=3,y=2,z=1).



## نطاق المتغيرات Scope of Variables

شوفت في المثال اللي فات إننا عملنا متغيرات X,Y,Z ودول بره الدالة وبرامترات X,Y,Z ودول بردوا متغيرات لكن جوه الدالة.. واضح إنهم مش زى بعض.

كل متغير تعرفه في السكرت أو جوة دالة بيبقى ليه حاجة أسمها scope أو نطاق وليه life cycle دورة حياة هيعيش في الرامة قد أيه !..

لما تعرف متغير في أي مكان في السكرت

```
x = 10
```

المتغير x اسمه global variable هيفضل جوة الرامة و تقدر تستخدمه وتستدعيه من أي مكان في السكرت طول فترة تشغيل البرنامج.

طيب إيه الجديد ؟ لو المتغير ده جوة دالة function الوضع بيختلف .. المتغير ده اسمه local variable محدش بيشوفه بره الدالة..وقبل ما تعمل call للدالة المتغير ده مكنش موجود في الوجود وبمجرد ما تعمل call للدالة والكود اللي جواها يتنفذ ويخلص المتغير ده بيتمسح من الرامة.



```

x=1
y=2

def xx():
    x=3
    y=4
    print('local x = %s'%x)
    print('local y = %s'%y)

print('global x = %s'%x)
print('global y = %s'%y)
xx()
print('again global x = %s'%x)
print('again global y = %s'%y)

global x = 1
global y = 2
local x = 3
local y = 4
again global x = 1
again global y = 2
>>>

```

Download script [functions3.py](#) from GitHub

- في السكرت ده عملنا متغيرين global اسمهم x=1,y=2 . وجوة الدالة xx عملنا متغيرين local بنفس الاسم x=3,y=4 .
- خلى بالك المتغيرين x,y اللى بره global ملهمش علاقة بالمتغيرين x,y اللى جوة الدالة وأى تغيير هيحصل على الـ local مش هياثر على الـ global.
- عشان تخلى المتغيرات الـ local اللى بتحمل نفس الاسم لمتغيرات global مرتبطة ببيها بتعرف بتعرف المتغيرات الـ local اللى جوة الدالة بجملة global .

```
global var_name
```





<pre>x=1 y=2  def xx():     global x     x=3      # x become global     y=4      # y still local     print('local x = %s'%x)     print('local y = %s'%y)  print('global x = %s'%x) print('global y = %s'%y) xx() print('again global x = %s'%x) print('again global y = %s'%y)</pre>	<pre>global x = 1 global y = 2 local x = 3 local y = 4 again global x = 3 again global y = 2 &gt;&gt;&gt;</pre>
--	---

Download script [functions4.py](#) from GitHub

- لاحظ هنا لدينا المتغير x جوة الدالة بقى global والمتغير y زى ما هو local.
- لما خرينا قيمة المتغير x=3 ده غير القيمة فى المتغير الـ global .



## البرمجة الكائنية OOP

البرمجة الكائنية أو Object Oriented Programming ده عبارة عن نمط وأسلوب برمجي

بيعتمد على مفهوم الكائنات object والكلاسات (مش هترجمها فئات لا 🤪)

.classes

- الكلاس class : ده بناء برمجي فيه مجموعة من الداول وهنا تسمى methods ومتغيرات وتسمى attributes وهنشوف هنعمل بيهم أيه.

تعريف الكلاس في لغة البايثون

```
class ClassName:
    variables...
    functions()..
```

- عشان تعرف الكلاس بتستخدم كلمة class وبعدها الاسم او الـ identifier. وفي البلوك بتاعها هيكون فيه مكونات الكلاس من دوال ومتغيرات. قبل ما أعملك مثال على الكلاس لازم تعرف ان الدوال اللي فيها ليها مواصفات خاصة..
- الداول داخل الكلاس تسمى methods.
- المتغيرات داخل الكلاس تسمى class variables ودي أقدر أوصلها من أي دالة method جوة الكلاس أو من براها عن طريق object من الكلاس .



- يمكن تعريف دالة باسم `__init__()` وتسمى الـ `class constructor` ودي بتنفذ بشكل تلقائي لما تعرف `object` من الكلاس وهقولك بعد شوية يعنى ايه `object`.
- كل الدوال اللي جوة الكلاس مكن نحط ليهم برامتر مكن تسميه أى اسم وفي الغالب اسمه `self` وده بيغير عن الكلاس نفسها زى ما هتشوف.

ناخد مثال بقى ناخذ مثال 😊

```
class Animal:
    name=''
    pet=''
    prey=''
    enemy=''
    talent=''

    def __init__(self, name, pet, prey, enemy, talent):
        self.name=name
        self.pet=pet
        self.prey=prey
        self.enemy=enemy
        self.talent=talent

    def cv(self):
        cv='name:%s\nis pet:%s\nprey:%s\nenemy:%s\ntalent:%s'%(
            self.name, self.pet, self.prey, self.enemy, self.talent)
        print(cv)

    def on_danger(self):
        print(''when (%s) attacks (%s) it (%s)
            ''%(self.enemy, self.name, self.talent))
```

Download script [class1.py](#) from GitHub



- في المثال ده عملنا كلا اسمها Animal.
- الكلاس Animal فيها 5 متغيرات name , pet , prey , enemy , talent ودى صفات للحيوان اللى بنعمله بالكلاس 🐍.
- المتغيرات دول اسمهم class variables ودول أقدر أوصلهم من أى دالة جوة الكلاس زى دالة \_\_init\_\_ و cv و on\_danger.
- اول دالة فى بلوك الكلاس اسمها \_\_init\_\_ ودى الـ constructor بتاع الكلاس وبتنفذ لما نعمل كائن من الكلاس.
- أستخدمنا الدالة \_\_init\_\_ عششان kurt قيم لمتغيرات الكلاس class variables عن طريق تمرير برامترات فى الدالة \_\_init\_\_
- والمتغير self داخل كل دالة يشير للكلاس Animal نفسها.
- لو عاوز اوصل لأى متغير من class variables او أعمل call للـ class methods داخل اى دالة فى الكلاس بكتب self قبل اسمها زى كده self.name أو self.cv()
- أو ممكن اكتب اسم الكلاس نفسها Animal.name
- شوفت جوة دالة \_\_init\_\_ لما جينا ندى قيم للمتغيرات name,pet,prey كان عندنا نوعين متغيرات بنفس الاسم.. النوع الأول متغيرات محلية خاصة بالدالة \_\_init\_\_ ودول البرامترات بتوع الدالة زى name مثلاً.. والنوع التانى المتغيرات التابعة للكلاس



واسمهم class variable وبوصلهم عن طريق self أو اسم الكلاس زي

كده مثلاً `self.name`

- فيه عندنا دالتين CV دي بتطبع مواصفات الحيوان كأننا بنعمله cv ودالة on\_danger بتطبع بيعمل ايه لما enemy يهاجمه.

اللى عملناه ده دلوقتي اسمه class او قالب لعمل داتا والمتغيرات بصفات وخصائص معينة أسمها objects او كائنات.

طيب ليه سماها objects ؟ قالك إن الكائن الحى بيميزه حاجتين .. الخصائص properties والسلوك behavior ولما يتكاثر.. الكائنات اللى بينتجها بترث inherit خصائص منه وهو حب يطبقك نفس الأسلوب ده على البرمجة وهنشوف ازاي..

مثلاً الكلاس اللى عملناها Animal فيها متغيرات class variables بتحدد خصائص

الحيوان زي name,enemy,pet وفيه دوال methods بتعبر عن سلوك الحيوان

behavior ووضحتهاك أكثر بدالة on\_danger مثلاً الحيوان هيعمل ايه وقت الخطر بناءً على الخصائص أو المتغيرات بتاعته.

خلاص فهمت ليه اسمها برمجة كائنية؟ 🤖

يبقى اللى عملناه ده قالب او كلاس عاوزين نستخدمه ونعمل كائنات.. فهتعمل run

للسكريبت ده وتعامل مع ال interactive interpreter .



```
>>>cat=Animal(name='Cat',pet=True,prey='Mouse',enemy='Dog',tal
ent='Run Fast')
>>> cat.name
'Cat'
>>> cat.pet
True
>>> cat.cv()
name:Cat
is pet:True
prey:Mouse
enemy:Dog
talent:Run Fast
>>> cat.on_danger()
when (Dog) attacks (Cat) it (Run Fast)
```

- هنا عملنا object من الكلاس animal اسمه cat.
- مررنا الـ properties بتاعة cat كبرامترات فى الكلاس ودول هيروحوا للدالة \_\_init\_\_ أول الـ class constructor.
- الدالة \_\_init\_\_ هناخد البرامترات دى وتعملها assignment للمتغيرات التابعة للكلاس أو class variables.
- من الكائن بتاع الكلاس cat أقدر أوصل لأى class variable وهنا يسمى attribute أو properties أو أى دالة زى cv و on\_danger وهنا بنسميهم class methods وبوصلهم عن طريق الكائن اللى عملناه من الكلاس.



```
>>> giraffe = Animal('Giraffe', False, 'Vegetarian', 'Lion',
'Kick with legs')
>>> giraffe.cv()
name: Giraffe
is pet: False
prey: Vegetarian
enemy: Lion
talent: Kick with legs
>>> giraffe.on_danger()
when (Lion) attacks (Giraffe) it (Kick with legs)
```

- وهنا عملنا كائن تانى من الكلاس giraffe وعطيناله خصائص و porperties وسلوك مختلف.

ممكن حد يسأل هو فايده البرمجة الكائنية إني أقعد أعمل حيوانات وكلام فاضى 🤖؟

لا طبعاً ده مجرد مثال للتوضيح... وللعلم يعنى كل حاجة فى لغة البايثون تعتبر object

تابعة لكلاس والكلاس دى فيها متغيرات ودوال أقدر أوصلها من خلال الـ object

```
>>> x = "Pink Python"
>>> type(x)
<class 'str'>
>>> dir(str)
[... 'find', 'format', 'format_map', 'index', 'isalnum',
'isalpha', 'isdecimal', 'isdigit', ...]
>>> x.upper()
'PINK PYTHON'
>>> x.split()
['Pink', 'Python']
```



- مثلاً لو عملت متغير نصي اسمه X .. فالمتغير ده يتبع للكلاس str ويحمل كل الدوال والمتغيرات اللي فيها واللى تقدر تعرفهم عن طريق الدالة dir(str) .
- وتقدر من خلال الـ object x تستخدم أى دالة من str زى الدوال اللي خدناهم فى موضوع الـ strings..

ده مثال تانى لكلاس اسمه Operations عملنا فيها دوال عشان تقوم بالعمليات الحسابية المعروفة جمع ووضرب وطرح وقسمة.

- ولاحظ أنى أستخدمت البرامتر me بدل من self عشان تعرف أنه ينفذ ببقى أى اسم.

```
class Operation:
    num1=num2=0
    def __init__(me, num1, num2) :
        me.num1=num1
        me.num2=num2
    def add(me) :
        return me.num1+me.num2 #add num1 and num2
    def sub(me) :
        return me.num1-me.num2 #subtract num2 from num1
    def mul(me) :
        return me.num1*me.num2 #multiply num1 by num2
    def div(me) :
        return me.num1/me.num2 #divide num1 on num2
```





<pre>x=Operation(100,5) print(x.add()) print(x.sub()) print(x.mul()) print(x.div())</pre>	<pre>105 95 500 20.0</pre>
<pre>y=Operation(200,20) print(y.add()) print(y.sub()) print(y.mul()) print(y.div())</pre>	<pre>220 180 4000 10.0</pre>
<pre>x.num1=30 x.num2=5 print(x.add()) print(x.sub()) print(x.mul()) print(x.div())</pre>	<pre>35 25 150 6.0</pre>

Download script [class2.py](#) from GitHub

المثال ده ممكن بيبيّنك بعض فوائده استخدام البرمجة الكائنية والكلاسات وهو فى الأول

التنظيم للكود على نمط وبناء محدد والتانى إعادة استخدام نفس الكود Code Re-

usability بأننا عملت كلاس فيها 4 دوال وقدرنا نستخدم الدوال دى أكثر من مرة عن طريق

الـ objects اللى بنعملها من الدوال.



## الوراثة Inheritance

الوراثة تعتبر من أهم مميزات البرمجة الكائنية.. وقولنا إن الكائن له خصائص properties وهي المتغيرات وليه سلوك behavior وهي الدوال methods يقدر يرث كلاس أخرى عن طريق الـ Inheritance.

لما أخلق كلاس ترث كلاس تانيه.. الكلاس الأولى تسمى parent والكلاس التانيه تسمى child ولما يحصل وراثة كل الدوال والمتغيرات اللي في الـ parent هنروح للكلاس child ولما أعمل object من الكلاس child أقدر أستخدمهم بالإضافة إن الكلاس child بقدر أضيف فيه متغيراته ودواله الخاصه اللي مالهاش علاقة بالكلاس parent.

طريقة الوراثة :

```
class ParentClass:
    variables..
    functions()..

class ChildClass(ParentClass):
    variables..
    functions()..
```

عشان اخلي كلاس ترث التانيه.. يادوب بمرر الكلاس الـ parent للكلاس اللي عاوزه تورث child كبرامتر وبعدها أي object أعمله من Child يقدر يوصل لكل الـ properties والـ method في الـ parent.



ده مثال عشان يفهمك الوراثة ورينا يستر 😊

```
class Father:
    father_name='Ahmed Pasha'
    profession='Police Officer'
    def job(me):print(me.profession)

class Son(Father):
    def __init__(me,name):
        print(name,me.father_name)

temo=Son('Tamer')
temo.job()
```

```
Tamer Ahmed Pasha
Police Officer
```

Download script [class3.py](#) from GitHub

- هنا عملنا كلاس اسمها Father فيه متغيرين father\_name, profession اسم ووظيفة الأب.. وفيها دالة job بتطبع المتغير بتاع الوظيفة profession.
- وبعدين عملنا كلاس تاني Son بترث الكلاس Father يعنى هناخد كل المتغيرات والدوال اللي في Father.
- تقدر دلوقتي تنسى إن فيه حاجة اسمها Father وتختيل Son بقى شكلها كده

```
class Son:
    father_name='Ahmed Pasha'
    profession='Officer'
    def __init__(me,name):print(name,me.father_name)
    def job(me):print(me.profession)

temo=Son('Tamer')
temo.job()
```



- بعدين عملنا object من الكلاس Son ومررنا الاسم اللي هيروح للـ constructor وهو الدالة \_\_init\_\_ اللي هتطبع حاجتين name وهو البرامتر اللي باعطينه في الكلاس Son و me. father\_name وده اسم الأب الوارثينه من الكلاس Father.
- بعدين من الـ object اللي عملناه من الكلاس Son عملنا call للميثود job اللي هي أصلا كانت موجودة في الكلاس Father وطبعت وظيفة الأب اللي أكيد هتروح أو راحت للأب بعد الـ inheritance 🤖.

هناخد مثال تاني وهو تعديل على المثال الاول بتاع كلاس Animals.

```
class Animal:
    name=''
    pet=''
    prey=''
    enemy=''
    talent=''

    def __init__(self, name, pet, prey, enemy, talent):
        self.name=name
        self.pet=pet
        self.prey=prey
        self.enemy=enemy
        self.talent=talent

    def cv(self):
        cv='name:%s\nis pet:%s\nprey:%s\nenemy:%s\ntalent:%s'%(
            self.name, self.pet, self.prey, self.enemy, self.talent)
        print(cv)

    def on_danger(self):
        print(''when (%s) attacks (%s) it (%s)
              ''%(self.enemy, self.name, self.talent))

class Cats(Animal):
    family=''
    def cat_family(self):
        print(self.family)
```

Download script [class4.py](#) from GitHub



- هنا عملنا كلاس جديدة اسمها Cats بترث الكلاس Animals .
- وفي الكلاس الجديدة أضفنا متغير family و دالة cat\_family .
- من خلال أي object للكلاس Cats أقدر اوصل لكل الدوال والمتغيرات اللي في الـ parent و Animals والـ child وهو Cats.

```
>>> lion=Cats('Lion',False,'Small Animals','Big
Animals','Run Fast')
>>> lion.family='Big Cats'
>>> lion.cv()
name:Lion
is pet:False
prey:Small Animals
enemy:Big Animal
talent:Run Fast
>>> lion.on_danger()
when (Big Animals) attacks (Lion) it (Run Fast)
```

ده اللي ممكن تعرفه عن البرمجة الكائنية أو الكلاسات في الكتاب ده او الإصدار الحالي.. ولو عاوز تكمل وتعرف اكثر فقدمك الموقع الرسمي [classes](#).



## جمل الشرط واتخاذ القرار Making Decision.

في الأول كنا بنكتب الكود في السكريبت ونعمل run في الـ interpreter ينفذ الكود كله جملة جملة لحد ما يخلص.. بعدين عرفنا إن فيه حاجه اسمه function دى بتحط جواها شوية جمل برمجية وتقدر في أى وقت تعملها call وتخلي الـ interpreter يرجع عند السطر اللي فيه التعريف بتاع الدالة وينفذ الكود اللي فيها وبعدين يرجع يكمل البرنامج. كله ده بنتحكم في سير البرنامج وطريقة تعامل الـ interpreter مع الكود اللي بنكتبه. برده من طرق التحكم في سير البرنامج control flow هي جمل الشرط condition. جمل الشرط هي وسيلة لتنفيذ بلوك من الجمل البرمجية عند تحقق تحقق شرط معين.

### جملة if statement

أبسط صورة للشرط جملة if لوحدها.. بيكون شكلها كده

```
if condition :
    code...
```

```
if condition : one_line_code
```

- الحالة الثانية طريقة كتابة جملة if والكود بتاعها في سطر واحد..ويستخدم الشكل ده لو كان البلوك مثلاً جملة برمجية وحده فيعملها كده للتبسيط.
- الـ condition ده جملة برمجية إذا كانت لا تساوى False أو 0 او None البلوك بتاع if هيتنفذ.



- لو فاكرا معايا في جزء الـ operations وأتكلما عن عمليات المقارنة comparison operation operation العمليات المنطقية logical operations إن العمليات دي هي اللي بترجع True أو False .. ففي الغالب جملة الـ condition مع if هتلاقيها خليط من عمليات logical و relational زي ما هنشوف..
- وبالمنااسبة هو ده الاستخدام الأساسي للـ relational والـ logical operations اللي أتكلما عنها في أول الكتاب.. وهنشوف هنا أمثلة لبعض جمل الشرط

<pre>&gt;&gt;&gt; if True:print('yes') yes &gt;&gt;&gt; if 1:print('yes') yes &gt;&gt;&gt; if -1:print('yes') yes</pre>	<p>جملة الشرط ممكن تكون True أو أي رقم سالب أو موجب لا يساوي صفر وجميعهم هيتحققوا الشرط</p>
<pre>&gt;&gt;&gt; if False:print('yes') &gt;&gt;&gt; if 0:print('yes')</pre>	<p>الجملة لو كانت 0 أو False مش هيتحقق الشرط</p>
<pre>&gt;&gt;&gt; x = 5 &gt;&gt;&gt; if x&gt;4:print('yes') yes</pre>	<p>الشرط ممكن يكون relational operation x&gt;4=True</p>
<pre>&gt;&gt;&gt; x = 5 &gt;&gt;&gt; y = 'hello' &gt;&gt;&gt; if x==5 and len(y)==4:     print('yes') &gt;&gt;&gt; if x==5 and len(y)==5:     print('yes') yes</pre>	<p>الشرط ممكن يكون خليط بين الـ relational operations والـ logical operations عشان ننفذ حاجة في حالة تحقق أكثر من شرط.</p>



## جملة else

في حالة if لو الشرط تحقق هينفذ الكود بتاعها.. لو متحققش خلاص مفيش حاجة هتتنفذ... عشان كده عملوا جملة else.. لو الشرط بتاع if تحقق يتنفذ الكود بتاع if ولو متحققش يتنفذ الكود بتاع else.

```
if condition :
    code..
else:
    another_code..
```

- لاحظ إن جملة else بعدها colon : ومفيش condition لان الكود بتاعها هتتنفذ لو الشرط بتاع if متحققش بدون أى شروط

هناخد مثال على جملة if..else وهو سكربت بيطلب أَدخال رقم ..ويتعرف عليه إذا كان زوجي أو فردي.. وعشآن تعرف الرقم زوجي ولا فردي بتقسمه على 2 وتشوف باقى القسمة لو يساوى 0 يبقى زوجي even لو يساوى 1 يبقى فردي odd.

- طبعاً عشان نجيب باقى القسمة بنستخدم المعامل % .

```
num = float(input('Enter a number : '))
if(num%2==0):print('%s is even.'%num)
else:print('%s is odd.'%num)
```

```
Enter a number : 5
5.0 is odd.
>>>
Enter a number : 10
5.0 is even.
>>>
```

Download script [ifelse.py](#) from GitHub





- لما تعمل run وتشغل السكريبت هيطلب منك تدخل رقم وبيشوفه زوجى ولا فردى لكن لو عاوز تجرب رقم تانى مش هينفع ولازم تعمل run من جديد عشان يبدأ الكود من اوله ودالة input تطلب منك تدخل الرقم..فانت محتاجه يكرر العملية.
  - متخفش هنخلص موضوع الشرط ده وتمكن نلاقى حل قدام ولا حاجة 🤖.
- تحيل إنك عاوز تحليه يشوف شرط معين لو متحققش يشوف شرط تانى مختلف عن الأول اللى بتفكر فيه بيخلينا نستخدم حاجة اسمها elif ودى فى لغات تانيه اسمها else if ويكون شكل الشرط كالتالى..

```
if condition1 :
    code1..
elif condition2 :
    code2..
else:
    code3..
```

- لما ال interpreter جى ينفذ جملة الشرط اللى بالشكل ده ده بيشوف condition1 لو إتحقق هينفذ code1 بس ومش هينفذ لا code2..ولا code3.
- لو الشرط condition1 متحققش هينزل يشوف condition2 لو إتحقق هينفذ code2 بس.
- لو condition2 برده متحققش هيرح على code3..وينفذه من غير أى شروط.



- على فكرة مش لازم جملة if يبقى شابك في ديها else , زي الكود اللي تحتك ده فيه if و elif بس.. لو إتحق condition1 هينفذ و code1 ولو متحققش هيشوف condition2 لو أتحق هينفذ code2 ولو متحققش يبقى خلاص مفيش حاجة هتنفذ.

```
if condition1 :
    code1..
elif condition2 :
    code2..
```

عادي ممكن أجبلك جملتين if تحت بعضهم مش if و تحتها elif بس في الحالة ده كل شرط هيبقى منفصل عن الثاني .

<pre>x = y = 1 if x&gt;0:print('x') if y&gt;0:print('y')</pre>	<pre>x y</pre>	<pre>x = y = 1 if x&gt;0:print('x') elif y&gt;0:print('y')</pre>	<pre>x</pre>
--	----------------	--	--------------



آخر حاجة هنعمل مثال شامل لجملة if ..elif..else عشان يلخص الموضوع كله.

- المثال بيطلب من المستخدم يدخل نسبته المئوية ومنها يحسب له التقدير وال GPA.

<pre>x = int(input("Enter your percentage : ")) if( x &gt;= 85 ):     print("Excellent")     if(x&gt;=95):print('A+')     elif(x&gt;=90):print('A')     else:print('A-') elif( x &gt;= 75 ):     print("Very Good")     if(x&gt;=80):print('B+')     else:print('B') elif( x &gt;= 50 ):     print("Good")     if(x&gt;=70):print('B-')     elif(x&gt;=60):print('C')     else:print('D') else:     print("Failed")</pre>	<pre>Enter your percentage : 91 Excellent A &gt;&gt;&gt; Enter your percentage : 80 Very Good B+ &gt;&gt;&gt; Enter your percentage : 60 Good C &gt;&gt;&gt; Enter your percentage : 40 Failed &gt;&gt;&gt;</pre>
---	---

Download script [condition.py](#) from GitHub

- طبعاً عشان تحسب النسبة المئوية لأكثر من شخص لازم تعمل run للسكربت عشان يبدأ من أول سطر ويخلي دالة input تطلب منك تدخل النسبة المئوية من جديد ودي تعتبر مشكلة في البرنامج.
- ومشكلة تانية إن الـ input اللي بتكتبه لازم يكون أرقام عشان بنحوه لمتغير عددي بدالة int ولو المستخدم كتب حروف هيحصل خطأ والبرنامج هيقف.



## جمل التكرار Loop

من شوية خليتك تعيش مشكلة معايا ومش متأكد إذا كنت حسيت بيها أصلاً 😊 بس شوفنا لما كنت بتحسب النسبة المئوية لأكثر من شخص كان لازم تعمل RUN للبرنامج من جديد عشان يبدأ الكود من الاول ويطلب منك تدخل النسبة المئوية.. فالموضوع رخم بعض الشيء ومش عملي..

ولو فرضنا مثلاً إنك عاوز تطبع على الشاشة الأرقام من 1 إلى 100 هل هتقعد تكتب print() 100 مرة 😊؟ .. بالتأكد لأ عشان كده عملوا جمل التكرار .

وهل جمل بتخلي الـ interpreter يكرر تنفيذ بلوك من الكود عدد من المرات بيحدده الشرط بتاع جملة التكرار.

### جملة while loop

جملة while بتنفذ الكود اللي في البلوك بتاعها طول ما الـ condition بتاعها متحقق وبتتكتب بالشكل ده ..

```
while condition:
    code..
```

```
while condition: single_line_code...
```



- طول ما الـ condition ده قيمته True البلوك بتاع جملة while كل ما يخلص تنفيذده هيتنفذ تانى وهكذا لحد ما الـ condition ميبقاش True فنخرج من التكرار.
- لو خليت الـ condition يساوى True ومفيش حاجة تغيره..التكرار هيفضل لما لا نهاية (يعنى لحد ما تقفل الـ interpreter ) فمتجربيش... أو جرب الكود ده فى الخبائه من غير ما تقولى 🤖

```
while True:print("loop")
```

- هتلاقية بيطلع جملة loop كتير ومش بيتوقف ويمكن يخلي الجهاز يهنج.
- يبقى لازم الشرط condition يكون True عشان التكرار بيدأ ويكون محكوم حاجة تخليه False بعد عدد مرات تكرار معينة جردها أنا عشان يوقف.

مثلاً عاوز أعمل سكربت يطبع الأرقام من 0 إلى 5 .. فهيكو بالشكل ده.

<pre>i = 0 while i &lt; 6 :     print(i)     i=i+1 print('Done') print('i =',i)</pre>	<pre>0 1 2 3 4 5 Done i = 6</pre>	<p>هنا عملنا متغير i=0 بعددين الشرط بتاع while هو إن قيمة i تكون أقل من 6 . لو تحقق الشرط هيطبع المتغير i ويزود عليه واحد i=i+1 وبعدين ينفذ البلوك تانى يطبع ويزود. التكرار هيستمر لحد ما i توصل لـ 6 فالشرط هيبقى False = 6 &lt; 6 .. فيخرج من التكرار ويطبع جملة Done وأخر قيمة وصل ليها i وهى 6</p>
---	-----------------------------------	--

Download script [while.py](#) from GitHub



## الأمر break

بنستخدم الأمر break للخروج من جملة التكرار في أى وقت بغض النظر عن حالة الـ condition بتاع التكرار.

- مثلاً في الكود اللي ختاك الشرط  $i \leq 10$  يعنى لو سبته عادى هيطبع الأرقام من 0 إلى 10 .. لو عاوزين نوقف التكرار لما  $i=5$  ومنستناش لحد ما تبقى أكبر من 1, هنعمل جملة شرط تتحقق لما  $i=5$  فيعمل break.

<pre>i = 0 while i &lt;= 10 :     print(i)     if(i==5):break     i=i+1 print('Done') print('i =',i)</pre>	<pre>0 1 2 3 4 5 Done i = 5</pre>
--	-----------------------------------

Download script [while break.py](#) from GitHub

- خلى بالك جداً لما عمل break كانت قيمة  $i=5$  ومكملش البلوك بتاع while يعنى منفذش السطر الأخير فيه  $i=i+1$  وكانت قيمة  $i$  النهائية 5. ويمكن أستخدم infinite loop يعنى أخلى condition قيمته True والمفروض التكرار يستمر على طول بس أوقفه عند حد معين باستخدام break داخل شرط.



<pre> i = 0 while True :     print(i)     if(i==5):break     i=i+1 print('Done') print('i =',i) </pre>	<pre> 0 1 2 3 4 5 Done i = 5 </pre>
--	-------------------------------------

## الأمر continue

بيخلى الـ interpreter يرجع لبداية بلوك جملة while حتى لو مكنتش خالص الجمل فى البلوك ويبدأ لوب من جديد.

المثال ده هيوضحلك اكثر.. عاوزين نطبع الأرقام الفردية من 0 إلى 10.

<pre> i = 0 while i &lt; 10 :     i=i+1     if i%2==0:continue     print(i) </pre>	<pre> 1 3 5 7 9 </pre>
--	------------------------

Download script [while\\_continue.py](#) from GitHub

- الكود ده مختلف شوية عن اللى قبله.. هنا فى أول سطر فى البلوك بنعمل increment للمتغير أ وهقولك ليه.
- وبعدين جملة الشرط اللى بنتحقق لو باقى قسمة أ على 2 يساوي 0 وده فى حالة الأرقام الزوجية وساعتها هيعمل continue يعنى يخلص الـ loop دى ويبدأ loop جديدة من غير ما يكمل الكود اللى بعد الأمر continue



وهو جملة print التي بتطبع قيمة المتغير.

- خلى بالك إن الامر break بينهى التكرار تماماً ويطلع من while لكن continue بيطلع من الـ loop قبل ما تخلص ويدخل على اللي بعدها.
- واحد هيسألني ليه عملت الـ increment على المتغير أ في أول البلوك مش في اخره؟ 🤔

```
i = 0
while i <= 10 :
    print(i)
    if i%2==0:continue
    i=i+1
```

- مش هقولك ليه بس ممكن تجرب الكود ده وهتلاقيه بيطلع 0 إلى ما لا نهاية..
- وده عشان في البداية  $i = 0$  فهيطبع 0 ويدخل على الشرط.. هل  $0\%0==0$  نعم فهتحقق الشرط ويعمل continue ومش هيكمل باقي البلوك ولا يوصل لـ  $i=i+1$  يعنى أ لسه 0 زى ما هي وهيبداً لوب جديد.
- في اللوب الجديد هيطبع أ اللي لسه 0 والشرط هيتحقق فهيعمل continue قبل ما يزود وهيستمر كده لئلا نهاية.
- عشان كان كان لزاماً علينا إننا نخلي الـ increment في أول البلوك عشان يلحق يزود رقم على أ قبل جملة continue.





## جملة while ... else

اللى عملوا لغة البايثون حبوا يضيفوا حاجة جديدة فى جملة while عن اللى بنشوفه فى اللغات التانيه هو حظوا جملة else بتاعة if فاكرينها طبعاً .. جابوها هنا برده عشان الشرط condition بتاع جملة while ميتحققش والتكرار يخلص ينفذ البلوك بتاع جملة else .

شكل جملة while..else بيكون كده

```
while condition:
    statements..
else:
    another statements.
```

- condition يتحول الى False أو لو كان False هينفذ الكود بتاع جملة else.

```
i = 10
while i < 6 :
    print(i)
    i=i+1
else:
    print('i =',i)
    print('condtion == False')
```

```
i = 10
condition == False
```

- مثلاً هنا.. من الاول الـ condition  $10 < 6 = \text{False}$  فمدخلش فى جملة التكرار ونفذ جملة else على طول.



```
i = 0
while i < 6 :
    print(i)
    i=i+1
else:
    print('i =',i)
    print('condition == False')
```

```
0
1
2
3
4
5
i = 6
condition == False
```

Download script [while\\_else.py](#) from GitHub

- وهنا شرط التكرار تحقق لحد ما ا بقيت 6 وبعديها طلع من جملة while ونفذ جملة else.
- وخلي بالك جملة else بتننفذ في حالة إن الشرط بتاع while كان False أو تحول إلي False.
- أما لو عملت break في جملة while وخرج منها.. مش هينفذ جملة else.

```
i = 0
while i < 6 :
    print(i)
    if(i==3):break
    i=i+1
else:
    print('i =',i)
    print('condition == False')
```

```
0
1
2
3
```

Download script [while\\_else.py](#) from GitHub



قبل ما نخلص كلام عن while , قولتلك هنجمع حل لمشكلة السكريت ده condition اللى بيحسب التقدير من النسبة المئوية والمشكلة اللى كانت فيه إن بيطلب منك تدخل النسبة المئوية مرة وحدة وبعد كده لازم تعمل run تانى عشان يبدأ من اول السطر.

• الحل إننا نحط الكود فى بلوك لجملة while وخليه يكرر نفسه وبكده مش هحتاج

نعمل run للسكرت كل مرة.

<pre>while(True):     x = int(input("Percentage : "))     if (x==-1):break     if( x &gt;= 85 ):         print("Excellent")         if(x&gt;=95):print('A+')         elif(x&gt;=90):print('A')         else:print('A-')     elif( x &gt;= 75 ):         print("Very Good")         if(x&gt;=80):print('B+')         else:print('B')     elif( x &gt;= 50 ):         print("Good")         if(x&gt;=70):print('B-')         elif(x&gt;=60):print('C')         else:print('D')     else:         print("Failed")     print("=====")</pre>	<pre>Percentage : 99 Excellent A+ ===== Percentage : 58 Good D ===== Percentage : 85 Excellent A- ===== Percentage : 60 Good C ===== Percentage : -1 &gt;&gt;&gt;</pre>
---	---

Download script [while loop.py](#) from GitHub



- حطينا الكود في infinite loop الشرط بتاعها True الحل الوحيد إن التكرار ده يخلص هو تحقق الشرط بتاع `if(x==-1):break` بأن اليوزر يدخل رقم -1 وفي الحالة دي يعمل `break` وخرج من البرنامج.
- من الحاجات اللي ممكن تكون لاحظتها أو لسه ملاحظتهاش إن دالة `int()` اللي بتحول النص بتاع دالة `input` لمتغير عددي لازم النص ده يكون أرقام.
- يعنى لو غلطت ودخلت حروف هيحصل `error` لأنه مينفعش يحول النص ده إلى أرقام والبرنامج هيقف.

```
Percentage : s20
x = int(input("Percentage : "))
ValueError: invalid literal for int() with base 10: 's20'
```

ده بيخلق عندنا مشكلة تانيه هنشوف حلها قدام إزاي لما يحصل خطأ غير متوقع من المستخدم نقدر نعالجه من غير ما البرنامج يقف..هنتكلم عليها في الفصل بتاع الأخطاء

.Exceptions



## جملة for iteration

جملة for في لغة البايثون بتختلف كتير عن الموجوده لغات C++/C.. والحاجة الوحيدة اللى بتعملها for في البايثون هو الـ iteration أو التكرار على مجموعة من العناصر.

- طريقة استخدامها بيكون بالشكل ده

```
for item in sequence:
    code..
```

- شغل جملة for بيكون على data sequence معين زي list أو dictionary أو tuple أو حتى string.. وجملة for كل إللى بتعمله إنها بتفصص الـ sequence ده عنصر عنصر في كل loop والأمثله هتوضحلك أكثر..

```
numbers=[1, 2, 3, 4, 5]
```

```
for number in numbers:
    print(number)
```

```
1
2
3
4
5
```

- في المثال ده عندنا list اسمها numbers .. عملنا iteration على الـ items بتوعها.
- بحيث إن كل مرة في التكرار يطالع عنصر من numbers ويخطه في المتغير number.

```
x='HELLO'
```

```
for letter in x:
    print(letter)
```

```
H
E
L
L
O
```



- فى المثال ده الـ sequence اللي عملنا عليه تكرار هو نص string يعنى مجموعة من الحروف فى كلمة HELLO.
- أكيد أنت فاهم إن المتغير letter أو number فى المثال ده و اللي فوق هما متغير التكرار iteration variable وينفع نسميه أى اسم طبعاً.

## استخدام for .. in range

لو كنت تعاملت مع أى لغة برمجة تاني هتقولى مش دى for اللي انا أعرفها 🤖 أنا عاوز for اللي فيها بداية init و condition بجليها توقف عند حد معين و increment اللي بتحدد مقدار زيادة متغير الـ index بتاعها لحد ما يخلى الـ condition يبقى False و يوقف الـ for .

الكلام ده عملته لغة البايثون بشكل مختلف فى دالة range..مش هشرحك for in range قبل ما أفهمك دالة range بتعمل ايه.

دالة range بتولد متسلسلة من الأرقام ببداية ونهاية ومعدل زيادة أنا بحدده.

<code>range(start, stop, step)</code>	دى الصورة الكاملة لبرامترات الدالة
<code>range(start, stop)</code>	كده بيعتبر <code>step = 1</code>
<code>range(stop)</code>	كده بيعتبر <code>step = 1</code> والبداية <code>start = 0</code>



دالة range ممكن تاخذ 3 برامترات البداية start والنهاية stop ومقدار الزيادة step.. عشان تولد متسلسلة من الأرقام تبدأ من رقم start بتزيد بمقدار step وأكبر رقم فيها سيكون أصغر من stop.

<pre>&gt;&gt;&gt; list(range(1,10,1)) [1, 2, 3, 4, 5, 6, 7, 8, 9] &gt;&gt;&gt; list(range(0,10,2)) [0, 2, 4, 6, 8]</pre>	<pre>&gt;&gt;&gt; list(range(2,8,1)) [2, 3, 4, 5, 6, 7] &gt;&gt;&gt; list(range(3,33,3)) [3, 6, 9, 12, 15, 18, 21, 24, 27, 30]</pre>
--	--

بنستخدم دالة list عشان نجول المتسلسلة إلى list ونشوف الأرقام اللي فيها. خلى بالك إن آخر رقم في الليسته بيبقى أقل من قيمة الـ stop مش بيوصل له.

<pre>&gt;&gt;&gt; list(range(1,5)) [1, 2, 3, 4] &gt;&gt;&gt; list(range(1,5,1)) [1, 2, 3, 4]</pre>	<pre>&gt;&gt;&gt; list(range(5)) [0, 1, 2, 3, 4] &gt;&gt;&gt; list(range(0,5,1)) [0, 1, 2, 3, 4]</pre>
--	--

هنا لما مررنا برامترين بس للدالة.. أعتبرتهم start و stop و خلت الـ step = 1

لو مررنا برامتر واحد أعتبرته stop و خلت البداية من صفر مش 1 و الـ step = 1

<pre>&gt;&gt;&gt; list(range(1,5,1)) [1, 2, 3, 4] &gt;&gt;&gt; list(range(5,1,-1)) [5, 4, 3, 2]</pre>	<pre>&gt;&gt;&gt; list(range(4,0,-1)) [4, 3, 2, 1] &gt;&gt;&gt; list(range(20,-2,-2)) [20, 18, 16, 14, 12, 10, 8, 6, 4, 2, 0]</pre>
---	---



- لو عاوز المتسلسلة تكون تنازلية..بتخلى الـ start أكبر من الـ stop والـ step بالسالب...وبرده أصغر رقم فى المتسلسلة هيكون أكبر من الـ stop.  
طيب..ممش احنا قولنا إن for بتعمل iteration على أى sequence ؟ حصل وقولنا إن range بتطلع sequence فبالتالى نقدر نستخدم for مع range ونعد بتسلسل معين ليه بداية ونهاية ومعدل زيادة أنا جدهه كأننا بنستخدم جملة for فى لغة الـ c/c++ واللغات التانيه.

يبقى جملة for شكلها هيبقى زى كده.

```
for index in range(start,stop,step):
    code..
```

دلوقتى عاوز أعمل برنامج بيعد من 0 إلى 10 بمعدل زيادة 2 .. وعمتلك جزء من الكود بلغة الـ C++ عشان تفهم الفرق.

```
// c++ for loop
for (int i = 0 ; i < 12 ; i=i+2)
    cout<<i<<endl;
```

```
# python for loop
for i in range(0,12,2):
    print(i)
```

```
0
2
4
6
8
10
```





- خلينا في كود البايثون .. كل اللي عمله إنه عمل ليستة من الـ `range(0,12,2)`.

الليسته دي شكلها كده `>>> list(range(0,12,2))` `[0, 2, 4, 6, 8, 10]` وقعد يعمل iteration فيها وطلع

العناصر واحد واحد وطبعها.

- وطبعاً جملة `for` تقدر تستخدم فيها الأمر `break` اللي بيخرج من الـ `loop` وجملة

`continue` اللي بترجع لبداية البلوك قبل ما تخلص الـ `loop` والمثال ده بيوضحلك..

```
for i in range(22):
    if(i==10):break
    if(i%2==0):continue
    print(i)
```

```
1
3
5
7
9
```

Download script [for range.py](#) from GitHub

في الكود ده دالة `range` خدت برامتر واحد `stop` وبالتالي هتعمل متسلسلة بدايتها 0

و بتزيد بمعدل 1 يعني المفروض `for` تعد من 0 لحد 20.

- الشرط الأول لما `i` يبقى 10 أو يوصل للعنصر اللي قيمته 10 في الـ `sequence` ده يعمل

`break` وبكده ضمنا إن التكرار مش هيستمر لحد الرقم 20 وهيوقف عند 10.

- الشرط الثاني إن يقسم الرقم على 2 لو باقى القسمة % ساوى 0 يعني الرقم زوجي

في الحالة دي يعمل `continue` ويرجع ينفذ `loop` جديدة قبل ما يخلص باقى الكود اللي

هو بيطلع قيمة `i` وبالتالي الأرقام الزوجية مش هتطبع.



وده مقارنة بين المثالين اللى بيطبعا الأرقام الزوجية من 0 إلى 10 باستخدام `for` و `while` كمقارنة بينهم.

```
i = -1
while i <= 10 :
    i=i+1
    if i%2:continue
    print(i)
```

```
for i in range(11):
    if i%2:continue
    print(i)
```

في حالة `while` خليت `i=-1` عشان بيعمل `increment` قبل ما يطبع

الرقم .. فلو كان `i=0` هيزودها فتبقى 1 ومش هيطبع 0 كرقم زوجي.

في حالة `for` ال `stop` بتاع دالة `range` 11 عشان زي ما انت فاكر آخر رقم

في المتسلسلة اللى بيعملها بيكون أصغر من ال `stop` اللى هو رقم 10.

### جملة `for .. else`

زي جملة `while` بالزبط تقدر تستخدم `else` مع `for` عشان تنفذك حاجة معينة بعد

إنتهاء ال `iteration`.

```
for i in range(4):
    print(i)
else:
    print('done..')
```

```
0
1
2
3
done..
```

Download script [for\\_else.py](#) from GitHub




## الأخطاء والاستثناءات Errors and Exceptions

### الأخطاء Syntax Errors

لغة البايثون فيها نوعين من الأخطاء.. الأول متعلق بقواعد اللغة نفسها مثلاً في كتابة تعريف الدالة أو أى نوع من البلوكات فتتنسى الـ colon : ده اسمه `SyntaxError` أو لو غلطت في محاذاة أسطر البلوك أو سطر أدبته مسافة زياده بالغلط اسمه `IndentationError`. النوع ده يسمى خطأ قاتل `fatal error`.. مفيهوش تسامح ولازم تصححه ولو كان السكربت 100 سطر وسطر واحد فيه الخطأ من النوع ده السكربت مش هيشغل أصلاً.

```
>>> if True print('yes')
SyntaxError: invalid syntax
>>>
```



### الإستثناءات Exceptions

النوع التانى من الأخطاء أو تسمى `exceptions`.. فى الحالة دى القواعد البرمجية `syntax` سليمة ولو عملت تشغيل للكود.. الـ `interpreter` هيبداً ينفذ الكود ومفيش مشاكل لحد ما يقابله الخطأ أثناء التشغيل `runtime` تخلى البرنامج يوقف.. وأنواعه كتير.. مثلاً إنك تعمل `call` لدالة أو متغير قبل ما تعرفه فهيطلعلك خطأ `NameError` ولو عاوز تجمع رقم فى متغير عددى مع رقم فى متغير نصى زى كده `'5'+5` وده عدى علينا قبل كده



هينج TypeError أو لو حاولت تقسم على صفر وده ليس له معنى يا ضياً فهيطالعك  
ZeroDivisionError .. وغيرهم كتير.

وهنا في الوثيقة بتاعة اللغة جايبلك كل الـ Exceptions اللي ممكن تظهرلك في لغة  
البايثون [bltin-exceptions](#) .. مش لازم تعرفهم كلهم أنت هتشوفهم بنفسك 🤖.

## معالجة الأخطاء Handling Exception

أياً كان نوع الأخطاء ولو كانت exceptions برده هتخلي السكرت يوقفك وميكملش.  
عشان كده عملوا جملة try اللي شكلها بيكون كده.

```
try:
    something_to_do
except:
    something_else.
```

- اللي بيحصل إن الـ interpreter بيحاول ينفذ البلوك بتاع جملة try ولو حصل  
Exception هينفذ البلوك بتاع جملة except.
- هناخد مثال على طول على جملة try..except وهو سكرت الأرقام الزوجية والفردية.  
المستخدم يدخل رقم والسكرت يقراه عن طريق دالة input ويجدد إذا كان زوجي أو فردي  
زي ما أخذناه قبل كده.



```
while True:
    x = int(input('Enter A Number : '))
    if x%2==0:print('Even')
    else:print('Odd')
```

```
Enter A Number : 1
Odd
Enter A Number : 2
Even
Enter A Number : f
ValueError: invalid literal
for int() with base 10: 'f'
```

- في المثال ده دالة int بتاخد الرقم اللي بيكتبه المستخدم من دالة input اللي بترجعه علي شكل متغير نصي وحواله دالة int لتغير عددي في X.
- وبعدين لو كان باقى قسمته على 2 يساوى صفر يبقى زوجي even غير كده odd.
- المشكلة لو المستخدم دخل حروف مثل أرقام.. دالة int لا تاخد الحروف من دالة input وتيجي حوالمهم هيطلع خطأ ValueError هيقف البرنامج.

الحل إننا نحط الكود الخطير ده في جملة try..except.

```
while True:
    try:
        x = int(input('Enter A Number : '))
    except:
        print('incorrect number')
        continue
    if x%2==0:
        print('Even')
    else:
        print('Odd')
```

```
Enter A Number : 1
Odd
Enter A Number : 2
Even
Enter A Number : f
incorrect number
Enter A Number : 3
Odd
Enter A Number : d
incorrect number
```

Download script [try1.py](#) from GitHub



- هنا الـ interpreter هينفذ بلوك جملة try..ولو المستخدم دخل حرف مش رقم وحصل Exception هينفذ البلوك بتاع except اللي يطبع كلمة incorrect number ويعمل continue يعنى يرجع من اول البلوك بتاع while ويطلب رقم من جديد.

ويمكن تستخدم جملة try..except عشان تنفذ كود بناءً على نوع الـ Exception اللي هيطلع وهيكون شكلها كده.

```
try:
    something_to_do
except <error_name1>:
    something_else.
except <error_name2>:
    something_else.
```

- في الحالة دي لازم تكون عارف اسماء الـ Exceptions المتوقع إنها تظهر معاك.. و ده مثال لسكربت يطلب من المستخدم إنه يدخل رقمين num1 و num2 ويقسم الأول على التاني.
- في الحالة دي الأخطاء المتوقعه تحصل إن المستخدم يدخل حروف فلما اجى أحوله لرقم بدالة int هيظهر ValueError.
  - وفيه خطأ تاني ممكن المستخدم يدخل الرقم num2 صفر والقسمة على صفر بترجع خطأ ZeroDivisionError .



```

while True:
    try:
        num1 = int(input('Enter A Num1 : '))
        num2 = int(input('Enter A Num1 : '))
        result=num1/num2
        print(result)
    except ZeroDivisionError:
        print('Cant divide on zero')
    except ValueError:
        print('Incorrect Number')

```

```

Enter A Num1 : 6
Enter A Num1 : 3
2.0
Enter A Num1 : 5
Enter A Num1 : 0
Cant divide on zero
Enter A Num1 : f
Incorrect Number
Enter A Num1 : 1
Enter A Num1 : g
Incorrect Number

```

Download script [try2.py](#) from GitHub

آخر حاجة هتكلم عنها في الموضوع ده هو جملة finally اللي بتتضاف لجملة try..except

```

try:
    something_to_do.
except:
    something_else.
finally:
    do_whatever.

```

قولنا إن المفسر بيحاول ينفذ بلوك جملة try ولو ظهر خطأ بيروح لجملة except. فأننا لو عاوز أنفذ كود في الحالتين بقى سواء كان فيه خطأ أو مفيش هينفذ فبيستخدم جملة finally.. وهديك مثال يوريك ممكن تستخدمها في أيه.



```
marks={'ahmed':20,'ali':19,
'mahmoud':10,'noor':18}
name=input('Enter your name : ')
try:mark=marks[name]
except:mark='user not found'
finally:print(mark)
```

```
Enter your name : ahmed
20
Enter your name : salah
user not found
```


Download script [try3.py](#) from GitHub

- في المثال ده عملنا dictionary فيه اسماء الطلاب ودرجاتهم ومطلوب من المستخدم يدخل اسمه عشان يستخدمه كـ key في الـ dict ويجب له الـ value المقابله وهى الدرجة.
  - لو الاسم موجود هيرجع الـ value المقابله ليه في المتغير mark ولو مش موجود هيحصل exception لأنك بتحاول تطلع قيمة لـ key مش موجود أصلاً فهينفذ جملة except اللى بتحط في المتغير mark النص user not found.
  - في الحالتين حصل exception أو محصلش كود جملة finally هيتنفذ وهتطبع هتطبع قيمة المتغير mark أيأ كان.
- وده كل اللى أقدر أقولهولك وهيفيدك في موضوع الـ exception.. وطبعاً تقدر تشوف الموضوع على توسع أكثر في الـ documentation بتاعة البايثون من هنا [errors](#)





## الفصل 3 - المكتبات فى لغة البايثون Libraries



الموديولات Modules ✓

المكتبة الأساسية Standard Library ✓

بعض الموديولات المشهورة ✓

الحزم Packages ✓

تحميل المكتبات من موقع PyPi ✓

تثبيت المكتبات بأداة PiP ✓

عمل مكتبة Packaging ✓



## الموديولات Modules

لو بتلاحظ لما تيجى تعمل run للسكربت بتاعك على الـ IDLE بتدوس على قائمة `run >> run module` يبقى الموديول ده هو السكربت أو الكود بتاعك اللي بيكون فيه مجموعة من المتغيرات `variables` الدوال `functions` أو الكلاسات `classes`.

لغة البايثون بتتيج ليك إنك تقسم الكود بتاعك على شكل موديولز أو سكربتات عشان التنظيم وعشان مبيقاش الكود كله فى سكربت واحد ويبقى طويل.. وكل سكربت من دول تقدر تعمله استدعاء داخل السكربت الأساسى بتاعك عن طريق جملة `import`.

يعنى الموديولز دى زى ملفات `class files` فى لغة الجافا أو الـ `libraries` المعروفة فى أغلب اللغات.

## استدعاء موديول `importing modules`

طريقة استدعاء `object` (دالة , متغير `class`) من موديول بيكون بالشكل ده وبالأمثله هنعرف الفرق بينهم..

```
import module_name
from module_name import object
from module_name import *
```



هنعمل سكرت جديد أو موديول جديد وهنعمل فيه دالة اسمه fact ودى تحسب ال factorial أو مضروب العدد , لو مش فاكر يعنى أيه مضروب العدد هو إنك بتجيب العدد وتضربه فى نفسه وفى كل الأرقام اللى أصغر زى 4 مضروبه  $24 = 1 * 2 * 3 * 4$

هتسمى الموديول factorial.py وتحفظه وتعمله ..Run.

<pre>def fact(n):     num = 1     while n &gt;= 1:         num = num * n         n = n - 1     return num</pre>	<pre>&gt;&gt;&gt; fact(5) 120 &gt;&gt;&gt; fact(4) 24 &gt;&gt;&gt;</pre>
---	--

- لما تشغله مفيش حاجة هتظهر لاننا عرفنا الدالة بس معملاهاش استدعاء call .
- اسم الدالة fact بنمرر ليها العدد اللى عازين نجيب مضروبه كبرامتر اسمه n واستخدمنا فيها جملة التكرار while عشان كل مرة تنقص 1 من العدد وتضربه فى المتغير num وفالنهاية ترجع المتغير num.
- لما تعمل run فى ال interactive interpreter أبقى أستدعى الدالة ومرر ليها الرقم

```
>>> fact(5)
120
```

اللى عاوز نجيب المضروب بتاعه بالشكل ده

دلوقتى هنعتبر الموديول factorial ده مكتبه وعاوزين نستخدمه فى سكرتات تانيه لينا. هنعمل نعمل سكرت جديد ونستدعى جواه الموديول اللى اسمه factorial ونستخدم الدالة fact اللى بتحسب المضروب.



```
import factorial
x = factorial.fact (4)
print(x)
```

```
>>> 24
```

- في السطر الأول عملنا import للموديول factorial وخلي بالك من نقطتين.. الأولى إنك مكتبتش factorial.py كتبت اسمه بس والنقطة الثانية لازم تاخد بالك من مكان الموديول factorial.py بالنسبة للموديول اللي احنا مشغلينه دلوقتى. عشان لما تعمله import ال interpreter يعرف يجمعه وينفذ الكود اللي جواه.

الأماكن اللي خط فيها الموديول عشان تقدر تعمله import

1. في نفس المجلد اللي فيه الموديول اللي هتعمله run
2. في المجلد الرئيسى بتاع لغة البايثون .
3. في المجلد Lib موجود في جودة مجلد البايثون.

- المهم تانى سطر فى الكود عملنا call للدالة اللي اسمها fact فى الملف factorial بالشكل ده factorial.fact()
- وطبعاً الدالة بترجع المضروب فخدناه فى متغير x وعملنا له print .

لاحظ إنك لو مكتبتش اسم الموديول وحاولت تستدعى الدالى fact على طول مش

هياقياها وهيطلع NameError .  

```
x = fact(5)
NameError: name 'fact' is not defined
```

وعشان نحل المشكلة دى تقدر تستدعى الدالة fact نفسها من الموديول بالشكل ده.



```
from factorial import fact
x = fact(4)
print(x)
```

خلى بالك الفرق بين `import module_name` و `import object from module_name`

- إن الطريقة الاوول بتستدعى كل الداول والمتغيرات والكلاسات إن وجدت اللي في الموديول ولكنى بقدر أوصلها عن طريق اسم الموديول `module_name.object`
- أما الطريقة الثانية بتستدعى ال object اللي بعمله import بس من الموديول و بقدر أوصله عن طريق اسمه مباشرة `object_name` بس لو فيه دوال تاني في الموديول مقدرش أوصلها لأنى كده معملتهاهاش `.import`.
- عشان تفهم أكثر..ارجع للموديول factorial عشان هنضيف فيه دالة تانيه نسميها `fact2` تحسب المضروب المرة دى بس جملة for

```
def fact(n):
    num = 1
    while n >= 1:
        num = num * n
        n = n - 1
    return num
def fact2(n):
    num = 1
    for i in range(1,n+1):
        num = num * i
    return num
```

```
>>> fact(5)
120
>>> fact2(5)
120
>>>
```

Download script [factorial.py](#) from GitHub



- دلوقتي بقى عندنا دالتين هما الأتئين بيعملوا نفس الوظيفة بحسبوا المضروب بس وحدة جُملة while والثانية جُملة for .

- ياربت تكون لسه فاكر شرح دالة range في for وعارف ليه البرامتر التاني بتاعها n+1 ..

المهم هنرجع للسكربت التاني اللي بنعمل منه import للمكتبة اللي بنعملها بتاعة

factorial وهنعدل عليه بالشكل ده..

```
from factorial import fact
x1=fact(5)
x2=fact2(5)
print(x1)
print(x2)
```

```
NameError: name 'fact2'
is not defined
```

- تلاحظ إنه عمالك error وقالك إنه مش عارف fact2 دي تبقى مين وطبعاً حقه لأنك

فوق عملت import للدالة fact بس من الموديول كان لازم تعمل import fact,fact2.

- او ممكن تعمل import للموديول كله import module ولما تعمل call للدالة تكتب

اسم الموديول قبلها

```
import factorial
x1= factorial.fact(5)
x2= factorial.fact2(5)
print(x1)
print(x2)
```

```
120
120
>>
```

- لو مديايقك طول اسم الموديول factorial ممكن تستدعيه بأى باسم قصير

**import module as name**



<pre>import factorial as f x1= f.fact(5) x2= f.fact2(5) print(x1) print(x2)</pre>	<pre>120 120 &gt;&gt;</pre>
---	-----------------------------

- أو تقدر تعمل import لكل الدوال اللي فيه بالشكل ده `from module import *`

بدل ما تكتب اسم كل دالة بعد كلمة import.

<pre>import factorial import * x1= fact(5) x2= fact2(5) print(x1) print(x2)</pre>	<pre>120 120 &gt;&gt;</pre>
---	-----------------------------

يبقى دى طرق استخدام الموديلوز أو المكتبات سواء أنت عملتها بنفسك أو كانت جاهزة تبع اللغة أو حملتها من على الأنترنت.

موديلوز تبع اللغة! 🤖 أيوة لغة البايثون بيحى معاها مجموعة كبيرة من المكتبات تقدر تستخدمها فى تطبيقاتك المختلفة وهنتكلم عنها الجزء اللي جاي..



## مكتبة بايثون الأساسية The Python Standard Library

سهولة أى لغة برمجة يعتمد بشكل كبير على مدى ثراء المكتبة الأساسية standard Library التابعة لها.

لغة البايثون عبارة عن مجموعة من القواعد البرمجية التي تخليها مختلفة عن أى لغة تانيه بالإضافة لمجموعة من الدوال functions وأنواع البيانات data types والمكتبات أو موديلوز modules يسهلوا عليك استخدام اللغة ويساعدوك تنفذ كل التاسكات البرمجية التي تحتاجها كمبرمج ويببقوا تابعين للغة بشكل أساسى دول أسمهم المكتبة الرئيسية للغة Standard Library.

مثلاً لو عاوز تجيب المضروب بتاع رقم معين.. هل لازم تكتب الكود اللي بيحجب المضروب زى ما عملنا ولا اللغة بتوفرك مكتبات فيها دوال تساعدك تحسبه بسهولة! 🤖

الحقيقة البايثون فيها مكتبة Math اللي أتكلما عنها قبل كده و فيها دوال بتعمل الكلام ده من غير ما تكتبه وقس على هذا الموضوع فى كل التطبيقات اللي بتعملها هل لازم تبدأ من الصفر from scratch ولا فيه مكتبات مساعدة.

يبقى الـ [Standard Library](#) التابعة للغة بتوفرك مكتبات/موديلوز فيها دوال وكلاسات تعملك أغلب الوظائف اللي بتحتاجها.

ويمكن تشؤف الوثيقه فى الموقع الرسمى للغة وتشؤف محتوى الـ [Standard Library](#).

المكتبة الرئيسية فيها نوعين من الموديلوز..





- الأول built in modules ودي أكتيب بلغة الـ C أثناء تصميم اللغة نفسها وهي أصل اللغة واللى بتتعامل مع نظام التشغيل بشكل مباشر.
- والنوع التانى موديلوز إتكتبت بلغة البايثون بعد ما إتعملت اللغة عشان تسهل عليك إنك تعمل التاسكات البرمجية المختلفة ودي تقدر تفتحها وتشوف أكواد البايثون فيها. من أهم الحاجات برده فى الـ standard Library للغة البايثون واللى أتكلمنا عنها قبل كده الدوال [built in functions](#) هتلاقى إننا استخدمنا عدد كبير منهم لحد دلوقتى وهتحتاج بعضهم بشكل متكرر فى كل السكريبتات بتاعتك.

Built-in Functions				
abs()	divmod()	input()	open()	staticmethod()
all()	enumerate()	int()	ord()	str()
any()	eval()	isinstance()	pow()	sum()
basestring()	execfile()	issubclass()	print()	super()
bin()	file()	iter()	property()	tuple()
bool()	filter()	len()	range()	type()
bytearray()	float()	list()	raw_input()	unichr()
callable()	format()	locals()	reduce()	unicode()
chr()	frozenset()	long()	reload()	vars()
classmethod()	getattr()	map()	repr()	xrange()
cmp()	globals()	max()	reversed()	zip()
compile()	hasattr()	memoryview()	round()	__import__()
complex()	hash()	min()	set()	
delattr()	help()	next()	setattr()	
dict()	hex()	object()	slice()	
dir()	id()	oct()	sorted()	



## بعض الموديولات المشهورة

في الجزء ده هنتكلم عن 3 من الموديولات المشهورة في لغة البايثون التابعين

للـ standard library وهم `sys,time` , `stplib`

- قولنا إن المكتبات دى فيه منها حاجات تابعة للـ Interpreter نفسه يعنى متقدرش تشوف الكود بتاعها وفيه حاجات مكتوبين بلغة البايثون وتقدر تشوف السكريبتات `.py` بتاعتها. بالنسبة للـ `modules` المكتوبين بلغة البايثون بيقوا موجودين في المجلد `Lib` التابع لمجلد اللغة وهنعرف أزاى نجيب مكان الموديول برمجياً.
- عشان تعرف الموديول ده مكتوب بلغة الـ `C` ولا عبارة عن سكريبت مكتوب بلغة البايثون.. مثلاً هنجرب على موديول اسمه `OS` مثلاً

```
>>>import os
>>> os.__file__
'C:\\Users\\Mahmoud\\AppData\\Local\\Programs\\Python\\Python36-32\\lib\\os.py'
```

- في الكود ده عملنا `import` لموديول اسمه `OS` وطلعنا منه متغير اسمه `__file__` والمتغير ده بيحطه المفسر في الموديولات المكتوبة بلغة البايثون لما تعملها `.import` وقيمة المتغير ده عبارة عن المسار اللي فيه الموديول وطبعاً المسار الغريب ده اللي مثبت عليه لغة البايثون الإصدارات > 3.6 على ويندوز 10
- لو إصدار قديم شوية مجلد `python` هتلاقيه في المسار `c:/python`
- لو روحت للمسار بتاع الموديول `OS` هتلاقيه سكريبت بايثون `os.py`.
- ده يعنى ان الموديول `OS` موجود ظاهرياً على شكل سكريبت بايثون ومش `built in`.



- بالنسبة للموديولات الـ `built in` زي موديول `math` وده مش هتلاقيه في مجلد `lib`.

```
>>> import math
>>> math.__file__
AttributeError: module 'math' has no attribute '__file__'
```

في الجزء تعمدت أخليك تدور على مكان الموديول عشان تعرف أنه مهما راح او جه هتلاقيه  
عباره عن سكرت بايثون فيه شوية دوال ومتغيرات مش حاجة تخوف يعني 🤪.

## موديول time

تقدر من خلال لغة البايثون إن تعرض الوقت والتاريخ بطرق ودوال محددة من خلال الموديول  
`time` اللي بالنسبة الـ `built-in` زي موديول `math` يعني مش هتلاقيه في الفولدر `Lib`.

<pre>&gt;&gt;&gt; import time as t</pre>	<p>أول حاجة عملنا <code>import</code> للموديول باسم <code>t</code> للتبسيط.</p>
<pre>&gt;&gt;&gt; t.time() 1538089706.9603162</pre>	<p>دالة <code>time</code> بترجع الوقت بالثواني من تاريخ 1970/1/1 وده ده أحد تواريخ الوقت الموحد في العالم <code>UTC</code> واللى بتعتبره بعض أنظمة التشغيل ريفرنس عشان تحسب الوقت من بعده.</p>
<pre>&gt;&gt;&gt; t.ctime(0) 'Thu Jan 1 02:00:00 1970' &gt;&gt;&gt; t.ctime(t.time()) 'Fri Sep 28 02:19:30 2018' &gt;&gt;&gt; t.ctime() 'Fri Sep 28 02:19:31 2018'</pre>	<p>دالة <code>ctime</code> بتاخذ برامتر واحد وهو الوقت معبراً عنه بالثواني وخوله إلى صورة التاريخ والوقت المتعاد. لاحظ لما كان البرامتر 0 جابت تاريخ <code>UTC</code> بتاع 1970. لو عاوزها جيب التاريخ و الوقت الحالي بتمرر لها الثواني اللي بترجعها دالة <code>time()</code> أو من غير أي برامترز.</p>



```
>>> x = t.localtime()
>>> x
time.struct_time(
tm_year=2018, tm_mon=9,
tm_mday=28, tm_hour=2, tm_min=27,
tm_sec=49, tm_wday=4,
tm_yday=271, tm_isdst=0)

>>> print('Now %sh:%sm:%ss'%
(x.tm_hour, x.tm_min, x.tm_sec))

Now 2h:27m:49s
```

دالة localtime بترجع time\_struct  
اللى من خلاله تقدر تطلع أجزاء التاريخ زى  
السنة tm\_year والشهر tm\_mon واليوم  
tm\_mday والوقت زى الساعة tm\_hour والدقائق  
tm\_min والثواني tm\_sec.

عشان تعرف باقى الدوال فى موديول time تقدر تشوف الوثيقه من هنا [time](#).



## موديول SYS

من الموديولات المهمة واللى بتحتاج تستخدمها فى سكريبتاتك فكان لازم أتكلم عنها..

موديول SYS فيه مجموعة من المتغيرات اللى بتحمل معلومات مهمة عن لغة البايثون ونظام التشغيل زى ما هنشوف.

<pre>&gt;&gt;&gt; import sys</pre>	اسم الموديول sys
<pre>&gt;&gt;&gt; sys.builtin_module_names '_ast', '_bisect', '_blake2', '_codecs', '_codecs_cn', ...)</pre>	المتغير بيرجع tuple فيها كل اسامى الـ built in modules واللى منهم sys والموديول نفسه time و math
<pre>&gt;&gt;&gt; sys.modules &gt;&gt;&gt; 'os' in sys.modules True</pre>	المتغير modules بيرجع dict كبيره فيها كل الموديولز الـ built-in والموديولز العاديه. تقدر عن طريق الأمر in تعرف إذا كان الموديول موجود أو لا.
<pre>&gt;&gt;&gt; sys.path</pre>	path بيرجع list فيها كل الاماكن اللى ممكن يقرى منها الموديولز ويعملها import.
<pre>&gt;&gt;&gt; sys.platform 'win32'</pre>	platform بيرجع نوع نظام التشغيل لو ويندوز win32 لو لينكس linux وهكذا.
<pre>&gt;&gt;&gt; sys.version '3.6.3 (v3.6.3:2c5fed8...'</pre>	version بيرجع إصدار البايثون الحالى.

و عشان تعرف أكثر عن المتغيرات والدوال فى موديول sys تقدر تكمل من هنا [SYS](#)



أستنى لسه مخلصناش كلام عن موديول `sys` 🙄 ومن الاستخدامات المهمة جداً لموديول

`sys` إنه بيخليك تقدر تمرر قيم للسكربت بتاعك عن طريق الـ `command line`.

- أنت عارف إنك لو عاوز تدخل قيمة للسكربت بيكون عن طريق دالة `input` ولكن فيه طريقة ثانية.
- هتعمل سكربت جديد هتسميه أي اسم..انا سميته `sys_argv.py` مثلاً..

```
from sys import argv
try:
    script=argv[0]
    user =argv[1]
    print('script name :',script)
    print('user name :',user)
except:
    print('no inputs from command line!')
```

Download script [sys\\_argv.py](#) from GitHub

- لو عملت `run` للسكربت في أي مكان هيحصل `exception` وهقولك ليه.. وهتظهر الرسالة `no inputs from command line`.
- والحل إنك تعمله `run` في الـ `command line` وتمرر له برامترات بعد اسم السكربت بالشكل ده `python script.py value1 value2 value n..` بالطريقة دي كل القيم اللي هتكتبها ومفصول بينها بمسافة وحتى اسم السكربت بعد كلمة `python` هتتحط في `list` اسمها `argv`.



```
E:\>
E:\>python sys_argv.py
no inputs from command line!

E:\>python sys_argv.py Hello World
script name : sys_argv.py
user message : Hello

E:\>python sys_argv.py Hello_World
script name : sys_argv.py
user message : Hello_World
```

- لما كتبت اسم السكرت بس ..كان `argv[0]` اسم السكرت ومفيهاش `argv[1]` فحصل exception.
  - لما كتبت بعد اسم السكرت `Hello World` وكان فيه مسافة بين الكلمتين فبقى `argv[0]` اسم السكرت و `argv[1]` كلمة `Hello` و `argv[2]` كلمة `World` عشان كده متطبعش غير كلمة `Hello`.
  - يعنى لو عاوز أبعث أى قيم للسكرت من خلال الـ `command line` بكتب القيم دى بعد اسم السكرت مفصول بينها بمسافة ويعمل `import` للـ `argv list` من مودول `SYS` وبطلع منها القيم.
- الطريقة دى حلوة لو عاوز تبعت قيم للسكرت بتاعتك من غير ما تستخدم دالة `input` وهتلاقيها مستخدمه فى برامج كتير قد تكون تعاملت مع بعضها لو متعاملتش فأديك عرفت أو فهمت البرامج دى بتاخذ الـ `inputs` ازاي من الـ `command line` حتى لو كانت معمولة بلغات تانيه.




## موديول smtpplib

موديول [smtpplib](#) أحد الموديولات اللى بنستخدمها فى إرسال إيميلات بلغة البايثون..  
و smtp ده البروتوكول الخاص بإرسال البريد الإلكتروني وتقدر تعرف عنه أكثر من هنا

## [Simple Mail Transfer Protocol](#)

## طريقة إرسال الإيميل

لو عندى مستخدم A عاوز بيعت إيميل لمستخدم B العملية هتتم أزي؟ 🤔



- فى البداية A لازم يكون مستخدم معروف لدى الـ mail server زى ما تكون مسجل إيميل على ياهو أو جيميل..وبالتالى بالإيميل ده تقدر تبعت وتستقبل الرسائل.
- لو المستخدم A بيعت رساله إلى B.. الرسالة بتروح للـ mail server الخاص بيه عن طريق بروتوكول smtp .





- ال mail server هيشوف عنوان الإيميل اللي مبعوت ليه الرسالة موجود على نفس السيرفر فيبعثها له على طول ولا على سيرفر تاني فيبعثها للسيرفر ده.
- مثل أنا عندي إيميل ياهو لما أبعث الرسالة هتروح للسيرفر بتاع ياهو smtp.mail.yahoo.com وبعدين السيرفر ده هيشوف أنا باعت الرسالة دي لإيميل yahoo فيبعثها له على طول ولا راجه لإيميل gmail مثلاً فيبعثها للسيرفر بتاع جيميل smtp.gmail.com .
- عملية إستقبال الرسائل تتم بروتوكول زى POP post office protocol ..

أعرف أكثر عن الموضوع ده من هنا [what-is-smtp-server](#)

- يعني عشان تبعت إيميل بلغة البايثون هتحتاج إيميل yahoo أو gmail والميل سيرفر بتاعهم. ومن تجربتي إتضح ليا إن استخدام ال yahoo account أسهل من gmail و هتعرف بعد شويه ليه وطبعاً أنت حر تستخدم اللي يناسبك..
- المهم في الأول هتسجل إيميل على yahoo أو gmail أو أى موقع بيقدم خدمة البريد الإلكتروني.
- مكيبية stmplib بتحتاج عنوان الإيميل اللي سجلت بيه والباسورد بتاعه بالإضافة لعنوان ال mail server للموقع اللي سجلت عليه.
- وطبعاً لما الموقع بتاع الإيميل يلاقى برنامج غريب عمل تسجيل دخول هيفتكره محاولة أختراق للحساب و وأقل واجب يعمل بلوك ويمنعه من إرسال إيميلات وده اللي بيحصل



- فيحتاج تفعل خاصية في الإيميل بتسمح للأجهزة والتطبيقات إنها تسجل دخول على الإيميل بتاعك .Let less secure apps access your account

بالنسبة لإيميل ياهو من خلال الـ security او أمان الحساب [security](#)

Allow apps that use less secure sign in



Some non-Yahoo apps and devices use less secure sign-in technology, which could be account vulnerable. You can turn off access (which we recommend) or choose to use it despite the risks.

[Learn more](#)

السماح للتطبيقات التي تستخدم تسجيل دخول أقل أمانًا  
تستخدم بعض التطبيقات والأجهزة غير الآمنة لـ Yahoo تقنية تسجيل دخول أقل أمانًا، وهذا قد يرضح حسابك لخطر في. يمكنك إيقاف إمكانية الوصول (هذا ما نوصي به) أو اختيار استخدامها بالرغم من المخاطر.  
تعرف المزيد

- بالنسبة لإيميلات الـ Gmail طريقة تفعيل الخاصية [من هنا](#) ويمكن تفعل الخاصية دي وبرده يعمل بلوك للطلبات اللى بيعملها السكرتير بتاعك وميخلهوش بيعت إيميلات..عشان كده بفضّل موقع ياهو.

- بعد كده تعرف عنوان الـ smtp server بالنسبة لياهو [smtp.mail.yahoo.com](mailto:smtp.mail.yahoo.com)

وبالنسبة لجيميل [smtp.gmail.com](mailto:smtp.gmail.com) وللمزيد من هنا <https://serversmtp.com>

دلوقتي عملنا إيميل على أى موقع وعرفنا الـ mail sever بتاعهم وجهزنا الإيميل إنه يبقى متاح لأي برنامج معاه الباسورد واليوزر بتوعه أنهم بيعتوا إيميلات من خلاله.. والخطوة الجاية هنبعت الإيميل بمكتبة `stplib`.

- أول حاجة هتعمل `import stplib` للكلاس اللى هتبعت الإيميل والكلاس `EmailMessage` اللى بتاخذ منها `object` بتحط فيها اجزاء الإيميل زي `from,subject,body` اللى بتبعتهم مكتبة `stplib`.



```
import smtplib
from email.message import EmailMessage
```

بعد كده هتعمل إعدادات الـ mail server والـ account بتاعك.

```
server =smtplib.SMTP(server,port)
server.starttls()
server.login(your_login_email,your_password)
```

- دالة SMTP بتاخذ أول برامتين عنوان السيرفر. لو كنت سجلت في yahoo وبيكون فهو smtp.mail.yahoo.com لو Gmail فهو smtp.gmail.com.
- والبرامتر التاني هو رقم البورت واللى بيكون 587 في حالة استخدامك لتشفير [TLS](#) transparent security layer وده من وسائل التشفير للإيميل في عملية الإرسال.
- وطبعاً لو حددت البورت 587 لازم تفعل TLS بالداله starttls.
- دالة login بتاخذ عنوان الإيميل بتاعك اللى سجلته وفعلت فيه خاصية less secure application access والباسورد بتاعه.

بعد كده هنجهاز الرسالة اللى هنبعتها.

```
msg = EmailMessage()
msg['From'] = your_login_email
msg['To'] = the_reciever
msg['Subject'] = "Python email"
body = "Python test mail"
msg.set_content(email_body)
```



- بتعمل object من الكلاس EmailMessage اللي بتحط فيه اجزاء الرسالة.. وتخلي بالك إن from لازم تكون الإيميل اللي عملت بيه تسجيل دخول في دالة login. أخيراً بتبعث للرسالة بدالة send\_message وتقفل السيرفر بدالة quit.

```
server.send_message(msg)
server.quit()
```

من الخطوات اللي فاتت عملت مودبول mail.py وده بيجمع كل الخطوات اللي فاتت.

```
import smtplib
from email.message import EmailMessage
def send(con, fields):
    server = smtplib.SMTP(con['server'], con['port'])
    server.starttls()
    server.login(con['from'], con['pass'])

    msg = EmailMessage()
    msg['From'] = con['from']
    msg['To'] = con['to']
    msg['Subject'] = con['subject']
    body=''
    for key, val in fields.items(): body+='%s : %s\n'%(key, val)
    msg.set_content(body)
    result=server.send_message(msg)
    server.quit()

    if result=={}:return True
    else:return False
```

Download script [mail.py](#) from GitHub



كل الفكرة إني عملت دالة وسميتها send بتاخذ برامتين.. الاول con وده dict فيه بيانات الإتصال mail server,email,password والحاجات دي والبرامتر الثاني dict برده فيه الرسالة أجزاء الرسالة وتعالى نشوف مثال لاستخدام الموديول ده.

```
from mail import send
con={'server' : 'smtp.mail.yahoo.com',
    'port' : '587',
    'from' : '...@yahoo.com',
    'pass' : '****',
    'to' : '...@gmail.com',
    'subject' : 'User'
}
fields={'name':'Python Programmer',
'Age':23,
'phone':'1234',
'message':'I Love Python ❤️'
}


if send(con, fields):print('Done..')
else : print('failed..')
```

Download script [send\\_email.py](#) from GitHub

- هنا عملت import للدالة send في للموديول mail.py.
- في الـ dictionary اللي اسمها con أنا استخدمت mail server وأكونت بتوع ياهو وحدد الإيميل اللي هتتبعته الرسالة to طبعاً متنساش تستخدم الأكونت والباسورد الخاصين بك.
- في الـ dictionary التانيه fields دي أجزاء الرسالة.



ده شكل الرسالة لما وصلت على أكونت Gmail



وأخيراً لو عاوز امثلة اكثر وازاي تبعت مرفقات attachment مع الإيميل أو صفحات

بتنسيق html رى الإعلانات اللى بتجيك على الإيميل تقدر تكمل من هنا [email.examples](http://email.examples)



## الحزم Packages.

Name
__pycache__
test
__init__.py
dbapi2.py
dump.py

لو فاكتر لما فتحنا الفولدر Lib اللى جواه

مكتبات البايثون لقينا فيه مكتبات على شكل

سكرت بايثون واحد أو موديول .py. وكان

فولدرات جواها موديولات.

الفولدر ده اسمه حزمه Package.. وهو عبارة عن اكثر من موديول يتم جمعهم فولدر.

## ليه بنعمل الـ Package !?

- لما تبقى المكتبة كبيرة ومن الأفضل إنك تقسهما على أكثر من موديول كنوع من التنظيم.
  - لما تعمل مشروعك أو مكتبتك فى Package بتبقى مضغوطة بصيغة معينة زى .whl. وتقدر تثبتها بسهولة أو تنشرها وأى حد يستخدمها.
- لو بتعمل أى مشروع وهتحتاج لمكتبات تساعدك..هتبحث وتشوف المكتبات الموجودة فى الـ standred library هل كفاية ليك ولا محتاج تحمل مكتبات من على الأنترنت.. وساعتها هتدور على packages تثبتها على جهازك.



## موقع PyPi

الموقع ده المستودع الأكبر لكل المكتبات والـ Packages للغة البايثون اللي من خلاله تقدر تبحث وتحميل المكتبات اللي أنت عايزها ولو ربنا فتح عليك وعملت مكتبة تقدر تنشرها من خلاله والمستخدمين يحملوها [pypi.org](https://pypi.org)

## Find, install and publish Python packages with the Python Package Index



تعالى ندور على اسم أى مكتبة ونشوف هنتبتها عندنا أزاى... مثلاً مكتبة numpy ودى مكتبة بتخليك تستخدم المصفوفات متعددة الأبعاد multi-dimensional arrays ودى من الحاجات المش متوفرة فى الـ standard library فى لغة البايثون وهنحتاجها وهنتكلم عنها فى الفصل اللي جاى فى موضوع معالجة الصور... المهم هتبحث عن اسمه numpy.

### numpy 1.15.2

✓ Latest version

pip install numpy

Last released: About 4 days ago

NumPy: array processing for numbers, strings, records, and objects.

#### Navigation

Project description

Release history

Download files

#### Project description

NumPy is a general-purpose array-processing package designed to efficiently manipulate large multi-dimensional arrays of arbitrary records without sacrificing too much speed for small multi-dimensional arrays. NumPy is built on the Numeric code base and adds features introduced by numarray as well as an extended C-API and the ability to create arrays of arbitrary type which also makes NumPy suitable for interfacing with general-purpose data-base applications.





طبعاً طبيعتك الفطرية هتروح ناحية download files وهتحمل ملفات المكتبة وأبقى

وريني هتثبتهم ازاي 🤖.

```
pip install numpy
```

الحقيقة بايثون عملت طريقة اسهل من كده اسمها pip ولعلك تكون لمحت الامر اللي من فوق .. تعالو هنا عشان نعرف ايه الـ pip ده.

## أداة PIP

الـ pip ده أداة او نظام لإدارة المكتبات والـ packages فى لغة البايثون من خلاله تقدر تثبت وتحديث المكتبات وتلغى تثبيتها وتعتبر طريقة سهلة وعملية جداً وهتوفر عليك كتير.

pip بتتعامل معاه من الـ command line يعنى لازم تكون بتعرف تتعامل مع CMD أو Terminal كما يسمى فى نظام لينكس.

من الجميل إنك مش بتحتاج تثبت برنامج الـ pip لانه بيجى مع لغة البايثون فتقدر تتأكد إنه موجود بأنك تفتح الـ command line وتكتب فيه `pip --version` ..

```
C:\Users\Mahmoud>pip --version
pip 10.0.1 from c:\users\mahmoud\appdata\local\programs\python\python36-32\lib\site-packages\pip (python 3.6)
```

لو مش موجود الـ command line هيقولك انت بتقول أيه 🤖 وتعرف إنك متحاج تثبته بنفسك وياريت متكسلش عشان هيفيدك جداً.

ووى طريقة تثبته [installing pip](#).



## أوامر PIP

- عشان تثبت مكتبة او Package بتكتب **pip install** + اسم المكتبة اللي هتعرفه من موقع PyPi او هتنسخ الأمر كله من هناك

```
pip install package_name
```

- عشان تعمل تحديث للـ Packages بتكتب الأمر **--upgrade** قبل اسم المكتبة..

```
pip install --upgrade package_name
```

- عشان تمسح الـ Package.

```
pip uninstall package_name
```

- عشان حدث الـ pip نفسه لأنك لو شغال على إصدار قديم هتحصل معاك بعض المشاكل

```
pip install --upgrade pip
```

طبعاً عارفنى مش جيب كل حاجة من الـ documentation يا دوب الكلمتين اللي

هينفعونا وعشان يقولوا أننا جامدين وبنستخدم الـ pip 🤖

لو انت عاوز تكمل وتشوف باقى الأوامر من هنا [quickstart](#) .. لكن أعلم إنى جيبك الخلاصة.



## استخدام PIP

```
pip install numpy
```

قولنا عاوزين نثبت مكتبة [numpy](#) .. هنروح موقع [pypi](#)

تاني ناخذ منه اسم المكتبة أو تنسخ الأمر كله وخطه في الـ command line عشان يبدأ التثبيت.

```
C:\Users\Mahmoud>pip install numpy
Collecting numpy
  Downloading https://files.pythonhosted.org/packages/ff/e9/7ee1eefad3ac289cf609c2b9305afe6362f75855/numpy-1.15.2-cp36-none-win32.whl (9.9MB)
    100% |#####| 9.9MB 20kB/s
Installing collected packages: numpy
Successfully installed numpy-1.15.2
```

بعد ما تثبت المكتبة ويقولك successfully installed بالمره عشان تتأكد أنها أتثبتت وتام. أفتح الـ python interpreter في الـ command line وأعملها `import numpy`.

```
C:\Users\Mahmoud>python
Python 3.6.3 (v3.6.3:2c5fed8, Oct 3 2017, 17:26:49) [MSC v.1900 32 bit (Intel)] on win32
Type "help", "copyright", "credits" or "license()" for more information.
>>> import numpy
>>> numpy.__file__
'C:\Users\Mahmoud\AppData\Local\Programs\Python\Python36-32\lib\site-packages\numpy\__init__.py'
```

وأستخدمنا المتغير `__file__` عشان أعرف مكان الـ Package أتثبتت فين.. المكتبات اللي بتثبتهم عن طريق pip بيروحوا في مجلد اسمه site-packages جوه مجلد `lib`.

## عمل مكتبة Packaging

هتسألني في الأول أنا هعملها ليه أصلاً 😊؟ .. هتعملها عشان لما رينا يكرمك تقدر تعمل مكتبة مهمة وترفعها على موقع [pypi](#) وده الموقع الرسمي اللي هتحمّل منه المكتبات والحزم اللي هتحتاجها في مشاريعك.



قولنا المكتبة عبارة عن مجموعة من الموديلوز modules فى مجلد بيتم ضغطه بطريقة معينة عشان تترفع على موقع pypi أو أى موقع والمستخدم العادى يحملها يعملها install عن طريق pip.

عاوزين نعمل Package قابلة للتثبيت للموديول [factorial.py](#) اللى علمناه عشان يحسب مضروب العدد.

```
-factorial
  -__init__.py
-setup.py
-LICENSE
-README.md
```

- هتعمل فولدر وتسميه facotrial وهتحط جواه السكرت factorial.py اللى هتغير اسمه وتخليه تسميه \_\_init\_\_.py
  - لما تحط سكرت \_\_init\_\_.py جوه فولدر ده بيعرف ال interpreter إن الفولدر ده فيه موديولات للغة البايثون.
  - ولما تعمل import للموديول بيكون كده **import factorial** وفى الحاله دى هيعمل import للسكرت \_\_init\_\_.py اللى جوه الفولدر factorial..
  - بره الفولدر facotrial هتعمل ملف README.md (مش ضرورى) ولو كنت من مستخدمين GitHub هتعرف إن الملف ده بيتكتب بتنسيق معين اسمه Markdown وده بيتحط فيه وصف وشرح المكتبة.
  - هتعمل ملف LICENCE (مش ضرورى) وده بيتحط فيه رخصة المكتبة.
  - ملف setup.py وده مهم جداً وده اللى فيه أعدادات تثبيت المكتبة.
- لما تعمل تثبيت للمكتبة بتاعتك عن طريق pip .. هيستنسح المجلد factorial لفولدر lib/site-packages ولما تعمل استدعاء للمكتبة هيكون بالشكل ده import factorial.



- هتيجى فى المجلد الرئيسى وتعمل ملف README.md اللى هيكون بالشكل ده

```
#Factorial
factorial has magic function to calculate the factorial of any numbers ^_^
```

- لما ترفع المكتبة بتاعتك على GitHub مثلاً ملف readme ده زى الـ documentation

اللى بتعرف الناس المكتبة دى بتعمل ايه .. فى تنسيق الـ md أي سطر يبدأ بـ # مش

تعليق زى البايثون انما بيبقى Header أو عنوان حجمه اكبر زى tag <h1> فى لغة html

ويرده لو بتشتغل على GitHub هتكون فاهم الحوار 🗨️

- هنرجع ملف setup.py وهو ده الأهم هتخط فيه الكود ده ..

```
import setuptools
long_description = open("README.md", "r").read()
setuptools.setup(
    name="factorial",
    version="0.0.1",
    author="Mr python",
    author_email="author@example.com",
    description="A small example package",
    long_description=long_description,
    long_description_content_type="text/markdown",
    url="anyurl",
    packages=setuptools.find_packages(),
    classifiers=[
        "Programming Language :: Python :: 3",
        "License :: OSI Approved :: MIT License",
        "Operating System :: OS Independent",
    ],
)
```

Download script [setup.py](#) from GitHub

- الملف بيعمل import لمكتبة setuptools ودى مكتبة فيها مجموعة مودبولات

بتسهل عليك خزيم وعمل الـ Packages.



- في البداية يقرأ النص اللى فى ملف README ويحطه فى متغير long\_description  
عشان متسألش السطر ده بيعمل ايه.
- باقى المتغيرات .. name ده اسم ال package بتاعتنا احنا خلناه factorial و version  
ده رقم النسخة .. Author اسمك كصاحب الباكجج ..
- بعدين متغير الوصف description والوصف الطويل long\_description اللى هو  
ملف README ..
- متغير packages ده بتحدد فيه المجلد أو المجلدات اللى فيها ملفات المكتبة بتاعتك  
وعندك طريقتين . إما تحدد اسم المجلد اللى فيها ملفات البايثون اللى هو package  
بالطريقة دى packages = ['factorial'] .. أو تخلق مكتبة setuptools تدور بنفسها  
على أى فولدر فيه ملف اسمه \_\_init\_\_.py وتعتبره هو المكتبة بدالة find\_package.  
كده جهزنا المكتبة بتاعتنا ناقص نعملها packaging .. الخطوة الجاية لازم تكون بتعرف  
تشتغل على ال command line عشان تقدر تعمل خزيم للمكتبة ..
- فى الأول عن طريق pip هتعمل تحديث للمكتبات setuptools و wheel.

```
pip install --upgrade setuptools wheel
```

- طبعاً شوفت السكريبت setup.py وعرفت إن setuptools دى بتحدد فيها ملفات  
وبيانات المكتبة اللى عاوز تعملها Packaging .. أما wheel ودى بتضغط للمكتبة أو



بصيغة whl. عشان تبقى ملف واحد جاهز للرفع على موقع PyPi ونشرها لأى حد  
يحملها ويثبتها.

- بعدن أفتح الـ command line على المسار اللى فيه ملفات المكتبة ونفذ الأمر ده.

```
python setup.py sdist bdist_wheel
```

..أنا مثلاً حطيت الملفات فى فولدر اسمه package فى البارتيشن E فدخلت للمسار ده  
ونفذت الأمر.

```
E:\>cd package
E:\package>dir
Volume in drive E is Mahmoud
Volume Serial Number is 6BFA-A0A0

Directory of E:\package
09/28/2018  11:15 PM  <DIR>          .
09/28/2018  11:15 PM  <DIR>          ..
09/28/2018  11:11 PM  <DIR>          factorial
09/28/2018  11:13 PM                87 README.md
09/28/2018  11:13 PM                573 setup.py
                2 File(s)          660 bytes
                3 Dir(s)    21,981,188,096 bytes free

E:\package>python setup.py sdist bdist_wheel
```

- لو ظهرت عندك أخطاء تبقى معلتش الخطوة اللى فاتت بتاعة تحديث wheels
- ولو العملية تمت بنجاح .. هتفتح الفولدر هتلاقى اتولد فيه فولدرين build و dist .
- جوة الفولدر dist هتلاقى الملف whl. وده بيمثل المكتبة بتاعتك جاهزة للرفع على موقع PyPi وأى حد يقدر يحملها ويثبتها..بس الاول تعالى نثبتها احنا عندنا ونجربها 🍷
- هتدخل الـ command line جوة الفولدر dist هتلاقى فيه الـ Package وهو ملف whl. اسمه زى كده factorial-0.0.1-py3-none-any.whl



- هتعمله install باك `pip install` + اسم الملف بتاع الباكج.

```
E:\package>cd dist
E:\package\dist>dir
Volume in drive E is Mahmoud
Volume Serial Number is 6BFA-A0A0

Directory of E:\package\dist

09/28/2018  11:17 PM    <DIR>          .
09/28/2018  11:17 PM    <DIR>          ..
09/28/2018  11:17 PM                1,475 factorial-0.0.1-py3-none-any.whl
09/28/2018  11:17 PM                1,084 factorial-0.0.1.tar.gz
                2 File(s)        2,559 bytes
                2 Dir(s)      21,981,188,096 bytes free

E:\package\dist>pip install factorial-0.0.1-py3-none-any.whl
Processing e:\package\dist\factorial-0.0.1-py3-none-any.whl
Installing collected packages: factorial
Successfully installed factorial-0.0.1
```

لو التثبيت تم بنجاح هيقولك `successfully installed` وعلى طول تفتح

ال `python interpreter` وتجرب المكتبة العظيمة بتاعتنا 😊

```
E:\package\dist>python
Python 3.6.3 (v3.6.3:2c5fed8, Oct  3 2017, 17:26:49) [MSC v.1900 32 bit (Intel)] on win32
Type "help", "copyright", "credits" or "license" for more information.
>>> import factorial
>>> factorial.fact(6)
720
>>> print(factorial.__file__)
C:\Users\Mahmoud\AppData\Local\Programs\Python\Python36-32\lib\site-packages\factorial\__init__.py
>>>
```

وطبعاً بالمتغير `__file__` جيتلك المسار اللي راحت فيه ملفات المكتبة بعد التثبيت وهو

`.lib/site-packages/factorial`

تقدر من هنا تحمل ملفات ال [Package](#)


وللمزيد عن الموضوع ده وعشان تعرف أزي ترفع ال `Packages` بتاعتك على موقع `PyPi`

كامل من الروابط ده [packaging-projects](#) و [Distutils - Tutorial](#)





## الفصل 4 – تخزين البيانات Data Storages



Variables التخزين في المتغيرات ✓

Files التخزين في الملفات ✓

Database التخزين في قواعد البيانات ✓



## التخزين في المتغيرات Variables

لحد الآن التخزين بتاعنا على مستوى الذاكرة.. نقدر نزن فيها متغيرات بأنواعها ونسترجعها في أى وقت بس لما نقل البرنامج كل حاجة بتروح.. لكننا عاوزين نزن الداتا بشكل دائم وبطريقة منظمة بحيث إننا نقدر نسترجعها في أى وقت وتفضل موجودة بعد ما نقل البرنامج.

عشان كده عملوا طرق تخزين البيانات المختلفة اللي ممكن نزن الداتا في ملفات Files او في قواعد بيانات database تكون موجودة على الجهاز بتاعك أو موجودة على سيرفر تاني وتتصل بيها أونلاين.

واستخدامك للطرق دي يعتمد على شكل الداتا اللي عاوز نزنها وحجمها وطبيعة البرنامج بتاعك.

- في الجزء ده هديك مشكلة وهندور ليها على حلول مع بعض وهنشوف أيه أنسب حل ليها واللي ينفع تستخدمه في تطبيقاتك المختلفة.

student	class	section	percentage
ahmed	1	a	90
aly	2	b	80
adam	3	c	70

- اللي قدامك ده جدول بسيط جداً فيه اسم كل طالب والفرقة بتاعته والسكشن والنسبة المئوية.



- عاوزين نعمل سكرت بلغة البايثون يطلب منا إدخال الاسم والصف والسكشن والنسبة لكل طالب وبعدين نقدر نبحت عن كل طالب باسمه ونشوف البيانات بتاعته اللي خزناها.

سيبك من التخزين دلوقتي وتعالأ نشوف السكرت شكله ايه..

- في الأول إيه الـ data type المناسب اللي أأزن فيه البيانات بتاعة الـ students؟ 🤔
- الأنسب هو dictionary.. فعملنا dict اسمه students

```
students={}
```

- بعدين هنعمل دالة ونسميها insert ودي هتستقبل من اليوزر عن طريق دالة input بيانات كل طالب

```
def insert():
    while True:
        name=input("Student Name : ")
        _class=input("Student Class : ")
        section=input("Student Section : ")
        percent=input("Student Percentage : ")
        student={'class':_class, 'section':section, 'percent':percent}
        students[name]=student
        agin=input("Any More ? ")
        if(agin!='yes'):break
```



- لما تعمل call للدالة insert هتدخل في جملة while loop عشان تقدر تدخل بيانات أكثر من طالب.
  - عن طريق دالة input هنقرى من المستخدم name و class\_ وتلاحظ عملت \_ قبل المتغير لأن كلمة class من الكلمات المحجوزة.. و section و percent.. وهيتحتوا في dict برده كل key والقيمة بتاعته.
  - الـ dict دى هتخزن في students بالـ key اللي هو اسم الطالب name.
  - أخيراً دالة input هتسألك any more.. لو عاوز تدخل بيانات طالب تاني هتكتب yes هتروح في المتغير again اللي لو مكنش yes هيعمل break ويطلع من التكرار وبكده نكون خلصنا نعمل insert.
- ده شكل الدالة لما تعملها call وتدخل البيانات.

```
Student Name : Ahmed
Student Class : 1
Student Section : A
Student Percentage : 90
Any More ? yes
Student Name : Ali
Student Class : 2
Student Section : B
Student Percentage : 80
```

وده شكل students بعد ما دخلنا فيها بيانات اتنين طلاب

```
{'Ahmed': {'class': '1', 'section': 'A', 'percent': '90'},
'Ali': {'class': '2', 'section': 'B', 'percent': '80'}}
```



- بعدين عملنا دالتين search دى عشان نبحث بيها عن بيانات الطالب و remove عشان نمسح الطالب من students.

```
def search():
    name=input("Enter Student Name : ")
    if name in students:
        print('Name :',name)
        for key,value in students[name].items():
            print(key,':',value)
    else : print('student not found')

def remove():
    global students
    name=input("Enter Student Name : ")
    if name in students:students.pop(name)
    else : print('student not found')
```

- الدالتين زى بعض..كل دالة بتقرى اسم الطالب عن طريق دالة input وتخزنه فى متغير name.. لو الاسم موجود name in students تعمل print للـ value بتاعته اللي هى بيانات الطالب فى حالة دالة search أو تمسحه بدالة pop فى حالة remove.

وده شكل البرنامج لما تعمل call للدالة search بعد ما سجلنا بيانات طالب اسمه Ahmed مثلاً.

```
Enter Student Name : ahmed
student not found
Enter Student Name : Ahmed
Name : Ahmed
class : 1
section : A
percent : 90
```



- آخر حاجة ربطنا الدوال في جملة تكرار تطلب مننا أَدْخَال 1 عشان نعمل insert  
 أو 2 عشان نعمل search و 3 عشان نعمل remove و 4 عشان يعرض كل الـ keys  
 في students واللى هم اسماء الطلاب إن وجدوا و 0 للخروج من التكرار ده.

```
while True:
    x = input('1-Insert 2-Search 3-Remove 4-Students 0-Exit ? : ')
    if (x=='1') : insert()
    elif(x=='2') : search()
    elif(x=='3') : remove()
    elif(x=='4') : print(list(students.keys()))
    elif(x=='0') : break
```

السكرت كامل لو عاوز حمله [storages1.py](#) وده شكل البرنامج لما تعمله run

```
1-Insert 2-Search 3-Remove 4-Students 0-Exit ? : 1
Student Name : Mahmoud
Student Class : 3
Student Section : C
Student Percentage : 97
Any More ? yes
Student Name : Noor
Student Class : 1
Student Section : B
Student Percentage : 88
Any More ? no
1-Insert 2-Search 3-Remove 4-Students 0-Exit ? : 4
['Mahmoud', 'Noor']
1-Insert 2-Search 3-Remove 4-Students 0-Exit ? : 2
Enter Student Name : Mahmoud
Name : Mahmoud
class : 3
section : C
percent : 97
1-Insert 2-Search 3-Remove 4-Students 0-Exit ? : 3
Enter Student Name : Noor
1-Insert 2-Search 3-Remove 4-Students 0-Exit ? : 4
['Mahmoud']
```



لحد الآن وكل حاجة تمام وبنخزن ونمسح ونبحث.. بس المشكلة إن البرنامج بتاعنا لما نقفله ونعمله run من جديد مش بنلاقى الـ students اللي خزنناهم عشان بيحفظهم في الـرامه فترة تشغيل البرنامج ولما تقفله على طول المتغيرات بتروح.

الحل إننا نستخدم إحدى طرق التخزين الدائم اللي هتكون اما الملفات Files او قواعد بيانات

. Databases

## الملفات Files

في الجزء ده هنشرح إزاي تخزن الداتا في ملف على الجهاز وزاي تسترجعها تاني وزاي تنشئ وتمسح وتعمل اعادة تسمية للملفات والمجلدات.

## File Object

عشان نحفظ أو نقرى الداتا بتاعتك من ملف لازم تعمل file object وبأختصار ده اويجكت لكلاس built in اسمها TextIOWrapper بتحدد من خلاله اسم الملف اللي هتتعامل معاه والـ access mode او طريقة تعاملك مع الملف ده وطريقة تخزين الداتا فيه بالإضافة إن الـ object ده فيه الـ methods اللي من خلالها هتقرى وتخزن الداتا .read,write

عشان تعمل file object في لغة البايثون عندك اكثر من طريقة.. منها دالة open في مودول io أو الاختصار لها الدالة open مباشرة ودي built-in function.



```
import io
file_object = io.open(file_name, access_mode)
```

```
file_object = open(file_name, access_mode)
```

- البرامتر الاول file\_name اسم الملف اللي هتخزن فيه الداتا أو هتقرى منه
- البرامتر التانى access\_mode طريقة وصولك للملف وتشفير الداتا فيه.
- بالنسبة للـ access mode بتحدد من خلاله إنت عاوز تفتح الملف ده عشان تقرى منه read ولا تخزن فيه write.
- ولو مثلاً هتخزن نص فالملف هنا اسمه text file والـ string اللي هتخزن فيه هيكون معمولة encoding بتكويد UTF-8 أو cp1252 على windows.
- الموضوع بيختلف لو عاوز تخزن صورة مثلاً فى الحالة دى الملف اسمه binary file وتخزين وقراءة الداتا من الملف ده بيكون فى binary modes زي ما هنعرف.
- يبقى أنت بتحدد الملف ده text file ولا binary file من خلال الـ access mode.
- ودى قيم الـ access mode اللي تقدر تستخدمها..

Access Mode	Usage
r	للقراءة فقط
w	للكتابة فقط
w+	للقراءة والكتابة لكن فى الحالة دى لو الملف كان فيه نص وكتبت عليه نص جديد اللي فيه بيتمسح وبيعمل overwrite





a+	للكتابة والقراءة read and write وفي الحالة دي لو الملف فيه نص وعملت كتابه بيضيف تحته النص الجديد يعنى بيعمل overwrite مش append
rb	للكتابة فقط في نظام binary
wb	للكتابة فقط في نظام binary
wb+	للكتابة والقراءة في نظام binary
ab+	للكتابة والقراءة (appending) binary

هنشتغل على الـ interactive interpreter

```
>>> x = open('E://test.txt', 'w+')
>>> x
<_io.TextIOWrapper name='E://test.py' mode='w+' encoding='cp1252'>
```

- عملنا file object اسمه x.. وعملنا ملف test.txt في البارتيشن E: على ويندوز وده مسار معروف بالنسبة لى وطبعاً تقدر تعمل الملف في أى مسار تقدر توصله.
- الـ access mode للقراءة والكتابة read and overwrite.
- لو روحت المسار اللى حددته.. بمجرد ما عملت open هتلاقى ملف فاضي اسمه test.txt.
- لو كنت لسه فاتح الـ interpreter وحاولت تمسح الملف أو تعدل فيه مش هيسمحك بكده لأنه مفتوح عن طريق مفسر البايثون وده هيعرفنا بأخر ميثود المفروض كنت عرفتك عليها وتابعة للـ file object وهى close

```
File_object.close()
```



- أكتب في المفسر (`x.close()`) وهيقفل الـ I/O stream المفتوح ولو حاولت تمسح الملف أو تعدل عليه هتقدر ومفيش مشاكل.

لو عاوز تعرف باقى الـ methods الموجود فى كلاس `TextIOWrapper` عن طريق دالة `dir(x)`.

```
>>> dir(x)
['_CHUNK_SIZE', '__class__', '__del__', '__delattr__', '__dict__', '__dir__', '__eq__', '__exit__', '__format__', '__ge__', '__getattr__', '__getstate__', '__init__', '__init_subclass__', '__iter__', '__le__', '__lt__', '__ne__', '__reduce__', '__reduce_ex__', '__repr__', '__setattr__', '__sizeof__', '__str__', '__checkClosed__', '__checkReadable__', '__checkSeekable__', '__checkWritable__', '__finalize__', 'closed', 'detach', 'encoding', 'errors', 'fileno', 'flush', 'isatty', 'line_buffering', 'newlines', 'read', 'readable', 'readline', 'readlines', 'seek', 'seekable',
```

عشان متحفش منهم 🤪 أنا مش عاوزك خاف أحنأ مش هنستخدم غير 5 دوال وهم `write` و `read` و `tell` و `seek` و `close` وهقولك بيعملوا ايه ودول تقدر توصلهم من خلال الأوبجكت `x` او الـ `file object` اللى عملناه عشان لما نيجى نكتب حاجة جوة ملف نصى ونستخدم دالة `write` ونعملها بالشكل ده `x.write()` متقوليش ليه الدالة دى تبع المتغير `x` مش `built-in` زى دالة `open` مش تابعة لأى حد.

## دالة write

```
>>> x = open('E://test.txt', 'w+')
>>> x.write('Hello Python ^_^')
16
>>> x.close()
```

- فى الأول فتحنا ملف اسمه `test.txt` فى البارتیشن E طبعاً تقدر تخلى المسار زى ما انت عايز و `access mode` بتاع الملف كان `w+` عشان نقدر نقرى ونكتب فيه.
- و كتبنا فيه جمل `^_^ Hello Python` بدالة `write`.



- روح للمسار وأفتح الملف هتلاقيه برده لسه فاضى 😊 الحقيقة لازم تعمل close للمف

test.txt - Notepad

```
File Edit Format View Help
Hello Python ^_^
```

عشان المحتوى يظهر فيه.

بعد ما تعمل close أفتح الملف وهتلاقيه كده.

- لو كررت الخطوات مرة ثانية وعملت

test.txt - Notepad

```
File Edit Format View Help
Hello Again ^_^
```

x.write(' Hello Again ^\_^') وفتحت الملف

هتلاقى النص الجديد بس اللي موجود عشان

عمل overwrite وده لأن الـ access mode عاملينه w+ و لو عاوز يضيف النص الجديد

على القديم غير الـ access mode وخليه a+.

## دالة read

تمام دلوقتى احنا كتبنا فى ملف نصى وقفلنا البرنامج وجينا عاوزين نسترجع الكلام اللي

كتبناه تانى ده بنعمله بدالة read .

- هنفتح الملف test.txt المرة دى بالمود w+ للقراءة والكتابة أو للقراءة فقط r.. بس الأول

اتأكد انه مش فاضى فيه الجملة اللي كتبناها.

```
>>> x = open('E://test.txt', 'r')
>>> x.read()
'Hello Again ^_^'
```



- لو حاولت تعمل read مرة تانيه لنفس الملف هيطلعلك نص فاضى مش هيرجع المحتوى بتاع الملف طيب ليه 😊؟

```
>>> x.read()
''
```

- لما عملت read لأول مره الـ interpreter خلى الـ cursor بتاعه أو الـ position اللى بيقرى منه عند اخر الملف.. فلما عملت read تانى بدأ يقرى من الآخر فملقاش حاجة والحل طبعاً فى الدالتين الجايبين 😊

## دالة tell و seek

باختصار دالة tell بتقولك المفسر واقف فين أو هيبدأ يقرى الملف من أى position.

لما تعمل open للملف وتعمل read لأول مره دالة tell هترجعلك 0 وبعد ما تعمل read هيووقف عند اخر حرف فى الملف فدالة tell هترجعلك طول الملف او عدد الحروف..

دالة seek دى بتاخذ برامتر واحد وهو position وبتحدد المكان اللى عاوز توقف عنده وتعالى نشوف بالأمثله..

```
>>> x = open('E://test.txt', 'r')
>>> x.read()
'Hello Again ^_^'
>>> x.read()
''
```

فى الأول عملنا read للملف  
ولما عملنا read تانى رجع نص فاضى.

```
>>> x.tell()
15
```

قولنا نشوف الـ position اللى بيقرى  
منه بدالة tell طلوع واقف فى آخر الملف.



<pre>&gt;&gt;&gt; x.seek(0) 0 &gt;&gt;&gt; x.read() 'Hello Again ^_^'</pre>	<p>نقلنا الـ position لأول حرف بدالة seek وعملنا read فقراً محتوي الملف كله.</p>
<pre>&gt;&gt;&gt; x.seek(5) 5 &gt;&gt;&gt; x.tell() 5 &gt;&gt;&gt; x.read() ' Again ^_^'</pre>	<p>ونقدر بدالة seek نقرى جزء بس من الملف مش الملف كله باننا نجد position بدالة seek</p>

كده تمام ..وياريت لما تخلص لعب متنساش تقفل الملف الله يكرمك 🙏

## دالة readlines

الـ object file فيه دوال كتير أهمهم read و write و seek و tell ولو كنت مركز فوق

test.txt - Notepad

File Edit Format View Help

Hello Again ^\_^

A

B

C|

هتبقى عارف فائدة كل وحده فيهم .

فيه دالة جملية اسمها readlines بس قبل ما أقولك دى

بتعمل أيه.. روح أفتح الملف اللى كنا شغالين عليه وأفتح

بالنوت باد وأعمل فيه أكثر من سطر أى كلام المهم عاوزينه يبقى multiline أتصرف 🙏

- دلوقتى قولنا دالة read بتقرى الملف كله أو بتحدد لها المكان بدالة seek وهى تقرى من بدايته.

- لو عاوز نقرأه كسطور lines كل سطر يكون عنصر فى list فده بتعمله بدالة

readlines



```
>>> x = open('E://test.txt', 'r')
>>> lines = x.readlines()
>>> lines
['Hello Again ^_^\\n', 'A\\n', 'B\\n', 'C\\n', 'D']
>>> lines[0]
'Hello Again ^_^\\n'
>>> lines[1]
'A\\n'
```

## موديول OS

موديول OS ده تبع الـ standard library و يعتبر موديول مهم جداً وعلى ذكر الملفات موديول OS فيه دوال تقدر تستخدمها فى مسح ونسخ وعمل وإعادة تسمية الملفات والمجلدات الاول.

<code>import os</code>	استدعاء الموديول
<code>os.mkdir(path)</code> <code>&gt;&gt;&gt; os.mkdir('E://folder')</code>	دالة <code>mkdir</code> بتعمل مجلد جديد. هنا عملنا فولد فى البارتيشن E: اسمه <code>folder</code>
<code>os.rmdir(directory_path)</code> <code>&gt;&gt;&gt; os.rmdir('E://folder')</code>	دالة <code>rmdir</code> بتسمح الفولدرات هنا مسحنا الفولدر اللى اسمه <code>folder</code>
<code>os.rename(old_name', new_name)</code> <code>&gt;&gt;&gt; os.rename('E://test.txt', 'E://test2.txt')</code>	<code>rename</code> بتعمل إعادة تسمية للملف او المجلد. هنا غيرنا اسم الملف <code>test.txt</code> الموجود فى المسار E: إلى <code>test2.txt</code>
<code>os.remove(file_path)</code> <code>&gt;&gt;&gt; os.remove('E://test2.txt')</code>	دالة <code>remove</code> بتستخدم لمسح الملفات. هنا مسحنا الملف <code>test2.py</code>

ولو عاوز تعرف أكثر عن موديول `OS`، ولو عاوز تتعمق أكثر فى نظام الملفات كمل من هنا [iO](#).



## تطبيق على الملفات

خلاص ننسى OS ونرجع للـ files تاني.. شرحتكك طريقة تخزين وأسترجاع الداتا من الملفات بشكل منفصل.. دلوقتي هنستخدمها في سكرت تخزين بيانات الطلاب اللي قولنا من مشاكله بنخزن البيانات في متغيرات في الميموري ومحتاجين نخزنها بشكل دائم على الجهاز.

هنعدل في السكرت اللي عملناه [storages1.py](#)

- في أول السكرت هنضيف دالتين.. وحده بتعمل save للـ student dictionary في ملف نصي.. والثانيه هتعمل read وتقرى البيانات اللي خزناها.

```
def save():
    data=str(students)
    file=open("students.txt","w")
    file.write(data)
    file.close()

def read():
    global students
    try:
        file=open("students.txt","r")
        data=file.read()
        file.close()
        students=eval(data)
    except:
        students={}
```

- دالة save بتحول الـ dict students لنص string وتخزنه في ملف اسمه students.txt.



- لما ال dictionary فى البايثون يتحول لـ string هيبقى زى صيغة json string نقدر نقرأه تانى من الملف كنص عادى ونحوه إلى dictionary مره تانيه.
  - فى دالة read هنقرأ الملف students.txt اللى ربما ميكونش موجود وده أول مره قبل ما تخزن داتا فيه ويمكن يحصل exception.. فأننا نفاديت الموضوع ده بجملة try..except.
  - هنقرأ النص اللى فى students.py واللى هيكون شكله كده مثلاً لو خزنا بيانات طالب اسمه ahmed {'ahmed': {'class': '1', 'section': 'B', 'percent': '90'}}.
  - والصيغة دى عبارة عن نص string هى فعلاً على شكل ال structure بتاع ال dict ولكن مش dictionary أقدر اطلع منها values بالـ keys.
  - جل المشكله دى بدالة eval اللى بتعمل execute للنص ده وترجع ال object المقابل ليه وهو dictionary أقدر اخزنه فى المتغير students.
- طيب السؤال هنا وعلى السكرتير القديم.. المفروض نعمل save و read امتى؟ 🤔
- المفروض يا سيدى نعمل save كل مرة نعمل فيها insert لبيانات طلاب جدد أو لما نحذف remove بيانات طالب.. وبالتالي هنعمل call لدالة save فى الدالتين insert و remove.
  - والمفروض نعمل read مره وحده بس لما نفتح السكرتير عشان يقرأ البيانات المتخزنه فى الملف ويحطها فى ال students الموجود فى الميمورى.. وبالتالي هنعمل call للدالة read فى السكرتير نفسه.





```
students={}
read()
while True:
    x = input('1-Insert 2-Search 3-Remove 4-Students 0-Exit ? : ')
    if (x=='1') : insert()
    elif (x=='2') : search()
    elif (x=='3') : remove()
    elif (x=='4') : print(list(students.keys()))
    elif (x=='0') : break
```

ولو كنت توهت ولا حاجة لا تسمح الله هتحمّل السكرت من هنا [storages2.py](#) وتشوف

التعديلات اللي عملناها وأبقى ركز شوية والنبي 🙏

هنجرب نشغل السكرت ونشوف النظام.. المره دي شغلته في الـ command line.

```
C:\WINDOWS\py.exe
1-Insert 2-Search 3-Remove 4-Students 0-Exit ? : 1
Student Name : Ahmed
Student Class : 1
Student Section : A
Student Percentage : 88
Any More ? yes
Student Name : Ali
Student Class : 2
Student Section : A
Student Percentage : 87
Any More ? no
1-Insert 2-Search 3-Remove 4-Students 0-Exit ? : 4
['Ahmed', 'Ali']
1-Insert 2-Search 3-Remove 4-Students 0-Exit ? : 2
Enter Student Name : Ali
Name : Ali
class : 2
section : A
percent : 87
1-Insert 2-Search 3-Remove 4-Students 0-Exit ? :
```

لو فتحت الملف student.txt اللي هتلاقيه في نفس المجلد اللي شغلته منه السكرت

هتلاقيه زي كده.



```
students.txt - Notepad
File Edit Format View Help
{'Ahmed': {'class': '1', 'section': 'A', 'percent': '88'}, 'Ali': {'class': '2', 'section': 'A', 'percent': '87'}}
```

لو خرجت من البرنامج وشغلته تاني هتقدر تسترجع البيانات اللى خزنتها..

```
C:\WINDOWS\py.exe
1-Insert 2-Search 3-Remove 4-Students 0-Exit ? : 4
['Ahmed', 'Ali']
1-Insert 2-Search 3-Remove 4-Students 0-Exit ? : 2
Enter Student Name : Ahmed
Name : Ahmed
class : 1
section : A
percent : 88
1-Insert 2-Search 3-Remove 4-Students 0-Exit ? :
```

## نظام الملفات و قواعد البيانات File system vs Database

شوفنا في الجزء اللي فات طريقة تخزين البيانات في الملفات files وتعتبر طريقة سهلة وسريعة لو عاوز تخزن حاجة وتسترجعها..كل الفكرة إننا بنخزن نص ونسترجع نص لكننا خايلنا على النص ده بأنه كان على شكل التركيب structure بتاع الـ dictionary وقدرنا بدالة eval نحوله لـ dictionary نقدر نطلع منه keys و values وساعدنا على كده سهولة لغة البايثون ولو لغة تانيه كان ممكن ختاج تعمل parse للمصفوفة students لـ صيغة json ولما تسترجعها تعملها decode هو نفس اللي عملناه بس محسنناش بيه عشان اللغة سهلة وجميلة 😊



كلام جميل.. بس لو دقت في الموضوع أكثر هتلاحظ إن بيانات الطلاب كانت متخزنه في dict طول الوقت في الذاكرة و لما نعمل insert او remove لعنصر واحد بنحول الـ dict كلها لـ str وتخزنها في الملف النصي .. فلو كان عدد الطلاب كبير كبير هيستهلكتوا جزء كبير جداً في الذاكرة وعملية الكتابة للملف النصي هتكون بطيئة ومش فعالة.

فظهرت الحاجة لنظام تاني يتكون من جداول.. والجداول دي ليها علاقة ببعضها مش مجرد نص.. أقدر اطالع عنصر من الجدول ده بدل ما اطالع كله في متغير يستهلك الذاكرة وأدور جواه.. ممكن يكون فيه برنامج تاني او سيرفر تاني هو اللي بيتحكم في الجدول ملهوش علاقة بالبرنامج بتاعى والبرنامج بتاعى بيكلمه بلغة أستعلامات يقوله خزن القيمة دي في المكان الفلاني وهات القيمة دي من المكان البتجانى وهكذا.. 🤖

## قواعد بيانات SQL Databases

فعملنا نظام قواعد البيانات.. و لغة الأستعلامات دي هي لغة [SQL](#) أختصاراً

لـ Structured Query Language ودي اللغة اللي بتدير برامج وسيرفرات قواعد البيانات.. والبرامج والسيرفرات دي كتير زي Oracle, DB2, and Microsoft SQL Server, MySQL.

يبقى عشان تخزن داتا في قاعدة بيانات باستخدام لغة البايثون محتاج يكون عندك



- 1- سيرفر قواعد البيانات Database Server أو البرنامج اللى هيستقبل منك الأوامر والداتا من لغة البايثون ويخزنها وبطريقة منظمة ويسهل عليك حفظها وأسترجعها..والسيرفرات دى زى MySQL Server أو Microsoft SQL Server.
- 2- المكتبة الوسيطة بين لغة البايثون وسيرفر قاعدة البيانات Interface Module ودى اللى هتبعث الأستعلامات والداتا بتاعتك للبرنامج بتاع قاعدة البيانات.

## قاعدة بيانات SQLite3

كنوع من التبسيط عملوا نوع من قواعد البيانات الخفيفة lightweight ودى تصلح للتطبيقات البسيطة.. مش بتحتاج سيرفر أو برنامج يعمل لإدارة للقاعدة serverless يعنى مش هتحمّل أى برامج عشان تستخدمها.. يتم إدارتها من خلال مكتبة بلغة الـ C تابعة للغة ويتم حفظ ملف قاعدة البيانات فى مسار بيحدده المستخدم.

لو عاوز تعرف أكثر عنها من هنا [SQLite](#) .

والـ standard library للغة البايثون فيها موديول [sqlite3](#) ده الإنترنت بتاع القاعدة اللى هنتعامل معاها من خلاله.. والجميل إن قواعد بيانات SQLite يتم التعامل معاها باستعلامات SQL كأى Database Server زى Oracle و MySQL

## موديول sqlite3

- فى الأول عملنا import للمكتبه.. وهنا اخترت اسم sql للتبسيط.

```
>>> import sqlite3 as sql
```



- بعدين هنعمل connection object بدالة connect اللي بتاخذ برامتر وهو الاسم والمسار اللي هتتحفظ بيهم قاعدة البيانات

```
>>> con=sql.connect ("E://database.db")
```



- لو فتحت المسار ده واللى أنا اخترته عندي في البارتيشن E كالعاده وانت طبعاً حرفي مساراتك 😊 هتلاقى البرنامج أنشأ ملف اسمه database.db
- واحد هيسألني يعنى بعد اللفة الحوارات دي هيخزن الداتا في قاعدة البيانات اللي هي ملف أصلاً؟.. نعم بس هنا هتتعامل مع الملف بلغة أستعلامات محترمة وبطريقة منظمة أصبر وهتشوف 😊
- الـ connection object اللي عملناه con فيه مجموعة methods هنستخدمهم cursor,commit,close

## دالة cursor

- تاني خطوة بعد ما عملنا connection object وده اللي بينشـء قاعدة البيانات هنعمل cursor object بدالة cursor وده اللي فيه الدوال اللي هتكلم قاعدة البيانات وتبعتها. الأستعلامات وتخزن وتسترجع القيم فيها.

```
>>> import sqlite3 as sql
>>> con=sql.connect ("E://database.db")
>>> cur=con.cursor()
```



الـ cursor object فيه مجموعة دوال methods هنستخدم شوية قليلة منهم زي execute,fetchone,fetchall,rowcount وهنعرف فايدتهم ايه بس الموضوع كبير طبعا لازم تكمل مع نفسك.

## أستعلامات SQL queries

عشان تقدر تتعامل مع أى sql server لازم تتعلم لغة الأستعلامات واللغة دى عبارة عن أكواد بتنشئ الجداول فى قاعدة البيانات بأسماء وخانات أحنا بنحدها...وتعمل أذخال لقيم فى الجداول..وتعمل تحديث للقيم دى فى الجدال لو عاوزين نغيرها..وتعمل حذف للصف فى الجدول أو تحذف الجدول كله وهكذا.

لو معنكش فكرة عن لغة sql هناخد فكرة عن بعض الأستعلامات وهشرحها على السريع.. وللمزيد برشحلك الـ tutorial دى [sql](#) على موقع w3schools

## إنشاء جدول CREATE TABLE

```
CREATE TABLE table_name (
    column1 datatype,
    column2 datatype,
    column3 datatype,
)
```

- عشان تنشئ جدول فى قاعدة البيانات بتستخدم جملة CREATE TABLE بعدها اسم الجدول..وبين القوسين اسم الأعمد فى الجدول ونوع الداتا اللي هنخزنها فيهم.



- أنواع البيانات يمكن تكون INT,FLOAT لو نص هيبقى TEXT أو MEDIUMTEXT أو LONGTEXT .. ويتحدد النوع حسب طول البيانات اللي هتخزنها هل هي اسم رسالة,تعليق فتخزنها في text ولا ملف كبير,كتاب فتروح لك MEDIUMTEXT أو LONGTEXT وهكذا.
  - فيه نوع اسمه VARCHAR للنصوص الصغيرة وبتقدر تحدد طول النص أو عدد الحروف اللي بتخزنها فيه بالشكل ده VARCHAR(length)
  - الفرق بين TEXT وVARCHAR الاول إن في حالة VARCHAR بتحدد طول النص ولو النص كان أطول من عدد الحروف المحدد في الحالة دي هيقطعه ومش هيخزن غير الطول المسموح..أما text الطول مفتوح.
  - الفرق التاني إن الداتا من نوع TEXT بتخزن في ملفات خارجية عن ملف جدول قاعدة البيانات والكلام ده في بعض الـ Database Servers .
  - فلو عندك نصوص قصيرة زي اسم بريد الكتروني فصل دراسي تستخدم VARCHAR ولو استخدمت TEXT لكله عادي برده مفيش مشاكل.
- شوف المثال ده..

```
CREATE TABLE user(
    id int,
    age int,
    name text,
    email text,
)
```

- الأستعلام ده هينشئ جدول اسمه user فيه 4 أعمدة id,age,name,email.



id	age	name	Email
----	-----	------	-------

- المفروض تكون فهمت إن عملية تخزين الداتا في جدول قاعدة البيانات بتكون على شكل إضافة صفوف Rows كل صف فيه قيم لكل cell أو عمود.
- خانة id يفضل انها تحمل رقم unique يبقى مختلف في كل صف.
- كما هو شائع بيخلوا الخانة id رقم unique وبيزيد تلقائي كل ما تعمل insert لداتا جديدة في قاعدة البيانات.. وتقدر تعمله بأنك تستعمل INTEGER PRIMARY KEY بدل من كلمة int.

و يمكن نستخدم أسلوب الشرط في أستعلام CREATE وخليه بالشكل ده

```
CREATE TABLE IF NOT EXISTS table_name (
    column1 datatype,
)
```

- في الحالة دي هيعمل جدول جديد بالاسم ده لو ممكنش موجود.
- لو عملت الأمر ده CREATE table\_name وكان الجدول موجود ومتخزن فيه قيم هيمسح الجدول الموجوده وينشئه من جديد.
- يبقى بنستخدم الأستعلام IF NOT EXISTS عشان ننشئ الجدول في أول مرة نشغل فيها التطبيق غير كده مش محتاجين نعمله CREATE تاني.





## مسح الجدول DROP TABLE

عشان تمسح الجدول يتم بجملة DROP

```
DROP TABLE table_name
```

إدراج الصفوف INSERT INTO

```
INSERT INTO table_name (column1, column2, column3, ...)
VALUES (value1, value2, value3, ...)
```

- عشان تخزن داتا في الجدول بتستخدم جملة INSERT INTO بعدها اسم الجدول table\_name وبين القوسين أسماء الأعمده اللي هتدخل فيها الداتا وبعدين جملة VALUES وبعدها القيم اللي هتدخلها في الأعمده بالترتيب اللي حددته في الأقواس وعاملك ألوان أهو عشان تعرف إن كل قيمة هتروح لك cell المقابلة في الجدول.

```
INSERT INTO user (age, name, email) VALUES
(20, 'mahmoud', 'user@email.com')
```

ده مثال لحفظ بيانات في الخانات age,name,email في الجدول.

- لاحظ إننا معملاش أذخال لقيمة في خانة id لأنها هتاخذ قيمة تزايدية بشكل تلقائي بسبب الأمر ده **INTEGER PRIMARY KEY**
- القيم غير الرقمية لازم تتحط بين quotes .. شكل الجدول هيكون كده

id	age	name	Email
1	20	ahmed	ahmed@email.com



## تحديث الصفوف UPDATE

عشان تعمل تحديث لقيمة فى الجدول بتتم بالشكل ده..

```
UPDATE table_name
SET column1 = value1, column2 = value2, ...
WHERE condition;
```

- بتستخدم جملة UPDATE بعدها اسم الجدول.. بعدين جملة SET وبعدها كل عمود فى الصف والقيمة الجديدة وأخير حاجة وأهم حاجة الـ condition وده اللي وده بيحدد أنت عاوز تحدد القيم دى فى أى صف.

```
UPDATE user SET name = 'python' WHERE id=1;
```

- مثلاً هنا بقوله فى الجدول user نشوف الخانة اللي فيها الـ id يساوى 1 وغير القيمة اللي فى العمود name وخليها python.

## حذف الصفوف DELETE

```
DELETE FROM table_name WHERE condition;
```

```
DELETE FROM user WHERE name='python';
```



- هنا بقوله أ حذف الصف أو الصفوف الموجودة في الجدول user اللى فيها القيمة في العمود name تساوى python.
- عشان نحذف كل الصفوف في الجدول بتستخدم الاستعلام ده.

```
DELETE * FROM table_name;
```

## إسترجاع القيم SELECT

عشان تسترجع القيم من الجدول ده بيتم بجملة SELECT

```
SELECT column1, column2, ..FROM table_name;
```

```
SELECT * FROM table_name;
```

مثلاً لو عندنا جدول زى كده وأستخدمنا الإستعلامات اللى تحت..

id	name	Age
1	mahmoud	23
2	ali	22
3	python	30

```
SELECT name FROM table_name;
```

- هيرجع حاجة اسمها result set فيه كل القيم اللى في العمود name وهم mahmoud,ali, python



```
SELECT * FROM table_name WHERE id=1
```

- بالاستعلام ده هيرجع للصف اللي فيه الـ id=1 ويرجع الصف كله  
.id=1,name=mahmoud,age=20

```
SELECT * FROM table_name
```

- هيرجع الجدول كله.

وبالأوامر أو الإستعلامات دي نكون أتعلمنا ازاي نكرت جدول بالخانات وأنواع البيانات اللي عايزينها وعرفنا ازاي نسمح الجدول ونخزن فيه ونسترجع ونحدث القيم.. تعالى بقى نرجع نتعامل بلغة البايثون.

## دالة execute

الحكاية وسعت مننا وتوهنا ونسينا كنا بنتكلم عن ايه 🤔 أفكر ك احنا عملنا قاعدة بيانات وعاوزين نكلمها بالـ SQL queries اللي كنت بعلمك فيها دلوقتي وعملنا connection object اللي أنشأ قاعدة البيانات نفسها ومنه عملنا cursor object وقولنا فيه الدوال اللي بتبع الـ queries لقاعدة البيانات زي دالة execute .

```
cur.execute('SQL STRING')
```

دالة execute بتاخذ برامتر واحد وهو كود أو أستعلام SQL.



## دالة commit

دى تابعة لك connection Object و بتعملها call بعد ما تخلص الأستعلامات وبدونها مفيش حاجة هتتحفظ فى قاعدة البيانات كأنك معملتش حاجة.

```
cur.execute('SQL STRING')
con.commit()
```

## دالة close

أخيراً دى بنستخدمها فى نهاية الكود عشان نقل الإتصال connection مع قاعدة البيانات..وبديهي إنها تكون تابعة لك connection object.

```
con.close()
```

- هنعمل قاعدة بيانات باسم database.db ونعمل منها cursor object اسمه cur

```
>>> import sqlite3 as sql
>>> con=sql.connect("E://database.db")
>>> cur=con.cursor()
```

- هنعمل جدول اسمه user فيه الخانات id,name,age .

```
>>> cur.execute("CREATE TABLE user(id INTEGER PRIMARY KEY,name
VARCHAR(10),age INTEGER)")
```

- هنعمل insert لصفين فى الجدول فى الخانات name,age وبعدين نعمل commit عشان القيم تتحفظ.



```
>>> cur.execute("INSERT INTO user(name,age)
VALUES ('Mahmoud','23')")
>>> cur.execute("INSERT INTO user(name,age)
VALUES ('Ahmed','22')")
>>> con.commit()
```

- هنسترجع كل القيم من الجدول بإستعلام \* SELECT في متغير اسمه table وعن طريق دالة fetchall() بترجع list فيها كل صف في الجدول على شكل tuple.

```
>>> table=cur.execute('SELECT * FROM user')
>>> table.fetchall()
[(1, 'Mahmoud', 23), (2, 'Ahmed', 22)]
>>>
```

- دى طرق مختلفة لقراءة صف بـ id محدد او قراءة العمود name كله أو cell وحده.

```
>>> cur.execute("SELECT * FROM user WHERE id=1").fetchall()
[(1, 'Mahmoud', 23)]
>>> cur.execute("SELECT name FROM user").fetchall()
[('Mahmoud',), ('Ahmed',)]
>>> cur.execute("SELECT name FROM user WHERE
id=2").fetchall()
[('Ahmed',)]
```

- تحديث خانة أو صف في الجدول بجملة UPDATE

```
>>> cur.execute('SELECT * FROM user').fetchall()
[(1, 'Mahmoud', 23), (2, 'Ahmed', 22)]
>>> cur.execute("UPDATE user SET name='python' WHERE id=2")
>>> con.commit()
>>> cur.execute("SELECT * FROM user").fetchall()
[(1, 'Mahmoud', 23), (2, 'python', 22)]
```



## تطبيق على قاعدة بيانات SQLite

لآزلنا في فصل طرق التخزين.. أتكلمنا عن التخزين في الملفات الـ File System واطكلمنا على التخزين في قواعد بيانات SQL .

هنعدل على سكربت تخزين بيانات الطلاب [storages1.py](#) ونستخدم فيه قاعدة بيانات SQLite بدل الملف النصي.

- في البداية هنضيف موديول sqlite3 ونعمل connection object و cursor object وننشئ جدول students في حالة إنه مكنش موجود(عند اول مره لتشغيل السكربت)

```
import sqlite3 as sql
con=sql.connect("database.db")
cur=con.cursor()
query="""CREATE TABLE IF NOT EXISTS students(
        name VARCHAR(20),
        class VARCHAR(5),
        section VARCHAR(5),
        percent int
    )
"""
cur.execute(query)
```

- هنغير في دالة insert() عشان نخليها تعمل insert لبيانات الـ students في قاعدة البيانات.

```
not_found=cur.execute("SELECT name FROM students WHERE
name='%s'%name).fetchall() == []
if not_found:
    query="""INSERT INTO students(name,class,section,percent)
        VALUES('%s','%s','%s','%s')"""%(name,_class,section,percent)
else:
    query="""UPDATE students SET class='%s',section='%s',percent='%s'"""
```



```
WHERE name='%s' """%(_class,section,percent,name)
cur.execute(query)
con.commit()
```

- في البداية وكالعادة دالة insert هتقري من المستخدم name,class,section,percent مفيش أختلاف
  - طيب .. لما نعمل أدخل لمستخدم جديد ممكن يكون اسمه موجود بالفعل وبالتالي لو أستخدمنا جملة INSERT INTO هتلاقيه عمل صف بنفس الاسم تاني وده احنا مش عاوزينه يحصل..اللى عاوزينه لو دخلنا بيانات طالب ولقى الاسم موجود في الحالة دي يعمل UPDATE للصف مش INSERT.
  - في الأول بنتأكد إذا كان الاسم موجود باننا نعمل SELECT للعمود اللي اسمه name في الجدول students و دالة setchall قولنا بترجع العمود ده في List .. لو كان الاسم مش موجود مسبقاً هترجع لسته فاضيه [ ] يعني و not\_found قيمته هتبقى True لو الاسم موجود not\_found هيبقى False.
  - في حالة الاسم كان مش موجود not\_found=True هنفذ الأستعلام بتاع INSERT
  - لو الاسم كان موجود هنفذ الإستعلام بتاع UPDATE وأخليه يحدد بياناته.
  - ومننساش نعمل commit في الآخر عشان يحفظ القيمة في قاعدة البيانات.
- دالة search عملنا فيها تعديلات بسيطة.

```
def search():
    name=input("Enter Student Name : ")
    rows=cur.execute("""SELECT * FROM students
WHERE name='%s'"""%name).fetchall()
```





```

for row in rows:
    print('Name :',row[0])
    print('Class :',row[1])
    print('Section :',row[2])
    print('Percent :',row[3])
    return
print('student not found')

```

- في الاول المستخدم هيدخل الاسم name اللي عاوز يطلع بياناته وبعدين هنعمل SELECT لكل الصفوف في الجدول students اللي فيها name يساوى الاسم اللي دخله المستخدم.
  - و دالة setchall كالعاده بترجع لـ list بكل الصفوف المطابقة للشرط إن وجدت وتخزنها في المتغير rows.
  - بعدين بنعمل iteration على المتغير rows اللي بيرجع tuple اسمه row بالشكل ده مثلاً (Mahmoud,1,A,90) بنطلع العناصر بالـ index وبنطبعها..
- حذف بيانات الطلاب..دالة remove

```

def remove():
    name=input("Enter Student Name : ")
    result=cur.execute("DELETE FROM students WHERE name='%s'%name)
    con.commit()

```

- المستخدم بيدخل اسم الطالب اللي عاوز يحذفه name ويتم تنفيذ query بجملة DELETE FROM اسم الجدول students والشرط هو إنه مسح الصف أو الصفوف اللي فيها name هيطابق الاسم اللي دخله المستخدم..

عرض أسماء كل الطلاب



```
def students():
    col=cur.execute("SELECT name FROM students").fetchall()
    for name in col:print(name[0])
```

- عشان نعرض أسامى قبل كده كنا بنطلع الـ keys فى الـ dictionary students. أما دلوقتى محتاجين نعمل SELECT للعمود اللى اسمه name فى جدول students و دالة fetchall بترجع العمود على شكل list وكل اسم جوه tuple بالشكل ده iteration عليه ونطبعه.(['Ahmed',), ('Mahmoud',,)]

ولو عاوز تحمل الكود النهائى للسكربت فمن هنا [storages3.py](#)



## الفصل 5 - بعض المكتبات المشهورة

- ✓ مكتبة youtube-dl لتحميل الفيديوهات
- ✓ مكتبة ffmpeg لتحرير الفيديو والصوتيات
- ✓ مكتبة openCV لمعالجة الصور والرؤية الحاسوبية
- ✓ مكتبة tesseract لاستخراج النصوص من الصور



في الفصل ده هنتكلم عن بعض المكتبات المشهوره للغة البايثون واللى هنقدر نستخدمها في تطبيقات كتير زي تحميل الفيديوهات من الأنترنت أو معالجة الصور وتحرير الفيديوهات. ومش لازم تشتغل على مكتبات الشابتر ده كلهم ..بس بضمنلك إنك هتلاقى حاجة شيقة وهتستفاد بيها جداً..

## مكتبة youtube-dl

لو مكنتش سمعت عنها قبل كده فأعتقد من الاسم قدرت تعرف انها مكتبة ليها علاقة باليوتيوب او بتحمل الفيديوهات من اليوتيوب.

مكتبة youtube-dl من المكتبات العظيمة اللى بتساعدك إنك تحمل الفيديوهات مش من على اليوتيوب بس ولكن من أغلب مواقع تحميل الفيديوهات المشهوره وحتى الفيس بوك. ده موقع المكتبة على [GitHub](#) **youtube-dl** واللى فيه [documentation](#) بتاعتها والمواقع اللى بتدعم التحميل من عليها.

**youtube-dl** Download videos from YouTube (and [more sites](#))

youtube-dl is a command-line program to download videos from YouTube.com and a few [more sites](#). It requires the [Python interpreter](#) (2.6, 2.7, or 3.2+), and it is not platform specific. We also provide a [Windows executable](#) that [includes](#) Python. youtube-dl should work in your Unix box, in Windows or in Mac OS X. It is released to the public domain, which means you can modify it, redistribute it or use it however you like.

Documentation

Download

Support

Develop

About



## تثبيت المكتبة

مكتبة youtube-dl مكتوبة بلغة البايثون وتقدر تثبيتها عن طريق pip.  
هتفتح الـ command line وتثبتها باستخدام pip ..

```
pip install youtube-dl
```

## الاستخدام

لو كنت فتحت موقع المكتبة هتلاقى المكتبة متوفرة لنظام ويندوز على شكل ملف تنفيذي .exe. تقدر تستخدمه من خلال الـ command line من غير ما تحتاج لغة البايثون ولا تكتب اكواد.

ومتوفرة على شكل Python Package ودى اللي ثبتناها باستخدام pip ونقدر نستخدمها عن طريق لغة البايثون أو من الـ command line برده.

## تحميل فيديو من خلال الـ command line

- أفتح الـ command line أياً كان نظام تشغيلك وأكتب فيه youtube-dl

```
C:\Users\Mahmoud>youtube-dl
Usage: youtube-dl [OPTIONS] URL [URL...]

youtube-dl: error: You must provide at least one URL.
Type youtube-dl --help to see a list of all options.
```

لو ظهرت الرسالة دى يبقى المكتبة أُنشبتت وتمام .





المكتبة فيها خيارات مهمة تقدر تخليك تحمل الفيديوهات بصيغ وجودات مختلفة وتقدر تحمل playlist أو channel كاملة من اليوتيوب وأكثر من كده. مش عاوز اتوسع قوى فى الموضوع بس بنصحك لازم تشوف الـ [documentation](#) على موقع GitHub.

## خديد الجودة FORMAT SELECTION

Youtube-dl بشكل افتراضى بيحمل أفضل صيغة متوفرة للفيديو. و عشان خد جودة الفيديوهات اللي هتحميلها، المكتبة بتوفر أكثر من طريقة زى كده

```
youtube-dl -f video_format video_url..
```

وال video quality أو format video بتكون كده

Video description	Video exetention
best worst bestvideo worstvideo bestaudio worstaudio	3gp, aac, flv, m4a, mp3, mp4, ogg, wav, webm



ده مثال لتحميل فيديو بأفضل جودة متوفرة للصوت bestaudio أو الأمر التانى بيحمل الفيديو بصيغة mp4.

```
youtube-dl -f bestaudio video_url
youtube-dl -f mp4 video_url
```

عشان تعرف كل الصيغ المتاحة بتكتب الامر -F قبل الرابط ولاحظ إن الـ F كابتال.

```
youtube-dl -F video_format video_url..
```

```
C:\Users\Mahmoud>youtube-dl -F https://www.youtube.com/watch?v=1D93k0zh8uA
[youtube] 1D93k0zh8uA: Downloading webpage
[youtube] 1D93k0zh8uA: Downloading video info webpage
[info] Available formats for 1D93k0zh8uA:
format code extension resolution note
249 webm audio only DASH audio 74k , opus @ 50k, 11.99MiB
171 webm audio only DASH audio 86k , vorbis@128k, 14.80MiB
250 webm audio only DASH audio 90k , opus @ 70k, 14.56MiB
140 m4a audio only DASH audio 129k , m4a_dash container, mp4a.40.2@128k, 24.78MiB
251 webm audio only DASH audio 147k , opus @160k, 24.41MiB
160 mp4 256x144 144p 29k , avc1.4d400c, 25fps, video only, 3.03MiB
133 mp4 426x240 240p 48k , avc1.4d4015, 25fps, video only, 6.12MiB
278 webm 256x144 144p 72k , webm container, vp9, 25fps, video only, 8.58MiB
```


- ومن الأوامر المهمة `get-url` – ده بيطلعك رابط التحميل المباشر للفيديو لو عاوز تخمله ببرنامج تحميل تانى مثلاً او خطه فى video player فى موقع معين.

```
youtube-dl --get-url video_url
```

```
C:\Users\Mahmoud>youtube-dl --get-url https://www.facebook.com/1541017819491365/videos/2002320483361094/
https://video-cali-1.xx.fbcdn.net/v/t42-1700-2/30063229_2006810483894830_5174893472317064288_n.mp4?nc_cat=0&efg=eyJ2ZWZjb2RlX3RhZyI6ImRhc2hfZjRfcmVzc3Rocm91Z2hfZnJhZ18iX2F1ZG1vIn0=&oh=01f03f51996de904d7ba205401aba6f80e=5B946F2
https://video-ca11-1.xx.fbcdn.net/v/t42-1700-2/30062336_2000521990267679_5354200132063592448_n.mp4?nc_cat=0&efg=eyJ2ZWZjb2RlX3RhZyI6ImRhc2hfZjRfcmVzc3Rocm91Z2hfZnJhZ18iX2F1ZG1vIn0=&oh=c47630136696d9f8d27826da3d8f1b1c&oe=5B94700E
```

فى الصوره دى حاولت أجيب رابط التحميل المباشر لفيديو على الفيس بوك راح البرنامج طلع اتنين url الأول فيديو والتانى الملف الصوتى.





## استخدام مكتبة youtube-dl مع البايثون

من بدرى بنتكلم عن طريقة استخدام youtube-dl في الـ command line مع إن الكتاب أصلاً بيشرح لغة البايثون والمكتبة في الأصل ثبتناها على اساس أنها Python Package فتعالوا نشغل بايثون شوية.

ده الشرح في الوثيقة لاستخدام youtube-dl مع لغة البايثون [embedding-youtube-dl](#)

```
import youtube_dl

ydl_opts = {}
ydl=youtube_dl.YouTubeDL(ydl_opts)

url=input('Paste Video URL : ')
ydl.download([url])
```

Download script [youtube-dl.py](#) from GitHub

- متغير ydl\_opts دى بيحدد إعدادات الفيديو اللى عايزين نحمله زى الصيغة والجوده.
- و هنا عملناه dict فاضى وبالتالي هيحمل أفضل جوة متوفرة
- دالة download بتاخذ الـ urls كـ list مش str عشان لو عاوز تخمل أكثر من فيديو.
- هندخل الرابط للسكربت عن طريق دالة input.



- وده شكل السكربت لما تشغل

```
Paste Video URL : https://www.youtube.com/watch?v=hZVHVGClgIw
[youtube] hZVHVGClgIw: Downloading webpage
[youtube] hZVHVGClgIw: Downloading video info webpage
WARNING: Requested formats are incompatible for merge and will be merged in
[download] Resuming download at byte 671776
[download] Destination: ██████ ██████ █████ ██████████ █████ ██████████ █████ ██████████
[download] 2.6% of 105.63MiB at 203.92KiB/s ETA 08:36
```

- عشان تخدم جودة التحميل ده بيتم من خلال المتغير `yd_opts` ودى طرق تخديد أكثر من جودة للفيديو

```
yd_opts = {'format': 'bestvideo'}
```

```
yd_opts = {'format': 'bestaudio'}
```



```
yd_opts = {'format': 'mp4'}
```

طبعا أنت كمستخدم عادى تقدر تشتغل على `command line` حتى من غير ما تكتب أكواد بايثون .. تلجأ بس للبايثون لو عاوز تعمل تطبيق أو موقع يستخدم المكتبة عشان يجمع الفيديوهات والمستخدم يختار الصيغة اللى عاوزها.

لو عاوز أمثلة أكثر عن استخدام المكتبة بلغة البايثون تقدر تشوف الموقع ده جايب كمية أمثلة كبيرة [youtube dl](#).



وقبل ما اخلص كلام عن youtube-dl هستغل الموقف وأوريكم برنامج [youtuber](#) ده برنامج عملته بلغته الـ C# (مش البايثون 😊) مبنى على الـ windows executable اللي بتنزل مع المكتبة وعاملها واجهة رسومية ودي للناس الغلابه اللي مبتعرفش تشتغل على الـ command line.





## مكتبات ffmpeg

من المنصات العظيمة والمشهورة لتحرير الفيديوهات.. وهو عبارة برنامج يشتغل على الـ command line ويستخدم لتحويل صيغ الفيديوهات والملفات الصوتية والصور المتحركة والقص والتقطيع والتسجيل وغيره.. [ffmpeg](#).

برنامج ffmpeg يينزل على شكل عن ملف تنفيذي executable file أو binary file بالنسبة لبتوع لينكس.. نتعامل معاه من خلال command line. ومش زي مكتبة youtube-dl اللي أصلاً مكتوبة بلغة البايثون.

بقولك كده ليه؟.. عشان تعرف أن البرامج اللي بتبقى موجودة بالشكل ده لما نحاول نتعامل معاه بلغة البايثون يتطلب وجود حاجتين : البرنامج نفسه اللي يشتغل بس على الـ command line زي ffmpeg والمكتبة اللي بتكلم البرنامج ده من لغة البايثون ويتسمى wrapper.

وأنا وبعمل الكتاب ده لقيت أكثر من wrapper ممكن تشتغل عليه زي مكتبة ffmpegpy ومكتبة ffmpeg-python .. أنا قررت اجرب الأخيره وتمكن متكونش الأفضل بس هنجربها ونشوف.



## مكتبة ffmpeg-python

هتثبت المكتبة عن طريق pip .. ولو عاوز تعرف أكثر عن المكتبة وتشوف الوثيقة بتاعتها


من هنا [ffmpeg-python](https://github.com/FFmpeg/ffmpeg-python).


```
pip install ffmpeg-python
```


## برنامج ffmpeg

تقدر تحمل الـ builds المناسبة لنظام تشغيلك وخصوصاً لويندوز من هنا مش من الموقع

الرسمى [ffmpeg.zeranoe.com](https://ffmpeg.zeranoe.com)

 ffmpeg.exe

 ffplay.exe

 ffprobe.exe

و لو انت زي وشغال على ويندوز هتفك ضغط الملفات فى أى مكان

خبه. أنا هحطهم فى البارتيشين C جوه الفولدر هتلاقى فولدر اسمه

bin جواه الملفات ffmpeg,ffplay,ffprobe

- المفروض نستخدم ffmpeg من خلال الـ command line فانت هتفتح الـ cmd


وتكتب ffmpeg

```
C:\Users\Mahmoud>ffmpeg
'ffmpeg' is not recognized as an internal or external command,
operable program or batch file.
```


- بيقولك إنه مش عارف مين ffmpeg .. ولسه فاضل خطوه إنك خط مسار الفولدر

bin الللى فيه ملف ffmpeg فى الـ environment variables عشان يقدر يشوفه

الـ command line من أى مكان.




أيا كان المكان اللي حطيت فيه هتروح  
تنسخ العنوان وخطه في المسار PATH  
في ال environment variables.



لو مش عارف إزاي تجيب ال environment  
variables أفتح الشاشة بتاعة run  
او دوس على window+R وأكتب فيها


**SystemPropertiesAdvanced**



أو أفتح ال cmd وأكتب فيه

**start SystemPropertiesAdvanced**

بعد كده دوس على زرار environment variables وعدل على Path وضيف فيه المسار اللي  
فيه ffmpeg.



Variable	Value
NUMBER_OF_PROCESSORS	4
OS	Windows_NT
Path	C:\ProgramData\Oracle\Java\javapath
PATHEXT	.COM;.EXE;.BAT;.CMD;.VBS;.VBE;.JS;.JSE
PROCESSOR_ARCHITECTURE	AMD64
PROCESSOR_IDENTIFIER	Intel64 Family 6 Model 37 Stepping 2, I
PROCESSOR_LEVEL	6

أحنا كل ده بنحاله نحط المسار بتاع الفولدر bin اللي فيه ملف ffmpeg.exe في المسارات  
path في ال environment variables فحاول تتشقلب وتضيفه بأى طريقة 🤪



طبعاً أخواطنا بتوع لينكس عنهم Package Manager بيثبت البرنامج بعيداً عن الحوارات دي.

- دلوقتي أفتح الـ command Line واكتب فيه ffmpeg ولو كنت عملت الخطوات اللي فاتت صح هيرد عليك ..

```
C:\Users\Mahmoud>ffmpeg
ffmpeg version N-86848-g03a9e6f Copyright (c) 2000-2017 the FFmpeg developers
built with gcc 7.1.0 (GCC)
```

## استخدام ffmpeg فى الـ command line.

فى البداية هنجرب ffmpeg على command line وقولنا أنه بيستخدم لتحويل صيغ الفيديو والصوت والتقطيع والقص وحاجات كتير جداً بتلاقيها فى أى برنامج video editor.

## تحويل صيغ الفيديو video conversion.

طريقة التحويل بين صيغ الفيديوهات بتتم بالشكل ده.

```
ffmpeg -i input output
```

- فى المثال اللي ختلك بنحول فيديو input.mp4 إلى صورة متحركة output.gif.

```
ffmpeg -i input.mp4 output.gif
```

طبعاً ffmpeg مش مجرد برنامج لتحويل الصيغ بس. تقدر من خلاله تتحكم فى جودة وأبعاد وسرعة الفيديو او الصوت او الصورة المتحركة اللي شغال عليها فلو مهتم وحببت

الموضوع تقدر تعرف أكثر من هنا [documentation](#).



هناخذ مثال بسيط على استخدام برنامج ffmpeg في الـ command line.



ده فيديو موجود على GitHub عاوزين نحوله لصورة

متحركة <https://ma7moud3ly.github.io/video.mp4>

مش لازم نحمل الفيديو ممكن تستخدمه وهو اونلاين.

- هتفتح الـ command line وتوجهه للمكان اللي عاوز تحفظ فيه الصورة الناجمة
- هتنسخ رابط الفيديو هتنفذ الأمر ده

```
C:\Users\Mahmoud>E:
E:\>ffmpeg -i https://ma7moud3ly.github.io/video.mp4 image.gif
```

هتلاقى الفيديو أخول لصورة متحركة image.gif ومحفوظة في المسار اللي فتحت عليه.

## استخدام مكتبة ffmpeg-python

تعالوا نعمل الكلام ده بلغة البايثون.. بس في الأول لازم تكون مثبت برنامج ffmpeg وضايفة

للـ environment path ومثبت مكتبة ffmpeg-python عن طريق pip زي ما عملنا.

## التحويل من صيغة الآخر

```
import ffmpeg
input = ffmpeg.input('https://ma7moud3ly.github.io/video.mp4')
output = ffmpeg.output(input, 'image.gif')
ffmpeg.run(output)
```

Download script [ffmpeg1.py](#) from GitHub






- دالة input بتأخذ عنوان الفيديو اللي عاوز تحوله وبترجع object فيه مجموعة من الدوال هنتكلم عن بعضهم في الأمثلة اللي جاية
- دالة output بتأخذ برامتين.. ال input object والاسم والصيغة اللي عاوز تحفظ الفيديو بيها.
- أخيراً دالة run بتنفذ الأوامر دي في برنامج ffmpeg.

## عمل flip للفيديو

عشان تعمل انعكاس للفيديو flip بشكل أفقى او رأسى بتستخدم دوال hflip و vflip.

```
import ffmpeg
input = ffmpeg.input('https://ma7moud3ly.github.io/video.mp4')
hflip=input.hflip() ; vflip=input.vflip()
ffmpeg.run(ffmpeg.output(hflip, 'hflip.mp4'))
ffmpeg.run(ffmpeg.output(vflip, 'vflip.mp4'))
```

Download script [ffmpeg2.py](#) from GitHub



video



hflip



vflip



## قص الفيديو crop

بتستخدم دالة crop اللي بتاخد 4 برامترات.. X,y وده بعد الجزء اللي هتقطعه من أعلى يسار الفيديو.. وبعدين width,height ودول الطول والعرض للمربع اللي هتقطعه.

```
import ffmpeg
input = ffmpeg.input('https://ma7moud3ly.github.io/video.mp4')
crop=input.crop(x=0,y=0,width=200,height=200)
ffmpeg.run(ffmpeg.output(crop, 'crop.mp4'))
```

Download script [ffmpeg3.py](#) from GitHub



crop



video

## الكتابة على الفيديو

لكتابه نص على الفيديو بنستخدم دالة drawtext زي المثال ده.

```
import ffmpeg
input = ffmpeg.input('https://ma7moud3ly.github.io/video.mp4')

text=input.drawtext(text='Pink Python ^_^',
fontcolor='red',
fontsize=30,
box=1,
boxcolor='black@0.5',
x='(w-text_w)/2',
```



```

y='(h-text_h)/2'
)

text=text.drawtext(text='By Mahmoud Aly',
fontcolor='white',
fontsize=15,
x='(w-text_w)/2',
y='((h-text_h)/2)+30'
)

output=ffmpeg.output(text, 'text.mp4')
ffmpeg.run(output)

```

Download script [ffmpeg4.py](#) from GitHub

- الدالة drawtext بتحدد فيها النص اللي عاوز تكتبه وخصائص النص زي fontcolor,fontsize والأحداثيات x,y ولو عاوز box أو خلفية للنص وهكذا..





## مكتبة OpenCV

شء غير منصف إطلاقاً إنى أتكلم عن مكتبة OpenCV بأعتها فى جزء فرعى وسط الكتاب لأنها محتاجه كتاب لوحدها بس هحاول أديك نبذه عنها وأعرفك استخدامات المكتبة.

بداية ده الموقع الرسمى للمكتبة [opencv](https://opencv.org/) حاول تشوفه وعارف إنى ياما جبتك روابط لكل مكتبة وبرنامج ونستخدمه بس أنت بتكسل تفتحها 🤖

المهم.. اسم المكتبة أختصار (Open Source Computer Vision Library) OpenCV والـ [computer vision](https://en.wikipedia.org/wiki/Computer_vision) او الرؤية الحاسوبية ده أحد فروع علم الذكاء الإصناعى.. والرؤية الحاسوبية تهدف لجعل الكمبيوتر قادر أن يعالج الصور يتعرف على الأشخاص والـ objects اللى فيها كأنه أنسان بالضبط.

الموضوع مش غريب عليك وبتشوفه كتير فى تطبيقاتك المختلفة.. زى فى الفيس بوك لما تحمل صورة بتلاقيه أتعرف أتوماتيك على الأشخاص وعملهم tag فى البوست.. ونفس الكلام فى تطبيق الكاميرا على الموبايل لما تلاقيه عمل تحديد لوجوه الأشخاص فى الصورة. دى أمثلة لتطبيقات بتستخدم تقنية الرؤية الحاسوبية computer visio..

تعتبر مكتبة openCv من المكتبات المشهوره فى المجال ده وطبعاً ميهمكش تعرف إتعملت أمتى وبلغة آيه وايه لغات البرمجة اللى بتدعهما واللى اكيد فيها البايثون بس اللى يهملك إنى

أبطل رعى و نفتح الـ command line ونثبتها بالـ pip 🤖



تعالا نثبتها ونكمل كلام بعدين ..

تقدر تحمل ملفات المكتبة من الموقع الرسمية [releases](#) أو تثبتها طريق pip.

```
pip install opencv-python
```

وهنحتاج مكتبة numpy اللي ثبتناها وأحنا وأحنا وبنتعلم أوامر الـ pip. لو مكنتش ثبتها معانا ثبتها دلوقتى.


```
pip install numpy
```

## مكتبة numpy

قولنا OpenCV دي مكتبة للرؤية الحاسوبية ومعالجة الصور..يعنى هنتعامل مع صور. طيب.. الصورة دي مجموعة من الـ pixels والبيكسل دي أصغر وحده من الصورة ولو كانت الصورة ملونة **RGB** كل بكسل تتكون من خليط بين 3 ألوان **Red Green Blue** وقيمة كل لون ممكن تخزينها فى متغير 8 بت..والـ 8 بت تقدر تشيل قيم مختلفة من 0 إلى 255 وهى دي درجة اللون اللي بتتراوح ما بين الأسود 0 والأبيض 255. عشان تفهم الموضوع أكثر تقدر تشوف الـ [RGB Calculator](#) على موقع w3schools



## RGB Calculator



rgb(255, 0, 0)

#ff0000

hsl(0, 100%, 50%)



مثلاً لو عاوز أعمل بيسكل لونها أحمر في نظام RGB (R,G,B) فهي بتتكون من 3 ألوان قيمتهم كده (255,0,0) ولو عاوز بيكسل لونها أزرق (0,0,255) ولو عاوز لونها أسود كل القيم تبقى صفر (0,0,0) ولو عاوزها أبيض كل القيم تبقى (255,255,255) عشان اللون الأبيض خليط من كل الألوان زي ما انت عارف.

لعلك لحد دلوقتي ادركت إن لو الصورة ملونة فالبيكسل الواحده فيها مكونة من 3 ألوان

[ وهحتاج 3 متغيرات أو list فيها 3 عناصر نخزن فيها قيمة كل لون.

px00 px01 px02 px03

px10 px11 px12 px13

px20 px21 px22 px23

px30 px31 px32 px33

مثلاً لو عاوز تعمل صورة لو أبيض أبعادها 4\*4 يعني ارتفاعها 4 بكسل

وطولها 4 بكسل صغيرة جداً.. هيكون شكلها زي الصورة اللي على

شمالك ..



- اللي قدامك دى Matrix أبعادها  $4 \times 4$  كل عنصر فيها ليه index 2 واحد يعبر عن الصف row والثاني يعنى عن العمود col...
- مثلاً البيكسل px00 دى توجد فى الصف الاول والعمود الاول وقيمتها (255,255,255) بأعتبار أن الصورة لونها أبيض.
- لو سميت الصورة اللي قدامك دى img وعاوز اطالع البيكسل px01 هيكون بالشكل ده `img[0,1]` يعنى طلعلى البيكسل اللي فى الصف 0 والعمود 1.
- وخلي بالك فى نظام الـ RGB البيكسل دى مش مجرد رقم لكنها List مكونه من 3 عناصر (R,G,B) فى حالة صورتنا البيضة هتكون بالشكل ده (255,255,255)

يعنى أنت عشان تخزن بكسلات الصورة عاوز مصفوفة تتكون من صفوف وأعمده يتمثل عدد البيكسلات وكل بيكسل عبارة عن list فيها 3 عناصر ودول بيمثل الألوان RGB.

ولما دورنا فى الـ data types الرئيسية فى لغة البايثون عشان نلاقى حاجة تمثل فيها الصورة وتكون بالمواصفات دى كان ممكن نستخدم list ولكن ظهرت مكتبة [numpy](#) واللى بتوفرلك multidimensional array أو مصفوفة متعددة الأبعاد وبتشغل مساحة أقل فى الذاكرة عن الـ objects العادية بتاعة البايثون list,tuple وبالتي استخدام مصفوفات numpy كان أفضل لتخزين الصور فى الذاكرة ومعالجتها.

## مكتبة numpy

هنتعلم فى مكتبة numpy اللي يفيدنا فى الموضوع ده وللتعامل مع مكتبة OpenCV. بس لو عاوز تتعمق شوف الوثيقة بتاعتها [quickstart](#).



## مصصفوفات narrays

مصصفوفات مكتبة numpy تسمى ب ndarray ودي امثلة لطريقة تعريفها والتعامل معاها.

```
>>> import numpy as np

>>> np.zeros((2,2),int)
array([[0, 0],
       [0, 0]])

>>> np.ones((2,2),int)
array([[1, 1],
       [1, 1]])

>>> x=np.ones((3,3),int)
>>> x
array([[1, 1, 1],
       [1, 1, 1],
       [1, 1, 1]])

>>> x.shape
(3, 3)
>>> x.size
9

>>> x[0,0]=2
>>> x[1,1]=2
>>> x[2,2]=2
>>> x
array([[2, 1, 1],
       [1, 2, 1],
       [1, 1, 2]])

>>> x[0]
array([2, 1, 1])

>>> x[:,0]
array([2, 1, 1])
```

في الأول بنستدعي مكتبة numpy

دالة **zeros** بتعمل مصفوفة كل عناصرها أصفار وبتاخذ برامتين.. tuple بأبعاد المصفوفة ونوع العناصر.

دالة **ones** بتعمل مصفوفة كل عناصر 1

هنا عملنا مصفوفة اسمها x وفيها 3 صفوف و 3 أعمده جميع عناصرها ونوع عناصرها int.

**shape** بيرجع أبعاد المصفوفة

**size** بيرجع عدد عناصر المصفوفة.

عشان تعدل قيمة عنصر في مصفوفة ثنائية الأبعاد بتحدد رقم الصف ورقم العمود array[row, col] وبتعمله assignment عادي.

عشان تطلع صف كامل array[row\_index] مثلاً x[0] بيستخرج الصف الأول.

عشان تطلع عمود كامل array[:, row\_index] مثلاً x[:, 0] بيرجع العمود الأول.





## العمليات على مصفوفات ndarray

المصفوفات من نوع ndarray تقدر تطبق عليها العمليات الحسابية المعروفة.

<pre>&gt;&gt;&gt; x=np.ones((2,2),int)  &gt;&gt;&gt; x=x+2 array([[3, 3],        [3, 3]])  &gt;&gt;&gt; y=np.ones((2,2),int)+3 array([[4, 4],        [4, 4]])  &gt;&gt;&gt; x+y array([[7, 7],        [7, 7]])</pre>	<p>عند جمع رقم على المصفوفة.. الرقم هيتوزع على كل عنصر فيها.</p> <p>تقدر جمع مصفوفتين ليهم نفس الأبعاد والجمع هيتتم بين كل عنصر مع العنصر المقابل ليه.</p>
<pre>&gt;&gt;&gt; x*y array([[12, 12],        [12, 12]])</pre>	<p>وخلى بالك إن علامة الضرب * هتضرب كل عنصر في المصفوفة الأولى مع العنصر المقابل في المصفوفة الثانية وليس ضرب مصفوفات.</p>
<pre>&gt;&gt;&gt; y=np.ones((2,3),int)+3 array([[4, 4, 4],        [4, 4, 4]])  &gt;&gt;&gt; x array([[3, 3],        [3, 3]])  &gt;&gt;&gt; x*y ValueError:...</pre>	<p>لو عملنا ضرب بين مصفوفة x شكلها 2*2 ومصفوفة y شكلها 3*2 هينتج خطأ لأن في ضرب العناصر بيشتترط تكون الأبعاد متساوية للطرفين.</p>
<pre>&gt;&gt;&gt; np.matmul(x,y) array([[24, 24, 24],        [24, 24, 24]])</pre>	<p>لو عاوز تعمل ضرب مصفوفات بيتتم بدالة <code>matmul</code> ولو أبعاد المصفوفة الأولى (Row1, Col1) والمصفوفة الثانية (Row2, Col2) لازم يكون <code>Col1==Rw2</code>.</p>




## المصفوفة ثلاثية الأبعاد

عاوزين نعمل صورة حجمها 100X100 بييسكل ولونها أبيض فهتكون بالشكل ده

```
>>> import numpy as np
>>> white_img=np.ones((100,100,3),np.uint8)*255
>>> white_img[0,0]
array([255, 255, 255], dtype=uint8)
>>> white_img.shape
(100, 100, 3)
>>> white_img.size
30000
```

- عملنا مصفوفة وحيد بالدالة ones أبعادها 100 صف 100 عمود وكل عنصر فيها عبارة عن مصفوفة مكونه من 3 عناصر ones(100,100,3)
- np.uint8 بتحدد نوع المتغير unsigned int يعنى رقم صحيح موجب وحجمه 8 بت.
- لما طلعتا العنصر رقم [0,0] أو البكسل الأولى رجعت مصفوفة فيها 3 عناصر عناصرها [255,255,255] كل عنصر يعبر عن لون.

لحد دلوقتى فهمنا الصور بتتخزن كمتغير ازاى وان لغة البايثون بتشوفها كمصفوفة ولو عاوز تغير فى لون الصورة بتغير ارقام فى المصفوفة .. ولو عاوز تقص جزء من الصورة بتطلع عناصر ب index معين.


العمليات على الصور الرقمية دى اسمها [Digital Image Processing](#) أو معالجة صور ومكتبتنا الجميلة OpenCV بتوفر مجموعة من الدوال اللى بتساعدنا على معالجة الصورة والتعرف على الأشخاص والكائنات وتطبيق الفلاتر وتغير الالوان وحاجات كتير أكيد مش هتعرفها كلها هنا بس هديك نبذه مختصره بسيطه وشيقة تعرفك بالمكتبه 



## مكتبة OpenCV

تعالو بيينا نحول المصفوفات الأرقام اللى عملناها من شوية لصورة ونشوف شكلها ايه.

```
>>> import numpy as np
>>> white_img=np.ones((100,100,3),np.uint8)*255
>>> import cv2
>>> cv2.imshow('white',white_img)
```




- فى البداية عملنا المصفوفة بتاعة الصورة واسمها white\_img
- بعدين أستدعينا مكتبة OpenCV واسمها cv2 هتعلمها
- import ولو مظهرش اخطاء مشاكل يبقى المكتبة أنثبتت وتما
- وبعدين دالة imshow دي بتعرض المصفوفة فى ك صورة و البرامتر الاول

هو اسم النافذه window اللى هتظهر فيها الصورة والتانى مصفوفة الصورة.

- بعد ما عملنا imshow طلعت الصورة الصغيره ده وده منطقي لأن حجمها 100X100 بيكسل.

## انشاء صورة سوده

```
import cv2
import numpy as np
def show(img):
    cv2.imshow('Image',img)
    cv2.waitKey(0)
    cv2.destroyAllWindows()
img=np.zeros((400,400,3),np.uint8)
show(img)
```



Download script [opencv.py](#) from GitHub




- هنا عملنا مصفوفة zeros أبعادها (400,400) ففتح عنها صوره سوده.
- بعدين عملت دالة اسمها show ودي هتستخدمها في كل الأمثله عشان  
أعرض الصور بتاعتنا.
- جوة دالة show.. عندك دالة imshow دي بتعرض الصورة زي ما عرفنا.. و دالة  
waitkey بتخلي النافذه اللي بتظهر مستنيه أنك تضغط على أى زرار في لوحة  
المفاتيح وبعدها هتنفذ الدالة destroyAllWindows اللي بتقفل النافذة
- يعنى ده أوبشن إختيارك لما تدوس على أى زرار في الكيبورد يقفل الصورة المعروضة  
ومن غيره ال window هيحصلها freeze والبرنامج هيعلق

### انشاء صورة خضراء

```
import cv2
import numpy as np
def show(img):
    cv2.imshow('Image', img)
    cv2.waitKey(0)
    cv2.destroyAllWindows()

img=np.zeros((400,400,3),np.uint8)
for row in range(img.shape[0]):
    for col in range(img.shape[1]):
        img[row,col]=[0,255,0]

show(img)
```



Download script [opencv1.py](#) from GitHub



- هنا عاوزين نخلي لون الصورة أخضر green وعشان تبقى أخضر لازم شكل البيكسل يبقى كده (0,255,0) عشان ترتيب الألوان في مكتبة (B,G,R) OpenCV وخلي بالك BGR مش RGB.
- دالة zeros بتولد مصفوفة كلها أصفار (0,0,0) فهنعمل iteration نطلع بيه كل بيكسل من المصفوفة img ونغير قيمتها ونخليها (0,255,0)
- وخلي المتغير shape بيرجع أبعاد المصفوفة. shape[0] ده عدد الصفوف و shape[1] ده عدد الأعمدة.. فيعمل iteration عليهم.

### حفظ الصورة دالة imwrite

في المثال ده هنعمل صورة زرقاء كل بيكسل فيها قيمته (255,0,0) ونحفظها على الجهاز.

```
import cv2
import numpy as np

img=np.zeros((400,400,3),np.uint8)
for row in range(img.shape[0]):
    for col in range(img.shape[1]):
        img[row,col]=[255,0,0]

cv2.imwrite('img.png',img)
```

قولنا ترتيب الالوان في البيكسل (B, G, R) وعشان نخلي الصورة زرقاء هنخلي البيكسلات في المصفوفة img بالشكل ده (255, 0, 0) هنحفظ الصورة img باسم img.png وبدالة imwrite اللي بتاخذ برامترين الاول اسم الصورة والأمتداد والثاني المصفوفة اللي بتمثل الصورة.

Download script [opencv2.py](#) from GitHub



```
>>> img.size
480000
```



img.png

```
Item type: PNG File
Dimensions: 400 x 400
Size: 1.63 KB
```

الصورة اللى أحنا عملناها أبعادها 400 X 400 يعنى عدد عناصرها size  $3 \times 400 \times 400$  وكل عنصر فيها يمثل 8 بت يعنى حجم الصورة لما تخزنها المفروض يكون 480,000 بايت = 496 كيلو.

- بس الحقيقة إن حجم الصورة طلع أقل من كيلو.. تخيل صورة لونها أزرق حجمها 400 بيكسل تتخزن في نص ميغا طيب لو فرم من فيديو 4k أبعاده  $3840 \times 2160$  فحجمه هيكون كام وحجم الفيديو اللى فيه أكثر من 20 فرم في الثانيه لو مدته ساعه؟!.
- عشان كده بيتم عمل encoding للصور أو الفيديو بالصيغ المختلفه اللى بتشوفها زي png,jpg واللى بتعمل ضغط compress للصورة بطريقة معينة تقلل من عدد الـ bits اللى هتتخزن على الجهاز بدل ما تخزن عدد كبير متكرر من نفس الـ pixels.



## قراءة وعرض صورة `imread`

هتتحفظ الصورة دى جنب الـ script اللى شغال عليه [logo.png](#) وهتقراها بمكتبة OpenCV.

```
import cv2
import numpy as np

def show(img):
    cv2.imshow('Image',img)
    cv2.waitKey(0)
    cv2.destroyAllWindows()

main = cv2.imread('logo.png')
scaled = cv2.resize(main, (0,0), fx=4, fy=4)
gray = cv2.cvtColor(scaled,cv2.COLOR_BGR2GRAY)

show(scaled)
show(gray)
```



Download script [opencv3.py](#) from GitHub

- هنا دالة `imread` بتأخذ مسار الصورة اللى عايز تقرأها وبترجعها فى `ndarray`.
- دالة `resize` بتغير حجم الصورة واستخدمناها عشان نعمل `scale` أو تكبير للصورة الأصلية `main` بنسبة 4 مرات للطول والعرض بحيث خلىنا البرامترات `fx=4, fy=4`.
- دالة `cvtColor` استخدمناها عشان نحول الصورة الملونة من `BGR` إلى صورة أبيض وأسود `GRAY`.



## صور Gray Scale

قبل كده أتكلمنا عن الصور الملونة بنظام RGB أو BGR وهو إن كل بيكسل في الصورة بتكون من 3 ألوان Blue,Green,Red ولما تتخزن الصورة في ndarray كل بيكسل يعبر عنها مصفوفة فيها 3 قيم.

- فيه نوع تاني من الصور وهو الأبيض والأسود Grayscale وهو عبارة عن تدرج بين درجة اللونين الأسود 0 والأبيض 255 وبالتالي في النظام ده البيكسل يعبر عنها قيمة وحده بتراوح بين 0:255 وليس مصفوفة فيها 3 قيم زي نظام BGR.

```
>>> gray.shape
(396, 328)
>>> gray.size
129888
>>> gray[0,0]
0
>>> gray[100,100]
89
```

- شغل السكربت اللي فات وقبل ما تقفل الـ Interpreter جرب تشوف الـ attributes بتاعة المصفوفة gray أو الصور الأبيض والأسود.
  - Shape هترجع (width, height) ومفيش البعد الثالث.
  - دالة size عبارة عن حاصل ضرب الطول\*العرض = 396\*328 وبالتالي توقع إن حجم الصورة grayscale أصغر من RGB اللي في حالته بتضرب في 3.
  - كل عنصر في الدالة عبارة عن قيمة وحده 8 بت وليس مصفوفة فيها 3 عناصر.
- مكن تسأل إيه فائدة نظام الـ Grayscale وليه مبتعاملش مع الصور الملونة ديمًا 🤔!؟
- أعتقد إنك شوفت إن في حالي Grayscale حجم المصفوفة بيقل 3 أضعاف وده بيقلل من المساحة اللي هتشغلها في الرامه و بيزود من سرعة المعالجة لو عاوز تنفذ الجوريثمات وعمليات معينة على المصفوفة.





## الرسم Drawing

مكتبة OpenCV فيها مجموعة دول لرسم العديد من الأشكال زي الخطوط والدوائر والمستطيلات والأشكال البيضاوية.. بالإضافة لأمكانية كتابة نصوص على الصور.

كل دول الرسم زي line,rectangle,circle بتحدد ليها الصورة اللي عاوز ترسم عليها والإحداثيات اللي هترسم عندها بالإضافة للون والسمك بتاع كل شكل.

رسم خط line

```
cv2.line(image, (x1, y2), (x2, y2), color, thickness)
```

رسم مستطيل rectangle

```
cv2.rectangle(image, (x1, y2), (x2, y2), color, thickness)
```

رسم دائرة circle

```
cv2.circle(image, (x, y), radius, color, thickness)
```

إضافة نص putText

```
cv2.putText(image, Text, (x, y), Font, Size, color, thickness)
```



وده سكرت بيرسم كل الأشكال اللي أتكلمنا عنها.

```
import cv2
import numpy as np

def show(img):
    cv2.imshow('Image',img)
    cv2.waitKey(0)
    cv2.destroyAllWindows()

img=np.ones((500,500,3),np.uint8)*255

red = (0,0,255)
green = (0,255,0)
blue = (255,0,0)


cv2.line(img,(10,10),(10,490),green,4)
cv2.putText(img,'Line',(15,50),cv2.FONT_HERSHEY_SIMPLEX,1,green,2)

cv2.rectangle(img,(100,100),(200,200),red,4)
cv2.putText(img,'Rectangle',(110,120),cv2.FONT_HERSHEY_SIMPLEX,0.5,red,2)

cv2.circle(img,(300,300),100,blue,4)
cv2.putText(img,'Circle',(275,300),cv2.FONT_HERSHEY_SIMPLEX,0.5,blue,2)

show(img)
```

Download script [opencv4.py](#) from GitHub



ده شكل الصورة الناتجة من السكرت ..وعشان  
تعرف أكثر عن الرسم بالـ OpenCv كمل من هنا

[tutorial\\_py\\_drawing\\_functions](#)



## التعرف على الوجوه Face Detection

من الحاجات الجميلة اللي بتشوفها في تطبيقات الكاميرا أو حتى على الفيس بوك هي خاصية التعرف على وجوه الأشخاص face detection المقصود هنا إن عن طريق معالجة الصورة هقدر أعرف إذا كان الصورة دي فيها وجه face ولا لأ أو فيها كام شخص. بالنسبة للتعرف على الوجه ده تبع مين برده من الحاجات اللي تقدر تعملها بالـ opencv بس للأسف هسيبك تعملها لوحدهك لو مهتم يعني لأنى عاوز أخلص الكتاب 📖

### طريقة Haar-cascade

من طرق التعرف على الوجوه أو الـ objects فى الصور هي طريقة haar cascade.. فى البدايه لو معانا صورة digital لما اتعامل معاها بتبقى عبارة عن مصفوفة من الأرقام. أنا عاوز أعرف هل جُمع من الأرقام دى فى مساحة من الـ pixels او window معينة يمثل صورة وجه Face مثلاً؟!

الحل إبنى أحاول اطلع الخصائص features بتاعة وجه الإنسان اللي بتظهر فى الصورة.. فمثلاً المنطقة بتاعة العينين والحواجب لونها بيبقى غامق أكثر من منطقة الحدود.. يعنى مجموع الأرقام بتاعة البيسكلات فى منطقة pixel intensity هتختلف عن منطقة أخرى حسب تدرجها من الأبيض للأسود لو الصورة grayscale مثلاً فبقدر أتوقع الجزء ده بيمثل إيه منطقة أيه فى الوجه.



والطريقة اللي بقدر أصنف بيها أجزاء الصورة اسمها [haar-like feature](#) والاسم مأخوذ من عالم الرياضيات [Alfréd Haar](#).

بالطريقة دي أقدر أطلع الخصائص features بتاعة العنصر اللي عاوز أعملها detection وجه الانسان مثلاً.. خلاص عندي خصائص ممكن أقسم الصورة بتاعى اجزاء windows وأطبق عليها الخصائص دي وأنشوف فيها Face ولا لأ وبكده عن طريق برنامج وحسابات رياضية لأرقام وبيكسلات أقدر أخلى الكمبيوتر يتعرف على وجود أشخاص فى الصورة من عدمه وهو ده الذكاء الإصطناعى يا جماعة 😊

المهم اللي عملوا الألوثيرم لقيوا إن عندهم أكثر من 6000 feature مختلفة المفروض يطبقوها على أجزاء الصورة عشان يقولك الجزء ده فيه Face ولا مفيهوش وطبعاً العملية دي هتاخذ وقت طويل.

فقرروا يقسموا العملية دي مراحل متتالية cascade stages.. فى كل مرحلة هيدور على مجموعة من الخصائص ويشوفها هل موجودة ولا ولأ.. لو مش موجودة فى الجزء ده خلاص مش هيكمل مطابقة للخصائص وعرف إن دي مش صورة وجه وبالتالي أختصر الوقت بشكل كبير.

تمام.. كل الكلام ده عشان عاوز أفهمك معنى haar cascade اللي هنستخدمها بدل ما نطبق الأكواد على طول وأقولك هنستخدم طريقة مش عارف ونشوف النتيجة بس.

طبعاً لو عاوز تفهم الموضوع بالتفصيل تقدر تشوف ال tutorial دي على الموقع الرسمى

[tutorial.py face detection](#)





## Haar-cascade Detection in OpenCV

- يبقى عشان خلى مكتبة OpenCV تتعرف على أى object مهما كان بتحتاج ملف classifier بيبقى فيه الخصائص features لك object ده عشان يطبقها على الصورة او يحاول يتعرف عليه.
- مكتبة openCv بيجى معاها classifiers جاهزة لو كنت مثبتت المكتبة عن طريق pip هتلاقيهم فى فولدر site-packages/cv2/data .
- الـ classifiers دول بيخلوك تقدر تتعرف على أجزاء كتير فى الصورة زى العينين والوجه وجسم الانسان ورخصة العربية وحاجات تانيه ويمكن تحملهم من هنا

### [haarcascades](#)

و دلوقتى عاوزين نعمل سكربت يتعرف الوجوه والأبتسامات فى الصورة وهحمسك أكثر عشان الكود طويل ويمكن تخاف منه ده اللي بيعمله السكربت 🤖.





- في المكان اللي هتحفظ فيه السكريت هتحتاج تضيف ملفين من haarcascade الأول فيه خصائص الوجه haarcascade\_frontalface\_default.xml والثاني للإبتسامة haarcascade\_smile.xml ده بالإضافة للصور اللي فيها أشخاص ودول اللي أستخدمتهم [img1.jpg](#) و [img2.jpg](#) طبعاً تقدر تختار أي صور من عندك.



```
import numpy as np
import cv2

def show(img):
    cv2.imshow('Image',img)
    cv2.waitKey(0)
    cv2.destroyAllWindows()

img = cv2.imread('img1.jpg')
small=cv2.resize(img.copy(),(0,0),fx=0.4,fy=0.4)
gray = cv2.cvtColor(img, cv2.COLOR_BGR2GRAY)
face_cascade = cv2.CascadeClassifier('haarcascade_frontalface_default.xml')
smile_cascade = cv2.CascadeClassifier('haarcascade_smile.xml')
faces = face_cascade.detectMultiScale(gray)
s=0
for (x,y,w,h) in faces:
    cv2.rectangle(img,(x,y),(x+w,y+h),(0,255,0),2)
    face_gray = gray[y:y+h, x:x+w]
    face_color = img[y:y+h, x:x+w]
    smiles = smile_cascade.detectMultiScale(face_gray)
    for (ex,ey,ew,eh) in smiles:
        cv2.rectangle(face_color,(ex,ey),(ex+ew,ey+eh),(0,255,255),2)
        s=s+1
    break
height=img.shape[0]
width=img.shape[1]
x_offset=0
y_offset=gray.shape[0]-small.shape[0]
img[y_offset:y_offset+small.shape[0], x_offset:x_offset+small.shape[1]] =
small
cv2.putText(img,'%s Persons'%len(faces),( width-150,height-50),
cv2.FONT_HERSHEY_SIMPLEX,0.8,(255,255,255),2)
cv2.putText(img,'%s Smile'%s,(width-150,height-10),cv2.FONT_HERSHEY_SIMPLEX,
0.8,(255,255,255),2)
show(img)
```

Download script [opencv5.py](#) from GitHub



- في الأول قرينا الصورة اللي عاوزين نتعرف على الوجوه والابتسامات فيها واللى كان اسمها هنا `img1.jpg`
- بعدين أخذنا نسخة من الصورة وعملنا لها `resize` وسميناها `small` ودى الصورة الأصلية اللي هتظهر فوق الصورة اللي هحدد عليها الوجوه.
- وحولت الصورة `img` لـ `gray`
- بعدين هنقرى الـ `classifires` بتوعنا `face_cascade` و `smile_cascade`.
- دالة `detectMultiScale` عطيناها برامتر واحد وهو الصورة `gray` عشان ترجع `list` اسمها `faces` فيها عدد `lists` يمثل عدد الوجوه اللي تعرف عليها وفي كل `list` فيه الأحداثيات `X,y` والطول والعرض أقدر منهم أرسم `rectangle` وأحدد الوجه اللي أتعرف عليه.
- عشان أدور على الـ `smile` مش محتاج ادور في الصورة الكبيرة.. فبوفر وقت وأدور في جوة الـ `face` اللي طلعت مسبقاً فبيعمل `crop` للوجه الي جمعه في الصورة الـ `gray` وسماه `face_gray` وفي الصورة الملونة سماه `face_color`.
- طبعاً الوجه الـ `gray` بدور جواه على `smile` بدالة `detectMultiScale` التابعة لـ `smile_cascade` والـ `face_color` دى برسم عليه المستطيل الأخضر.
- وفي النهاية بخط نصين `puttext` على الصورة الأصلية اللي اسمها `img` بعدد الأشخاص وهو `len` بتاع الليسته `faces` وعدد الابتسامات وده حسبناه في المتغير `s`.





## إلتقاط فيديو من الكاميرا Capture Video from Camera .

ممكن تقولى أنا عاوز أطبق السكرت اللي فات على كاميرا بتصور لايف جيث إن الكاميرا لما تتعرف على و أشخاص فى المكان مثلاً نخلي البرنامج بيعت تنبيه أو بيعت صورة الأشخاص دول فى إيميل وكده يعني...مفيش مشاكل ممكن نعملها وده سكرت بيوضح أزاى مكتبة OpenCv بتاخذ صور من الكاميرا وبتعرض

```
import numpy as np
import cv2
cap = cv2.VideoCapture(0)
while(True):
    ret,img = cap.read()
    cv2.imshow('frame',img)
    if cv2.waitKey(1) & 0xFF == ord('q'):
        break
cap.release()
cv2.destroyAllWindows()
```

Download script [opencv6.py](#) from GitHub

- فى البداية دالة VideoCapture بتاخذ برامتر واحد وهو الـ video source أو مصدر الفيديو اللي بتتعامل معاه.. أما كاميرا وبتكتب رقمها فى الغالب الكاميرا الافتراضية بتاعة اللاب رقمها 0 وممكن يكون ملف فيديو فبتكتب اسمه.
- بتفتح جملة تكرار while عشان تقرى الصور من الكاميرا.
- الكاميرا بتسجل الفيديو على شكل frames وهو صورة كل جزء من الثانيه حسب نوع الكاميرا وجودة الفيديو طبعاً .



- دالة read بترجع متغيرين الاول متغير bool سيكون True لو الـ frame أتصور بشكل صحيح.. والمتغير التانى الـ frame أو الصورة وهنا سميتها img.
- بعمل عرض للفرم بدالة imshow كالعناد.
- جملة الشرط `if cv2.waitKey(1) & 0xFF == ord('q')` بتخرج من جملة التكرار وبتقفل تصوير الفيديو لو المستخدم داس على حرف من لوحة المفاتيح وهنا حددنا حرف q.
- تقدر تجرب السكرت وتشغله على الكاميرا وتشوفه بيصور فيديو ازاي. وللمزيد تقدر تشوف الـ tutorial دى [py\\_video\\_display](#)



## التعرف على الوجوه في الفيديو

هندمج السكريبتين الى فاتوا بحيث إننا نخلي البرنامج يتعرف على الوجوه والأبتسامات من الكاميرا مش من صورة ثابتة زي ما عملنا.

```
import numpy as np
import cv2

face_cascade = cv2.CascadeClassifier('haarcascade_frontalface_default.xml')
smile_cascade = cv2.CascadeClassifier('haarcascade_smile.xml')
cap = cv2.VideoCapture(0)

def detect_persons(img):
    gray = cv2.cvtColor(img, cv2.COLOR_BGR2GRAY)
    faces = face_cascade.detectMultiScale(gray)
    s=0
    for (x,y,w,h) in faces:
        cv2.rectangle(img, (x,y), (x+w,y+h), (0,0,255), 1)
        face_gray = gray[y:y+h, x:x+w]
        face_color = img[y:y+h, x:x+w]
        smiles = smile_cascade.detectMultiScale(face_gray)

        for (ex,ey,ew,eh) in smiles:
            cv2.rectangle(face_color, (ex,ey), (ex+ew,ey+eh), (0,255,0), 1)
            s=s+1
            break

    cv2.putText(img, '%s
Persons'%len(faces), (20,20), cv2.FONT_HERSHEY_SIMPLEX, 0.5, (0,0,255), 1)
    cv2.putText(img, '%s
Smile'%s, (20,50), cv2.FONT_HERSHEY_SIMPLEX, 0.5, (0,0,255), 1)
    return img
while(True):
    ret,img = cap.read()
    img=detect_persons(img)
    cv2.imshow('frame',img)
    if cv2.waitKey(1) & 0xFF == ord('q'):
        break
cap.release()
cv2.destroyAllWindows
```

Download script [opencv7.py](#) from GitHub

تقدر تجرب السكريبت ده على كاميرة اللاب أو أى كاميرا USB متوصلة بالكمبيوتر بس هتحتاج تغير رقم الكاميرا في الكلاس VideoCapture.



## استخلاص النصوص من الصور OCR

التعرف على الحروف الضوئية Optical character recognition هو عملية تحويل الكتابة الموجودة في الصور إلى نص وهو من المجالات الشيقة التابعة للرؤية الحاسوبية computer vision والذكاء الاصطناعي Artificial Intelligence .

وتقدر تعرف المزيد عن الموضوع ده من الويكيبيديا [Optical character recognition](#)

الموضوع هيكون مهم معاك لو عندك كتاب مصور او pdf وعاوز تحوله لصيغة نصية أو word.. فإمأ تلجأ للطريقة الكتابة اليدوية وحب حد يكتبهولك أو تستعين بأى برنامج يحولك الكتابة في الصور لنصوص قابلة للتعديل في لحظات بدقة تعتمد على البرنامج أو الـ OCR Engine المستخدم وبرده بيعتمد على جودة الصورة ومدى وضوحها. لكنه وعلى كل حال بيوفر وقت وجهد بشكل كبير.

## برنامج tesseract ocr

ده عبارة عن برنامج مفتوح المصدر للتعرف على النصوص text recognizer بيدعم أكثر من 100 لغة من ضمنهم اللغة العربية و كبرنامج command line أو مكتبات تقدر تضمنهم في برامجك بلغة C++ او تطبيقات android و ios.

طريقة تحميل وتثبيت tesseract حسب نظام تشغيلك من هنا [tesseract-ocr](#)

ولو كنت من مستخدمي فتقدر تحمل نسخة قابلة للتثبيت من هنا [tesseract](#).



## التعامل مع برنامج tesseract

- أياً كان نظام تشغيلك بعد ما تثبت البرنامج أفتح الـ command line وأكتب فيه tesseract عشان تتأكد إن البرنامج إثبتت..

```
C:\Users\Mahmoud>tesseract
Usage:
tesseract --help | --help-psm | --help-oem | --version
tesseract --list-langs [--tessdata-dir PATH]
tesseract --print-parameters [options...] [configfile...]
tesseract imagename|stdin outputbase|stdout [options...] [configfile...]
```

- لو كنت من مستخدمي ويندوز ونزلت البرنامج وثبته هتلاقى الملفات بتوعه في المجلد Tesseract-OCR جوة Program files أو Program Files (x86) حسب نسخة البرنامج اللي ثبتها.
- بس في البداية هتفتح الـ CMD وتكتب فيه tesseract ولو متعرفش على الأمر يبقى هحتاج خط مسار المجلد بتاع البرنامج C:\Program Files (x86)\Tesseract-OCR في الـ path بتاع الـ environment variables زي ما عملنا في برنامج ffmpeg. باعتبار إنك ضفته وتام.. هترجع لمجلد Tesseract-OCR هتلاقى جواه مجلد tessdata ده المجلد اللي فيه training data للغات اللي بيقدر يتعرف عليها البرنامج. لو ملقيتش اللغة اللي عاوزها هتنزلها من هنا [Data-Files](#) وتنسخها في مجلد tessdata.



## تحويل صورة إلى نص من خلال command line

طريقة استخدام البرنامج..

```
tesseract image_name output_file
```

- وبالأمر ده البرنامج هيحاول يستخرج النص من الصورة اللي بتحدد اسمها ويخزنه في ملف output\_file باللغة الافتراضية اللي هي الإنجليزية .eng.

لتحديد اللغة

```
tesseract image_name output_file -l language
```

ودي قائمة باللغات اللي بيدعمها البرنامج [Data-Files](#)

هناخد مثال على الـ command line .. هنجيب الصورة اللي عاوزين نحولها لنص و في

المثال ده أنا عملت سكرين شوت لجزء من الوثيقة بتاعة المكتبة وحفظتها باسم [ocr.png](#).

### Brief history

Tesseract was originally developed at Hewlett-Packard Laboratories Bristol and at Hewlett-Packard Co, Greeley Colorado between 1985 and 1994, with some more changes made in 1996 to port to Windows, and some C++-izing in 1998. In 2005 Tesseract was open sourced by HP. Since 2006 it is developed by Google.

فلو هنجرب على الصورة ocr.png


```
>tesseract ocr.png ocr
```



- ocr.png دى الصورة بتاعتنا و ocr ده الملف النصى اللي هيخزن فيه النص اللي هيطلعه من الصورة .. وبتكتب اسم الملف فقط مش بتكتب ocr.txt.
- مقارنة بين شكل الصورة والنص اللي أستخرناه منها واللى فيه نسبة خطأ.

## Brief history

Tesseract was originally developed at Hewlett-Packard Laboratories Bristol and at Hewlett-Packard Co, Greeley Colorado between 1985 and 1994, with some more changes made in 1996 to port to Windows, and some C++-izing in 1998. In 2005 Tesseract was open sourced by HP. Since 2006 it is developed by Google.



## استخدام tesseract مع لغة البايثون

برنامج tesseract له أكثر من wrapper بأغلب لغات البرمجة المشهورة ومنها البايثون اللي ليها مكتبة مشهورة اسمها [pytesseract](#).

- تثبيت المكتبة باستخدام pip

```
pip install pytesseract
```

- بتحتاج تثبت معاها مكتبة تانيه اسمها pillow ودى بتقري الصورة اللي عاوز تستخرج منها النص.

```
pip install pillow
```



بعد ما هتثبت pytesseract و pillow وياريت تكون متأكد من تثبيتك لبرنامج tesseract  
 ocr في الـ command line تقدر تشغل السكريبت ده

```
from PIL import Image
from pytesseract import image_to_string

img = Image.open('ocr.png')
text = image_to_string(img)

print(text)
```

Download script [ocr.py](#) from GitHub

- هنا عاوزين نستخرج النص من نفس الصورة ocr.png
- دالة open بتقري الصورة في object اللي بنمره للدالة image\_to\_string  
 عشان تستخلص النص منه.

عشان تعرف اكثر عن المكتبة من هنا [.pytesseract](#)


وعشان تعرف أزاى تستخدم البرنامج مع الصورة اللي فيها كتابة بالعربي أو تعمل training  
 للبرنامج بحيث إنك تحسن أداءه فلازم تدرس الموضوع كويس من الـ documentation بتاعة

البرنامج [tesseract](#)





## الفصل 6 - تطبيقات الويب Python Web Application



- ✓ أزاي بتشتغل المواقع
- ✓ الاستضافات Hosts
- ✓ ويب سيرفر web servers
- ✓ تقنية CGI common gat interface
- ✓ سيرفر أبانتشى Apache server
- ✓ الفريمورك Framework
- ✓ فريمورك فلاسك Flask Framework
- ✓ استضافة تطبيقات البايثون Python Hosting



في الفصل ده هنتعلم بعض طرق استخدام لغة البايثون في تطبيقات الويب وازاي نستفيد بالحاجات اللى أتعلمناها أننا نعمل موقع بلغة البايثون ونستضيفه على سيرفر ونقدر نوصله من أى مكان.


## أزاي بتشتغل المواقع


بس في الاول عاوزين نعرف مواقع الأنترنت شغاله أزاي؟

- الموقع بتاعك عشان يبقى متاح لأى حد على الأنترنت بيتحط على جهاز كمبيوتر متوصل بالأنترنت اسمه السيرفر server. السيرفر ده ليه عنوان ثابت ip address يبقى مربوط بعنوان الموقع الـ domain name.
- لما تفتح المتصفح وتكتب عنوان الموقع domain name المتصفح بيعمل حاجة اسمها http request يعنى بيبعت طلب للسيرفر ده عن طريق بروتوكول اسمه http يقوله هاتلى المحتوى بتاع الموقع أو الصفحة دى.
- السيرفر لو لقي الصفحة هيرد عليه بالـ response وهو المحتوى بتاع الصفحة على شكل نص plain text..النص ده بيوصل للمتصفح اللى بيقوم بتحويله إلى الشكل المرئى Graphical اللى فيه صور ورسومات وألوان وزراير والحاجات اللى بتتعامل معاها في صفحات الأنترنت.
- محتوى الموقع ده أما يكون محتوي ثابت static وهو صفحة مكتوبة بلغة html ودى لما المتصفح يبعث request السيرفر بيبعتله الكود بتاع الصفحة زى ما هو زى ما أنت خزنه على السيرفر.



- طيب لو عاوز تعمل موقع يّخزن داتا في قاعدة البيانات ويتعامل مع نظام الملفات ويعمل تسجيل دخول وتسجيل أعضاء ومواضيع وغيره. في الحالة دي الموقع بتاعك مش مجرد صفحة html ميتة لما تطلبها السيرفر بيبعتها لك زي ما هي .. الموقع هيتعامل مع السيرفر وقواعد البيانات اللي عليه. وعشان نعمل مواقع زي دي بنحتاج مع الـ html و لغات التصميم لغات برمجة اسمها server side.
- في الحالة دي لما تعمل request للسيرفر باسم الموقع بتاعك.. السيرفر مش هيبعت المحتوى بتاع الموقع على طول لأن المحتوى ممكن يكون كود بلغة البايثون واحنا مش عايزين الكود عايزين النتيجة بتاعته.
- فالسيرفر لما يجيله الـ request هياخد الكود بتاع الموقع اللي هو عبارة عن سكربت بلغة معينة زي php,Python,Ruby,Ring ويعمله execute في الـ interpreter الخاص باللغة ويبعت النتيجة في الـ response ودي اللي هتشوفها انت في المتصفح. الصورتين دول بيوضحوا الفرق لما تفتح صفحة موقع html ولما تفتح موقع معمول بلغة البايثون.





- لاحظ الفرق بين الصورة دي والصورة اللي فوقها .. لما السيرفر جاله request باسم الصفحة page اللي أمتادها html. بعث الكود اللي فيها زي ما هو.
- ولما بعثناه request باسم الصفحة اللي عنوانها py. أحننا معرفينه أنه لو جه request بالأمِتداد ده ياخذ الصفحة ويعملها execute في المفسر بتاع لغة البايثون وبيبعث النتيجة.

طيب يعنى انا لو عاوز أعمل تطبيق بسيط جداً مثلاً يجمع رقمين هل أعمله بالبايثون 😊؟

- مش لازم .. لو تعرف لغة ال javascript والاستخدام الشائع ليها إنها لغة client side بتفسر في المتصفح.. فتقدر من خلالها كل العمليات الحسابية والمنطقية وأى حاجة ليها علاقة بمكونات صفحة html أو المتصفح زي DOM و BOM وكل حاجة تتخيلها على المتصفح فمفيش داعى إنك تستخدم لغة البايثون.



طيب أمتى تستخدم لغة البايثون أو أى لغة server side 🤗

- الإجابة هتستخدمها فى حالة إنك عاوز تعمل موقع يتعامل مع database او file system او sessions أو cookies والحاجات اللى متقدرش تعملها بالجافا سكرت كلغة client side.

## الاستضافات Hosts

الاستضافة هى المساحة اللى بتشتريها على السيرفر المتصل بالإنترنت عشان خط الملفات بتاعتك وبتبقى مربوطة بالك domain name بحيث إن أى حد يقدر يوصل للموقع من خلاله ويبقى عليها البرنامج اللى (برده أسمه سيرفر) اللى لما يجيله request بعنوان الصفحة ينفذها سواء كانت صفحة php او python او asp.net .

و الاستضافات اللى تقدر تنشر عليها تطبيقات بلغة البايثون نوعين :

- اما تبقى [cloud hosting](#) او [vps](#) وأمثله للإستضافات دى زى Heroku و OpenShift و Azure أو PythonAnyWhere وغيرهم كثير.
- والنوع التانى هو إستضافات shared hosting ودى فى الغالب بيبقى مثبت عليها سيرفر [apache](#) واللى بيدعم أكثر من interface و موديول يسمحوا له بتفسير لغة البايثون.. وأمثله للإستضافات الـ shared hosting اللى بتدعم لغة البايثون زى GoDaddy و Bluehost وغيرهم كثير.



## ويب سيرفر web servers

الويب سيرفر Web server مكون من جزئين ..

- جزء هاردوير وهو جهاز كمبيوتر المتوصل بالإنترنت وشغال 24 ساعة وبتحجز عليه مساحة تخزن عليها ملفات الموقع بتاعك واسمها الأستضافة host وبيديك عنوان رقمي ip address بتربطه باسم الموقع domain name عن طريق خدمة DNS.
  - تاني حاجة جزء السوفت وير وهو البرنامج اللي بيشتغل على السيرفر عشان ينظم عمليات الإتصال بين السيرفر server والمستخدمين clients عن طريق بروتوكولات http/https وهو ده اللي بيحدد طريقة التواصل بين المتصفح بتاعك والكمبيوتر اللي عليه الموقع و هو اللي بيستقبل ال requests ويرد بال response اللي بتشوفها في المتصفح.بالأضافة إنه بيتعامل مع ملفات الموقع حسب نوعها لو صفحات html بيبعتك المحتوى بتاعها زي ما هو ولو ملفات بأى لغة برمجة php,Python,Ruby بيعملها execute وبعدين يبعثك النتيجة في ال response..
- من أمثلة سيرفرات http المشهورة سيرفر أباتشى apache وسيرفر nginx .

أنت كمبرمج عشان تعمل سكربتات بلغة البايثون وتشتغل في المتصفح في مرحلة التطوير او التجريب بتحتاج برنامج سيرفر محلي هتثبته على جهازك والمرحلة الثانية إنك تعمل نشر للموقع deploying و تستضيف السكربتات على ال hosts اللي بتدعم لغة البايثون زي ما قولنا من شوية.



## تقنية CGI

من التقنيات القديمة المستخدمة لتشغيل تطبيقات لغة البايثون و لغات البرمجة الثانية على الويب هي [Common Gate Interface](#) CGI .. وزي ما ذكرت مسبقاً لما تبعت request للسيرفر هيرد عليك في ال response بالمحتوى بتاع صفحة الويب لو صفحة html.. وإن كانت سكرت للغة برمجة هيبعت السكرت ده لك interpreter ويرجعك النتيجة بتاعته يعنى السيرفر مينفعش يبعثلك السكرت بتاعك بصورته النصية.. وإن السيرفر بيعمل كوسيط interface بين المستخدم وال interpreter اللي بيفسر السكرت ومن هنا جاءت التسمية.

## سيرفر أباتشى Apache server

عشان نقدر نطور مواقع بلغة البايثون ونجربها على المتصفح بتاعنا أو نخليها متاحة لأي مستخدم على الانترنت بنحتاج برنامج http server ومن أشهر البرامج دى سيرفر أباتشى [.apache](#).


عشان نعمل أباتشى على ويندوز كالعاده في مواقع البرامج مفتوحة المصدر بتلاقى السورس كود في الموقع الرسمي وهحتاج تعمل build بنفسك.. فأحنا مش هنعمل كده ونشوف أي حد عامل releases منه لنظام التشغيل بتاعنا.. و هتلاقى أكثر من برنامج ويب سيرفر معتمدين على سيرفر الأبأشنى زي wamp server و xampserver أو appserve أو Bitname .



طبعاً مستخدمين php عارفين البرامج دى ويستخدموها أو واحد منها كسيرفر فى برمجة المواقع بالـ php لأنها عبارة عن برنامج apache server ومتضاف عليها موديلات او interfaces للغة php.

أنا هستخدم برنامج اسمه [apachehaus](#) وهو نسخة خفيفة لسيرفر الأباتشى. البرنامج ده مش الأفضل ممكن تستخدم أى برنامج تانى من اللى ذكرتهم فوق مفيش مشكلة.. المهم تشغل سيرفر أباتشى وتعمل الإعدادات اللى هنعملها بعد شوية.

- لو حملت apachehaus.. هتفك ضغط الملف هتلاقى مجلد اسمه Apache24 هتنسخة مثلاً فى البارتيشين C وهيكون جواه الفولدرات دى ..



- مجلد bin وده اللى فيه الـ binaries أو الملفات التنفيذية اللى هنشغل منها السيرفر.
- مجلد cgi-bin ده هنعط فيها سكريبتات لغة البايثون اللى عاوزين نشغلها فى المتصفح عن طريق تقنية CGI.
- مجلد conf فيه ملف httpd.conf بتنزيط منه إعدادات السيرفر وهنعمل فيه تعديل.






## تشغيل سيرفر Apache

- عشان تشغل البرنامج هتدخل بالـ command line فى الفولدر bin أياً كان مكانه.
- وهتكتب اسم الملف اللى بيشتغله و httpd هتسبب الـ command line مفتوح ومتفلهوش لأنك لو قفلته السيرفر هيقف.

```
>cd apache24/bin
Apache24\bin>httpd
```

- وأخيراً هتفتح المتصفح وتكتب فيه [localhost](http://localhost) وهتظهر معاك الصفحة دى.



- فى برامج سيرفرات تانيه زي wamp و xamp و Bitname وليها واجهة رسومية وطريقة تشغيل أسهل من كده لو مش حابب البرنامج ده.



## إعداد سيرفر أباتشي Apache configuration

- عشان تقدر تخلى سيرفر أباتشي يشغل سكريتات لغة البايثون فى المتصفح لازم تعمل تعديل بسيط فى ملف httpd.conf الموجود فى الفولدر conf .
- أفتح الملف ده ودور على السطر ده AddHandler cgi-script

```
# To use CGI scripts outside of ScriptAliased directories:
# (You will also need to add "ExecCGI" to the "Options" directive.)
AddHandler cgi-script .cgi .pl .py
```

- هتشيل الكومنت # من السطر AddHandler وتضيف الأمتداد .py
- اللى عملناه هيخلي السيرفر لما يشوف أى ملف أمتداده .cgi او .py وده سكريت بايثون أو .pl وده سكريت للغة perl مالناش دعوه بيه..ساعتها مش هيبعتلك المحتوى بتاعه.. هيبعته لك interpreter بتاعه يعمل execute زى ما هتحدد فى أول السكربت وهنشوف أزاى.

بعد ما تعمل الخطوات دى هتقفل السيرفر وتشغله تانى بأنك هتقفل الـ command line اللى شغلنا فيه السيرفر من شوية وتدوس Ctrl+C عشان يقفل البرنامج بتاع السيرفر من غير ما يطلع من المسار بتاعه أو تقفل الـ CLI خالص وتفتح السيرفر بالطريقة اللى عملناها من شوية أنت حر المهم تقفل السيرفر وتفتحه تانى.



## تشغيل سكريت CGI


هتروح في المجلد cgi-bin وتعمل فيه السكريت ده وحفظه بأى اسم مثلاً test.py

```
#!/python
print("Content-type: text/html\n\n")
print('<h1 style="color:red">', 'Hello CGI', '</h1>')
```

- السطر الأول ده بيحدد مكان المفسر الـ interpreter location مهم جداً وده بيعرف الأباتشى إنه هيعمل execute للسكريت ده بأى برنامج أو interpreter.
  - الـ interpreter location بتاع لغة البايثون على Linux بيكون بالشكل ده `#!/usr/bin/python` أو لو كانت بايثون مثبتته في مسار تاني هتحتاج تكتب المسار كله.
  - بالنسبة لويندوز كتبنا `#!/python` عشان مسار الـ interpreter متخزن في الـ environment variables ومعروف بالنسبة للسيرفر ولو مش موجود كنا ه نكتب المسار كله مثلاً موجود عندي على ويندوز 10 وبايثون 3.7 بالشكل ده `C:\Users\Mahmoud\AppData\Local\Programs\Python\Python36-32\python.exe`
  - السطر التاني مهم برده لأنه عبارة عن الهيدر اللى بيعرف السيرفر إن دي صفحة html وهتشتغل في المتصفح ومن غيره أو من غير `\n` اللى في الآخر السكريت مش هيشغل.
  - آخر حاجة الجملة اللى هنطبعها في المتصفح.
- بعد ما تحفظ السكريت تأكد إن الـ localhost شغال وبعدها هتكتب في المتصفح



<http://localhost/cgi-bin/test.py>



## Hello CGI

أى خطأ يحصل معاك في السطر الأول أو الهيدر أو الكود.. السيرفر هيجبك صفحة Internal Error زي دى ومش هيقولك الخطأ فين فخلي بالك..

### Internal Server Error

The server encountered an internal error or misconfiguration and was unable to complete your request.

Please contact the server administrator at [admin@example.com](mailto:admin@example.com) to inform them of the time this error occurred, and the actions you performed just before this error.

More information about this error may be available in the server error log.

و عشان تعرف أكثر عن استخدام CGI تقدر تشوف الشرح ده على موقع [howto](#).apache

## تطبيقات على صفحات CGI

استخدامك لأى لغة برمجة في الويب هيكون ليها وظائف محده وفي الغالب بيكون في استقبال الداتا من forms والتعامل مع قواعد البيانات database ورفع الملفات file upload والتعامل مع الـ cookies والـ sessions والحاجات دي.

تقينة CGI تعتبر من التقنيات البطيئة والقديمة فمش هنركز علي تفاصيلها كثير لأن استخدام لغة البايثون في الويب منتشر أكثر باستخدام الـ flask زي frameworks و Django واللى وهتكلم عن الأولى في الفصل ده.



## تطبيق Contact Form

هنعمل صفحة contact form وهى فورم html, المستخدم هيكتر بيانات فى فورم ويعملها أرسلال فيتبعبت بالإيميل وهتعتبر مثال كويس لطريقة دمج صفحة html فى سكربت بايثون والتعامل مع post request وقراءة قيم الـ inputs اللى فى الـ form من خلال لغة البايثون.

- هتعمل صفحة html وتسميها contact.html وتقدر تحمل الكود بتاعها من GitHub.

### Contact US

Name:

Email:

Phone:

Gendar:

Message:

Download script [contact.html](#) from GitHub



- بعدين هتعمل سكرت contact.py وهتخط فيه الكود ده.

```
#!/python
print ("Content-type: text/html\n")
import cgi,os
from mail import send

con={'server' : 'smtp.mail.yahoo.com',
    'port' : '587',
    'from' : '...@yahoo.com',
    'pass' : '****',
    'to' : '...@gmail.com',
    'subject' : 'CONTACT FORM'
}
form={}

if os.environ['REQUEST_METHOD'] == 'POST':
    for key,val in dict(cgi.FieldStorage()).items():
        val=str(val)
        val=val[val.find(',')+3:len(val)-2]
        form[key]=val
    if send(con,form):
        print('<center><h1 style="color:green">Succeed<h1></center>')
    else:
        print('<center><h1 style="color:red">Failed<h1></center>')
else:
    html=open('contact.html','r').read()
    print(html)
```

Download script [contact.py](#) from GitHub

- هنا أستخدمنا مكتبتين.. CGI ودى بتقرى القيم من الـ inputs فى الـ form ومكتبة

os اللى لما المستخدم يعمل submit ويحصل post request فساعتها نبعت الإيميل.

- وعشان نبعت الإيميل أستخدمنا الموديول [mail.py](#) اللى عملناه فى الشاتر بتاع

Packages ومكتبة stplib.



- جملة الشرط `if os.environ['REQUEST_METHOD'] == 'POST'` يتحقق لما المستخدم يملئ البيانات في الفورم ويدوس submit ويحصل post request.
- لو الشرط إتحقق دالة FieldStorage بترجع الفورم اللي بنعمل iteration عليها ونحاول نطلع القيم بتاعتها ونحطها في dictionary اسمه form
- بعدين هنبعت الإيميل بالدالة send. اللي بتاخذ أنتين dictionary وهم الحقول بتاعة الإيميل form وبيانات الإتصال con.
- جملة else في آخر 3 سطور دي بتتحقق في الحالة العادية لما المستخدم يفتح الموقع على طول قبل ما يعمل submit وفي الحالة دي بنقري الصفحة contact.html
- كملف نصي بدالة open ونعملها print وهي دي الي أنت بتشوفها لما تفتح الموقع على طول.
- طبعاً نتحط الملفات الثلاثة contact.py, mail.py, contact.html في مجلد cgi-bin وهتفتح العنوان ده في المتصفح <http://localhost/cgi-bin/contact.py>

localhost/cgi-bin/contact.py

**Contact US**

Name:

Email:


Phone:

Gender:

Message:

localhost/cgi-bin/contact.py

**Succeed**

 to me ▾ @yahoo.com

Name : Mahmoud Aly  
 E-mail : [my\\_email@gmail.com](mailto:my_email@gmail.com)  
 Phone : 123456789  
 Gender : Male  
 Message : Hello Python CGI ^\_^



وتقدر تحمل ملفات المشروع كله من هنا [cgi-contact.zip](http://cgi-contact.zip)

وده أخرى فى الكلام عن CGI لو عاوز تعرف أزاى ترفع الملفات file upload وتتعامل مع

الـ cookies والـ session كمل فى الـ [tutorial](http://tutorial.tutorialspoint) الجميلة دى على موقع [tutorialspoint](http://tutorialspoint).

و لو عاوز تعرف أزاى تستضيف المواقع اللى بتعملها بالـ CGI على الأنترنت وأى حد يشوفها

فأستنى شوية هتكلم عنها بعدين.

## الفريمورك Framework

شوفت عشان نشغل صفحة CGI أضطرنا نزل سيرفر Apache وعملنا

configuration وكتبنا سكريبت بايثون بطريقة معينة ده غير الأداء السيء للسيرفر اللى

كل ما تعمل refresh للصفحة بيعمل execute للسكربت من جديد والموضوع ده بطئ.

ف عملوا الـ frameworks وهى مجموعة من المكتبات لتسهيل عمل تطبيقات الويب

بالبايثون.. وببقي معاها السيرفر بتاعها مش هحتاج لسيرفر الأباتشى وخصوصاً فى عملية

التطوير أو التجريب debugging وهتقدر تتعامل مع قواعد البيانات وتعمل upload

للملفات بشكل سهل وآمن وكمان بيعملك طريقة معينة فى التصميم design pattern

يفصلك فيها بين كود html وتصميم الموقع عن كود python وده بيخليك تعمل شغل

منظم سهل الفهم والتعديل بالإضافة إنه بيقدر يدخل أكواد بايثون فى بين أكواد html

بشكل سهل عن طريق الـ template enignes زى ما هتشوف دلوقتى.





## فلاسك Flask

[flask](#) من الفريم وركس البسيطة والمشهورة و تقدر تاخذ فكرة عنها في الموقع بتاعها وهتلاقى ليها documentation كويسة جداً ومن خلالها هنعمل تطبيقات ويب بشكل سهل ومنظم.

تقدر تثبت Flask عن طريق pip

```
pip install Flask
```

## أول تطبيق على flask

- هتعمل سكرت جديد وتسميه app.py أو تقدر تسميه أى اسم غير flask.py عشان ميتلخبطش مع اسم المكتبة.

```
from flask import Flask
app = Flask(__name__)

@app.route('/')
def home():
    return '<h1>Hello Flask</h1>'

app.run(debug=True)
```

سكرتات flask مش بنشغلها في الـ IDLE. هتفتح الـ command line في المسار الموجود السكرت وتكتب اسمه app.py أو ندوس عليها مرتين وتشغله كـ executable file.



C:\Windows\py.exe

```
* Serving Flask app "flask-test1" (lazy loading)
* Environment: production
  WARNING: Do not use the development server in a production environment.
  Use a production WSGI server instead.
* Debug mode: on
* Restarting with stat
* Debugger is active!
* Debugger PIN: 679-601-415
* Running on http://127.0.0.1:5000/ (Press CTRL+C to quit)
```

- لما شغلنا السيرفر هيشغل السيرفر الخاص بالفريم ويرك على العنوان

ده <http://127.0.0.1:5000> أنسخه في المتصفح

## Hello Flask

وهتظهر الصفحة قدامك..

نرجع للكود

- في البداية بنعمل object من الكلاس Flask(\_\_name\_\_) وبياخد برامتر `__name__` ده بيعرف للسيرفر أسم الأبلكيشن بتاعنا
- تاني حاجة دالة route بنحدد بيها الـ routes أو المسارات بتاعة الصفحات في الأبلكيشن لما نفتحها في المتصفح .
- مثلاً لما فتحت السيرفر في المتصفح بالعنوان ده <http://127.0.0.1:5000> ده اسمه الـ main route بتمثله العلامة / كبرامتر في الدالة `route('/')`.
- وعشان تفهم الموضوع أكثر.. أكتب في المتصفح العلامة دي وبعدها أي حاجة زي كده <http://127.0.0.1:5000/home> مش هيلاقى المسار ده وهيقولك الصفحة مش موجودة.

← → ↻ ⓘ 127.0.0.1:5000/home

## Not Found

The requested URL was not found on the server. If you entered the URL manually please check your spelling and try again.



- طيب لو عاوز تحدد اكثر من route للصفحة الوحده بيكون بالشكل ده

```
@app.route('/')
@app.route('/home/')
@app.route('/index/')
def home():
    return '<h1>Hello Flask</h1>'
```

فلو كتبت في المتصفح <http://127.0.0.1:5000/home> أو <http://127.0.0.1:5000>

أو <http://127.0.0.1:5000/index> هينفذ دالة home اللي بترجع جملة Hello Falsk

اللي بتشوفها في المتصفح .

← → 🔄 127.0.0.1:5000/home/

**Hello Flask**

← → 🔄 127.0.0.1:5000/index/

**Hello Flask**

← → 🔄 127.0.0.1:5000/page/

**Not Found**

- الدالة الموجود تحت ال route هي اللي بتنفذ لما تكتب عنوان ال route في المتصفح وتقدر تخلي اسمها أى اسم مش لازم يكون ليه علاقة باسم ال route.
- آخر حاجة في الكود `app.run(debug=True)` دالة run بتشغل السيرفر اللي بيعرض الموقع في المتصفح والتغير `debug=True` بيخليك شغال في مود التجريب debugging بحيث إنك بتشغل السيرفر مرة وحده وتقدر تغير في الكود في السكرت app.py وتعمل save وتفتح المتصفح تعمل refresh وتشوف التغيرات من غير ما تقفل السيرفر وتفتحه من جديد.



## المتغيرات في العنوان url variable

لوهتبع متغير اسمه name وقيمه python عن طريق Get Request, فشكله يكون زي كده `http://127.0.0.1:5000/?name=python`.. وفي فريم ورك فلاسك نقدر نزيط الصفحات بحيث تستقبل اسامى معينة من المتغيرات فقط

- في ال route هتكتب اسم المتغير او المتغيرات اللي عاوز تستقبلها بين علامتين <>

```
@app.route('/page/<name>/')
@app.route('/page/<name>/<age>/')
def page(name="", age=""):
```

- مثلاً هنا عملنا route للصفحة اسمها page والمتغيرات اللي هتستقبلها أما متغير اسمه name أو متغير name و age.
- عشان تطلع المتغيرات من العنوان بتاع الصفحة وتاخذها في سكربت الايثون بتمررها كبرامترات للدالة اللي تحت ال route وطبعاً ممكن متغير يكون فاضى أو مش موحود فينبديه قيمة افتراضية " عشان ميحصلش خطأ.



هتعدل على سكرت app.py وخط فيه مسار جديد هنسميه about

```
from flask import Flask
app = Flask(__name__)

@app.route('/')
@app.route('/home/')
@app.route('/index/')
def home():
    return '<h1>I`M Home Page</h1>'

@app.route('/about/')
@app.route('/about/<name>/')
@app.route('/about/<name>/<age>/')
def about(name="", age=""):
    return '<h1>My Name Is : %s<br>My Age Is : %s</h1>'%(name,age)

app.run(debug=True)
```

جرب تفتح الصفحة من العنواين دي [about](#) و [about/Mahmoud](#) و [about/Mahmoud/23](#)

← → 🔄 127.0.0.1:5000/about/	← → 🔄 127.0.0.1:5000/about/Mahmoud/	← → 🔄 127.0.0.1:5000/about/Mahmoud/23/
<b>My Name Is :</b> <b>My Age Is :</b>	<b>My Name Is : Mahmoud</b> <b>My Age Is :</b>	<b>My Name Is : Mahmoud</b> <b>My Age Is : 23</b>

- طبعاً مش المستخدم اللي بيكتب قيم المتغيرات بنفسه في المتصفح ولكنها بتروح عن طريق GET Request بس بوريك طريقة استخراج المتغيرات من العنوان.



## إضافة صفحات html

في الـ frameworks يظهر عندنا مصطلح جديد اسمه `template` وهو طريقة لدمج أكواد البايثون في اكواد الـ `html`.

```
x='World'
print('<div>Hello %s</div>'%x)
```

نشوفنا وأحنا وشغالين في سكرت CGI

الموقع كان عبارة عن سكرت بايثون

وكود `html` بعمله `print` وبطرق الـ `string format` اللي بتسمح بيها لغة البايثون بقدر

أدخل متغيرات وقيم بتاعة لغة البايثون مع الـ `tags` بتاعة الـ `html`.

ونشوفنا كمان في مثال CGI لما حبيت أضيف صفحة كاملة عملتها في ملف `html`

وقريته بدالة `file` كنوع من التبسيط.

لكن مكتبة Flask بيستخدم `template engine` اسمه [jinja](#) بيحل المشكلة دي

بيدمج المتغيرات بتاعة البايثون في أكواد `html` وكمان بيدخل جمل الشرط التكرار

في أكواد `html` وهنشوف الموضوع ده مفيد ازاي والأهم من دول بيعزل صفحة

`html` عن سكرت البايثون.

عشان تضيف صفحة `html` لمسار معين بتستخدم دالة `render_template`.

```
from flask import Flask,render_template
@app.route('/page/')
def page():
    return render_template('page.html',msg='Hi ^_^')
```



- في المثال ده لما تفتح المسار /page/ هيعرضلك الصفحة page.html الموجودة في الفولدر templates.. وهيمرر ليها متغير اسمه msg.
- لو عاوز أعرض المتغير بين أكواد html في صفحة page يكون بالشكل ده

```
<h1>Message From Python : {{ msg }}</h1>
```

بتكتب اسم المتغير بين أقواس مجموعة {{variable\_name}} بس بشرط تكون مررت المتغير ده كبرامتر في الدالة render\_template اللي بتربط بين صفحة html والـ route. هنرجع للـ app بتاعنا.

```
- app.py
- templates
  -- home.html
  -- about.html
```

- جنب السكريبت app.py هتعمل مجلد اسمه templates وده اللي بيتحط فيه صفحات html وبتعمل فيه ملفين home.html وabout.html وشكل فولدر البرنامج هيكون كده.

home.html

```
<h1>Hello ^_^</h1>
<p>Local Time : {{time}} </p>
<p>Operating System : {{os}} </p>
```

- دي صفحة html عاديه عاوزين نعرض فيها متغيرين جايين من البايثون وهم time و OS عشان نعرض في الصفحة الوقت ونظام التشغيل.



about.html

```
<h1>About Me</h1>
<p>My Name Is : {{name}}</p>
<p>My Age Is : {{age}}</p>
```

- صفحة about هنعرض فيها متغيرين name و age

app.py

```
from flask import Flask,render_template
import time,platform
app = Flask(__name__)

@app.route('/')
@app.route('/home/')
@app.route('/index/')
def home():
    return render_template('home.html',time=time.ctime(),os=platform.system())

@app.route('/about/')
@app.route('/about/<name>/')
@app.route('/about/<name>/<age>/')
def about(name='',age=''):
    return render_template('about.html',name=name,age=age)

app.run(debug=True)
```

- تحت المسار home هنعرض الصفحة home.html بدالة render\_template ونمرر ليها المتغيرين time و .os
- نفس الكلام بالنسبة لصفحة about هنقرى الـ url variables اللي اسمهم name أو age ونعرضهم في كود html في صفحة .about.html





← → ↻ ⓘ 127.0.0.1:5000

Hello ^\_^

local time : Sun Sep 16 23:43:58 2018

Os Name : Windows

← → ↻ ⓘ 127.0.0.1:5000/about/Mahmoud/23/

About Me

My Name Is : Mahmoud

My Age Is : 23

## الشرط والتكرار في الـ templates

قولنا مكتبة flask مستخدمة template engine اسمه Jinja مش بس بيساعدك تدخل

متغيرات البايثون في الـ tags بتاعة HTML بس لكنه بيدعم عمل جمل الشرط والتكرار

وحاجات تانية تقدر تشوفها في الوثيقة من هنا [docs](#)

- إضافة متغيرات من لغة البايثون

```
<tag> {{variable_name}} </tag>
```

- جملة الشرط if وجملة التكرار for داخل الـ templates.

If condition	for loop
<pre>{%if condition1%}   &lt;h1&gt;HTML CODE1&lt;/h1&gt; {%elif condition2%}   &lt;h1&gt;HTML CODE2&lt;/h1&gt; {%else%}   &lt;h1&gt;HTML CODE3&lt;/h1&gt; {%endif%}</pre>	<pre>{%for iteration_statement%}   &lt;h1&gt;HTML CODE..&lt;/h1&gt; {%endfor%}</pre>



- لاحظ إن المتغيرات بتتحط بين أقواس {{ }} أما الشرط والتكرار بالشكل ده {% %} .
- خلاف الـ syntax بتاعة البايثون مفيش line indent هنا ومفيش علامة : تبدأ بيها البلوك.. وبتنهي البلوك بالجمل .endif,endifor

عشان نجرب الموضوع هنعدل على دالة about و هنعمل ليستة اسمها colors وفيها شوية أسامي للألوان ونمررها لصفحة about.html.

```
def about(name='', age=''):
    colors=['red', 'green', 'blue', 'orange']
    return render_template('about.html', name=name,
                           age=age, colors=colors)
```


about.html

```
<h1>About Me</h1>
{%if name!='' and age !=''%}
<p>My Name Is : {{name}}</p>
<p>My Age Is : {{age}}</p>
{%else%}
<p>no information provided</p>
{%endif%}
<h1>Favorite Colors</h1>
<ul>
{% for color in colors %}
  <li style="color:{{color}}">{{color}}</li>
{% endfor %}
</ul>
```

- في صفحة about في الاول في حالة إنه مكنش فيه قيمة للمتغيرين My Name Is :  
My Age Is :  
name و age في العنوان كانت النتيجة بتبقى كده



- بعد التعديل وإضافة جملة الشرط `if`.. إذا كان فيه قيمة للمتغيرين `name` و `age` يطبعهم عادى ولو مفيش يطبع جملة `no information provided`.
- ثالث متغير أو `list` وهو `colors` عملنا له `iteration` فى جملة `for` وكونا بالتكرار عناصر الليسته `<ul>` بكود مختصر . ودى من مميزات استخدام التكرار فى `html`.



## إضافة ملفات `css` و `javascript`

```
- app.py
- templates
  -- page.html
- static
  -- style.css
  -- script.js
```

عشان تضيف ملفات `css` و `javascript` أو صور `img`

فى الـ `template` بنحطهم فى فولدر بنسماه `static`

فبيكون شكل البرنامج زى كده .

ومش لازم تخط ملفات `css` و `js` جوة المجلد `static` على طول..

مكن تخطهم فى مجلدات فرعية بالشكل ده `static/js/script.js` و `static/css/style.css` .



لما بتضيف الملفات لصفحة html بيكون بالشكل ده..

```
<script src="{{url_for('static', filename='script.js')}}"></script>
<link rel="stylesheet" href="{{url_for('static', filename='style.css')}}">

```

- دالة url\_for مهمة جداً لما تضيف ملف CSS أو JS أو img.. الدالة بتساعد السكرت يلاقى مكان الملف دى مهما كان مكان المشروع على السيرفر .
- كان ممكن تخلى المسار `/static/file_name` على طول .. بس ده ممكن يعملك مشاكل فى الإستضافة اللى هتنشر عليها الأبلكيشن لو حطيت المشروع فى مجلد فرعى عليها مش فى الروت المشكلة دى مش هتحس بيها على سيرفر فى debugging .
- ممكن برده تستخدم ملفات CDN أو روابط ملفات JS,CSS على سيرفرات خارجية بشكل مباشر طبعا .

هنتعلم دلوقتى أزاى نضيف مكتبة jquery داخل الـ template فى المشروع بتاعنا.

```
- app.py
- templates
  -- home.html
  -- about.html
  -- jquery.html
- static
  -- jquery.min.js
```

- فى مجلد templates هتعمل صفحة html جديد اسمها `jquery.html` .
- وفى الفولدر static هتحمّل ملف [jquery](#) .
- دلوقتى شكل فولدر الأبلكيشن هيكون كده..



jquery.html

```
<script src="{{url_for('static',filename='jquery.min.js')}}">
</script>


<script>
$(document).ready(function() {
    $("#btn").click(function() {
        alert('{{msg}}')
    });
});
</script>
<button id="btn">Click Me</button>
```

- دي صفحة html عادية فيها كود جافاسكريبت وعملت فيها إضافة لمكتبة jquery اللى موجودة فى فولدر static.
- وفى كود jquery لما تدوس على الزرار اللى الـ id بتاعه btn هيعمل alert لمتغير جاي من البايثون msg..عشان تعرف إنك تقدر تدخل قيم من البايثون برده مع الجافا سكريبت.

فى الملف app.py هتضيف route جديد للصفحة jquery.html

```
@app.route('/jquery/')
def jquery():
    msg="Hello Flasker ^_^"
    return render_template('jquery.html',msg=msg)
```

- هنا لما تفتح المسار [/jquery](#) هتعرض صفحة jquery.html وممرنا ليها المتغير msg.





## قراءة المدخلات من صفحة html

عشان تاخد inputs من صفحة html لسكربت الـ بايثون.. أما عن طريق إنك تعمل form أو تمرر الداتا في http request بالـ ajax زي ما هنتشوف

## الـ فورم form

في لغة html الـ form tag ده بيبقى فيه مجموعة inputs بندخل فيها البيانات اللي عاوزين نبعثها للسيرفر وبعدين بنعمل submit للـ فورم وبنحدد الـ method اللي هنبعت بيها الداتا أو الـ fields من الـ فورم للسيرفر وأما تكون POST/GET request. وهناخد مثال يوضح طريقة أستلام الداتا من الـ فورم باننا موقع آله حاسبة بسيطة هيكون شكلها كده.

```
- app.py
- templates
  -- home.html
  -- about.html
  -- jquery.hyml
  -- form.html
```

- في الـ فولدر templates هتعمل صفحة جديدة form.html وهتحتط فيها الكود ده.



Form.html

```

<h1>Falsk Calculator</h1>
<form action="" method="post">
  <input type="number" name='num1' value="{{num1}}" required>
  <select name="opr">
    <option>+</option>
    <option>-</option>
    <option>*</option>
    <option>/</option>
    <option>%</option>
    <option>**</option>
  </select>
  <input type="number" name='num2' value="{{num2}}" required>
  <label>{{result}}</label><br><br>
  <button type="submit">Calc</button>
</form>

```

- الفورم فيها 2 input المستخدم هيكترب فيهم الأرقام و select هيجدد منها العملية الحسابية واسمائهم num1,num2,opr لأننا هنطلع الـ values بتاعتهم من الفورم في تطبيق البايثون عن طريق اسمائهم.
- لما نعمل submit للفورم الداتا هتتبع عن طريق post request للعنوان اللي موجود في الـ action وأنا هنا سايبه فاضي..فالداتا هتروح لعنوان الصفحة اللي هنعدهه في الـ route وهنسميه /form



هتيجى فى app.py وهضيف ال route ده

```

from flask import request
@app.route('/form/', methods=['POST', 'GET'])
def form():
    result=num1=num2=''
    if request.method == 'POST':
        num1=request.form['num1']
        num2=request.form['num2']
        opr =request.form['opr']
        try:result=eval(num1+opr+num2)
        except:result='Math Error'
    return render_template('form.html',result=result,num1=num1,num2=num2)

```

- فى الاول عملنا import للكلاس request لأننا من خلاله هنتعرف إذا كان فيه post request جاي request.method وهنطلع منه القيم بتاعة الفورم request.form.
- بتطلع قيمة الحقل من الفورم عن طريق اسمه request.form[input\_name].
- بعدين هنعمل execute بدالة eval للرقمين والمعامل عشان يجيب قيمتهم ويرجعها فى المتغير result اللى هيتبع للصفحة تاني عشان يعرض النتيجة.





## رفع الملفات Files upload

بتحتاج فى الموقع بتاعك إنك تعمل رفع للملفات او الصور زى المرفقات او صورة البروفايل أو الصور اللى فى المواضيع ..وطريقة الرفع ساهلة جداً فى Flask.

```
- app.py
- templates
- static
  -- uploads
```

فى الاول هنعمل الفولدر اللى هيتحفظ فيه الملفات اللى هنرفعها

ممكن يكون فى أى مكان واى اسم بس لو عاوز ترفع صور وتستخدمها

فى الـ templates فيفضل تخلى فولدر upload جوه static.

- فى فولدر templates هتعمل تابلت جديد هتسميه upload.html

upload.html

```
<h1>File Upload</h1>
{%if done%}
<div>done uploading
  <strong>
<a target="_blank"
href="{{request.script_root}}/static/uploads/{{file}}">{{file}}</a>
  </strong>
  <p><a href="{{request.script_root}}/upload">back<a></p>
</div>
{%else%}
<form action="" method="post" enctype="multipart/form-data">
<input type="file" name="myfile" required>
<br><br>
<button type="submit" >Upload</button>
</form>
{%endif%}
```



- صفحة upload عبارة عن فورم فيها input نوعه file لا يجدد الملف اللي عاوز أرفعه وأدوس upload فيعمل submit لك form ويبعث البيانات اللي فيها بـ post request وبستقبله بالدالة upload.
  - في العنواين أستخدمنا `request.script_root` عشان بترجع مكان المشروع على السيرفر لما خطه على الأستضافة. لو كان المشروع في مجلد فرعى `script_root` هيعرف السكرت مكانه عشان ميغلطش في تحديد المسارات والعنواين.
  - في tag الـ `from` فيه attribute `enctype="multipart/form-data"` ودي بتحدد نوع تشفير بيانات الفورم لما يتعملها submit والخاصية ده لازمة في حالة رفع الملفات.
- في السكرت `app.py` هتضيف روت جديد `upload`.


app.py

```
@app.route('/upload/', methods=['POST', 'GET'])
@app.route('/upload/', methods=['POST', 'GET'])
def upload():
    if request.method == 'POST':
        from werkzeug.utils import secure_filename
        f = request.files['myfile']
        f.save(app.root_path+'/static/uploads/'+secure_filename(f.filename))
        return render_template('upload.html', done=True, file=f.filename)
    return render_template('upload.html')
```

- في الأول طلعنا الملف اللي رفعناه `request.files[input_file_name]` في أويكت `f` اللي فيه أكثر من ميثود منهم `save` للحفظ والمتغير `filename` ده بيرجع اسم الملف.



- دالة save بتأخذ برامتر واحد وهو مسار حفظ الملف في المجلد static/uploads + اسم الملف filename.
- app.root\_path بترجع المسار الموجود عليه الأبلكيشن على السيرفر .. وعلى طول كده في كل العنواين للصور والسكرينات في كود html بتحط قبلها المتغير request.script\_root وفي سكرت البايثون app.app\_root.
- في الوثيقة بتاعة فلاسك بيوصوا إنك تستخدم دالة secure\_filename عشان تتأكد من إن اسم الملف آمن ويتنفع يتحفظ بيه على السيرفر بدل ما تستخدم filename.f على طول واللى بترجع اسم الملف برده.



## File Upload

Choose File CONTENT.png

Upload



## File Upload

done uploading CONTENT.png ...

[back](#)

## الجلسات sessions

الـ session هى وسيلة لتخزين معلومة بشكل مؤقت لفترة ممكن تكون طول مدة تشغيل الموقع أو بتوصل لعدة أيام.. المعلومة اللى جتزنهت المفروض إنى أقدر اوصلها من أى صفحة في الموقع عشان تعرفنى بحاجة معينة.. مثلاً لما المستخدم يعمل تسجيل دخول فالمفروض أى صفحة أفتحها تعرف مين فاتح الصفحة وهل هو عضو مسجل دخول ولا ولا زائر عادى.. فيستخدم الـ sessions في الموضوع ده.



يمكن تقولي أنا ممكن أأخزن المعلومات دي في متغيرات عادية ليه أستخدم sessions ؟

- عشان المتغيرات قيمتها بتروح لما تعمل refresh للصفحة ولكن الـ sessions بتفضل موجودة مهما عملت refresh ولأكثر من يوم كمان.

الـ session عبارة عن مكان مجزن فيه الداتا فتصورك ليه ممكن يكون ايه؟

- في لغة الـ php الـ sessions بتتخزن في ملف على السيرفر.. اما في فريم ورك فلاسك بتتخزن في الكوكيز cookies يعنى في المتصفح بتاعك بس تفرق عن الكوكيز إن الفریم ورك بتعملها تشفير encryption بكود بنحدده في الأبلكيشن بتاعنا زي ما هنشوف.

## تسجيل الدخول

هناخد مثال على الـ session وهو عمل تسجيل دخول في الموقع كـ admin جيث إننا

لما نسجل دخول يظهر محتوى مش بيظهر

للمستخدم العادي.

```
- app.py
- templates
  -- home.html
  -- about.html
  -- jquery.html
  -- form.html
  -- login.html
```

- فهتروح في فولدر templates وتعمل صفحة جديدة login.html وعبارة عن فورم فيها فيها 2 inputs واحد للإيميل والتانى للباسورد.



Login.html

```
{%if incorrect%}
<h3>Inccorect Email or Password! </h3>
{%endif%}
<form action="" method="post">
<input type="email" name='email' placeholder="Email" required>
<input type="password" name='password' placeholder="Password"
required>
<button type="submit">Submit</button>
</form>
```

و هنعدل على صفحة home.html وهنحط فيها جزئين..

- [Home](#)
- [Jquery](#)
- [Form](#)
- [Upload](#)
- [Login](#)

• رسالة تظهر للمستخدم لما يكون مسجل دخول.

• وهنعمل list فيها عناوين الروابط لكل الصفحات

اللى عملناها وفيه رابط login/logout.

home.html

```
<h1>Hello ^_^</h1>
{%if admin%}
<h4>You Are the SuperUser Of the Website</h4>
{%endif%}
<p>Local Time : {{time}} </p>
<p>Operating System : {{os}} </p>
<ul>
<li><a href="{{request.script_root}}/home">Home</a></li>
<li><a href="{{request.script_root}}/about">About</a></li>
<li><a href="{{request.script_root}}/jquery">Jquery</a></li>
<li><a href="{{request.script_root}}/form">Form</a></li>
<li><a href="{{request.script_root}}/upload">Upload</a></li>
{%if admin%}
<li><a href="{{request.script_root}}/logout">Logout</a></li>
{%else%}
<li><a href="{{request.script_root}}/login">Login</a></li>
{%endif%}
</ul>
```



أخر حاجة هنعدل فى الأبلكيشن app.py

- هتعمل import للكلاس session و redirect.

```
from flask import Flask, render_template, request, session, redirect
```

- تحت السطر app = Flask(\_\_name\_\_) هتخط الكود ده.

```
app.secret_key = 'd0dd342ebe25a8f6b7360e8c4183a5fc'
myLoginEmail='login_email@mail.com'
myLoginPass='123456'
```

- أول حاجة secret\_key ده الكود اللي بشفر بيه القيم اللي هنتخزن فى الكوكيز على الجهاز أو الـ session.
- الـ key لازم يكون سرى ومميز..وتقدر تولده وتحدد طولته ونوع الصورة بتاعته بكلاس urandom فى موديول os.

```
>>> import os
>>> os.urandom(16).hex()
'd8527771bafd6a80496cb68fbbe22114'
```

- بعدين متغير الإيميل والباسورد اللي هتعمل بيهم تسجيل دخول..المفروض هتكون مخزنهم فى قاعدة بيانات والباسورد متشفر...



## بعدین هنضيف الـ route بتاع تسجيل الدخول login

```
@app.route('/login/', methods=['POST', 'GET'])
def login():
    if request.method == 'POST':
        email = request.form['email']
        password = request.form['password']
        if(email==myLoginEmail and password==myLoginPass):
            session['isAdmin']=True
            return redirect(request.script_root+'/')
        else:
            return render_template('login.html', incorrect=True)
    return render_template('login.html')
```

- في البداية نتطلع القيم بتوع email و password من الفورم وتقارنهم بالمتغيرات اللى انت عرفتھا أو الإيميل والباسورد اللى هتجيبهم من قاعدة البيانات.
- لو مطابقين يبقى كده تم تسجيل الدخول.. فهبخزن في الـ session متغير اسمه isAdmin وقيمته True ويعمل redirect للـ route "/" اللى هو الصفحة الرئيسية.
- لو شذوفت الملف home.html عملنا فيه جملتين شرط بيتحققوا لو admin قيمته True و admin هبقى True لما نعمل تسجيل دخول ونعمل redirect للمسار .home
- المهم دلوقتى عاوز نبعث قيمة المتغير admin لصفحة home.html.. فهتروح للـ route بتاع home و هتعديل عليه كده.



```
def is_admin():
    if 'isAdmin' in session:
        isAdmin=session['isAdmin']
        return isAdmin
    return False
@app.route('/')
@app.route('/home/')
@app.route('/index/')
def home():
    return render_template('home.html',time=time.ctime()
,os=platform.system(),admin=is_admin())
```

- ضفنا المتغير admin واللى المفروض قيمته تكون True لو كنت عملت تسجيل دخول وغير كده False.
- قيمة admin بترجعها الدالة is\_admin اللى بتشوف الـ session هل فيها متغير اسمه isAdmin (اللى خزنه فى دالة login عند تسجيل الدخول) وبترجع قيمته True أو False
- المسار ده بيفتح صفحة home.html اللى عدلنا فى الكود بتاعها وخليناه لو admin=True هيظهر رسالة You Are the SuperUser Of the Website وفى اللبسته تحت هيظهر خيار logout لعمل تسجيل خروج.





طبعاً logout ده route تسجيل الخروج ودالة logout متوقع إنها تخلى المتغير isAdmin اللي في الـ session يساوى False وبعدين يحول للصفحة الرئيسية.

```
@app.route('/logout/')
def logout():
    session['isAdmin']=False
    return redirect(request.script_root+'/')
```

• ده شكل تسجيل الدخول على الموقع.

The image displays three browser screenshots illustrating the login process:

- First Screenshot:** Shows the home page with the text "Hello ^\_^" and a navigation menu where the "Login" link is highlighted.
- Second Screenshot:** Shows the login page with the URL "127.0.0.1:5000/login/". It displays an "Incorrect Email Or Password !" error message. The email input field contains "mm@mail.com" and the password field is masked with dots. A "Submit" button is visible.
- Third Screenshot:** Shows the home page after successful login, with the text "Hello ^\_^" and a message "You Are the SuperUser Of the Website". The navigation menu now includes "Home", "Jquery", "Form", "Upload", and "Logout", with "Logout" highlighted.

واخيراً تقدر تحمل ملفات الأبلكيشن كامل من هنا [flask-test.zip](#)



## تطبيقات على فريم ورك فلاسك

دول 3 تطبيقات على فريم ورك Falsk بتشمل الأجزاء اللي شرحناها في Falsk وبعض المكتبات اللي أخذناها في الكتاب قبل كده.

## Flask Contact From

نفس الـ contact from اللي عملناها بسكريت CGI حولتها لـ Falsk Application.. حاول تجرب الأتئين وتشوف الفرق في السرعة ده غير تفوق فلاسك في شكل وتنظيم الكود.

### Contact US

Name:

Email:

Phone:

Gendar:

Message:

لتحميل التطبيق من هنا [flask-contact.zip](#)




## Flask OpenCV

ده تطبيق تانى بيدمج بين فرم ورك flask ومكتبة openCV.. من خلالها بنعمل upload لأي صورة وبمكتبة OpenCV بنتعرف على وجوه الأشخاص فيها.

### Flask/OpenCV Python Face Detection

Select Image



### Flask/OpenCV Python Face Detection

Select Image




لتحميل التطبيق من هنا [flask-opencv.zip](#)






## Editabel Portfolio

ده تميلت html مجاني على Github [startbootstrap-freelancer](#) لمعرض أعمال  
او Portfolio.

قدرنا ب Falsk نعمل فيه نظام تسجيل دخول وأمكانية تعديل كل الحقول والعناوين في  
الصفحة و إضافة مشاريع للـ portfolio وتغيير صورة البروفايل بشكل ديناميكي.





لتحميل التطبيق من هنا [flask-portfolio.zip](http://flask-portfolio.zip)



## أستضافة تطبيقات البايثون Python Hosting.

بالنسبة لإسكربتات CGI زي ما قولنا فأى إستضافة shared hosting عليها server Apache ومعموله configuration لتفعيل الأمر cgi-script AddHandler فتقدر تشغل عليها سكربتات بايثون بتقنية CGI.

## تشغيل سكربتات بايثون على إستضافة جودادى.

إستضافة جودادى من أشهر الأستضافات اللى ينفع نشغل تطبيقات البايثون. مثلاً إستضافة economy hosting أرخص باقة بتقدمها GoDaddy على سيرفر Linux مثبت عليه python 2 والجميل إنك تثبت عليها python3 و pip وتثبت الـ packages اللى هتحتاجها عن طريق ssh access من غير ما تحتاج تعمل ترقية للإستضافة أو تتشارك فى vps/cloud hosting.

بس تعالو نشغل أول سكربت بايثون CGI لينا على مفسر python2.

- هتروح فى المسار public\_html/cgi\_bin وتعمل ملف جديد هتسميه test.py

```
#!/usr/bin/python
import platform
print ('Content-type: text/html\n')
print ('<h1>Hello From Shared Hosting ^_^</h1>')
print ('<h2>My operating system is %s<h2>'%platform.system())
print ('<h2>My python version is %s<h2>'%platform.python_version())
```


Download script [test.py](#) from GitHub



- أول سطره `/usr/bin/python` مسار `python interpreter` على `Linux`.
- `Content-type: text/html` طبعاً فاكر الهيدر
- بعدين بنطبع نوع نظام التشغيل وأصدار بايثون عن طريق موديول `platform`.

Name	Size	Last Modified	Type	Permissions
test.py	1.29 KB	Sep 16, 2018, 12:48 AM	text/x-generic	0755

- بعد ما ترفع او حفظ الـ `script` لازم تخلى الـ `permission` بتاعه `755` لو غير كده مش هيشغل
- أى خطأ فى الكود أو الـ `permission` لما تفتح السكربت هيطهرلك `internal error`
- بعدين هتفتح السكربت `www.domain_name.com/cgi_bin/test.py`



**Hello From Shared Hosting ^\_^**

**My operating system is Linux**

**My python version is 2.6.6**

واحد هيسألنى هو لازم نخط سكربتات البايثون فى الفولدر الرخم ده `cgi_bin` مينفعش أى فولدر تانى 😊؟ الجميل إنه ينفع فى أى فولدر بس نعمل فيه ملف نسميه `.htaaccess`. وينفع خط السكربت فى الروت `public_html` بتاع الأستضافة أو فى أى مجلد فرعى.



- دلوقتي فى الروت public\_html هتعمل فولدر وتقدر تسميه أى اسم طبعاً بس انت كالعاده هتعمله زي وهتسميه python 🐍 ووهتنسخ فيه السكرت test.py اللى جريناه فى الفولدر cgi\_bin وأشتغل.
- جوة الفولدر python هتعمل ملف ونسميه htaccess. وتحط فيه السطرين دول.

```
AddHandler cgi-script .cgi.py
Options +ExecCGI
```

- لو الملف htaccess. مكنش ظاهر.. لازم لما تفتح الـ file manager من جديد وختار show hidden files.
- خلى بالك من الـ permissions بتاعة الملفين.. test.py لازم يكون 755 و htaccess لازم يكون 644 غير ذلك مش هيشتغل السكرت

📄	htaccess	82 bytes	Today, 3:39 AM	text/x-generic	0644
📄	test.py	263 bytes	Today, 3:38 AM	text/x-generic	0755

هتفتح العنوان بتاع سكرت الـ بايثون `your_domain/python/test.py`

← → 🔄 🌐 /python/test.py

# Hello From Shared Hosting ^\_^

My operating system is Linux

My python version is 2.6.6





ولعلك تتسائل أنا ليه خافي الدومين بتاعى 😬!؟

لأنك ربما تكون بتقرأ الكتاب ده بعد سنه او ستين من الآن وأكون أسفأ مجددتش الإستضافة والدومين وعشأان جوداى مفتره فى مصاريف التجديد فأحطلك روابط ولما تفتحها عندك متلاقيهاش 🤖.

## تثبيت python3

من الحاجات الجميلة على جوداى (economic host) إنك تقدر تثبت python3 وتثبت pip وتقدر تنزل كل الـ packages اللى أنت عايزهم زى youtube-dl و openCV والتقليه هنشغل تطبيقات Flask كمان 🤖.

[how-to-install-and-configure-python-on-a-hosted-server](#) طريقة التثبيت هنا على موقع جوداى

[hosted-server](#) بس فى الأول لازم تكون بتعرف تدخل للإستضافة عن طريق ssh وتعرف تتعامل مع الـ terminal بتاع Linux .. ولو متعرفش فعدى الجزء ده وربنا يعوض عليك.

- فى الأول هتحمّل أو لازم يكون عندك برنامج [putty](#) أو [openssh](#) أو أى ssh client ندخل بيه على الأستضافة وأنا هنا هشتغل على putty.
- فى موقع جوداى هتفتح [cpanel](#) <<hosting <<my account وهتفعل الـ ssh access وتعرف اليوزر والباسورد عشأان تسجل بيهم فى putty.
- بعد كده هتفتح putty وتكتب الدومين بتاعك وبورت 22 وتختار ssh وتسجل دخول بالـ user والباسورد.



### SSH Setup

Your cPanel user name and password are used to connect to SSH. [Learn more](#)

SSH Access  On


IP Address

Port

cPanel Username

cPanel Password  Edit

Note: When you change your cPanel password, your SSH password will change as well.



وهتفد الاوامر دى اللى شرحها فى الصفحة الجاية..


```
[~]$ cd public_html
[~/public_html]$ mkdir download
[~/public_html]$ cd download
[~/public_html/download]$ wget https://www.python.org/ftp/python/3.4.3/Python-3.4.3.tgz
2018-09-18 19:03:31 (1.18 MB/s) - `Python-3.4.3.tgz' saved
[~/public_html/download]$ dir
./ ../ Python-3.4.3.tgz
[~/public_html/download]$ tar xvzf Python-3.4.3.tgz
[~/public_html/download]$ dir
./ ../ Python-3.4.3/ Python-3.4.3.tgz Python-3.4.3.tgz.1 ]
[~/public_html/download]$ cd Python-3.4.3
[~/public_html/download/Python-3.4.3]$ ./configure --prefix=$HOME/.local
.
.
[~/public_html/download/Python-3.4.3]$ make
.
.
[~/public_html/download/Python-3.4.3]$ make install
.
.
```



- بعد ما تسجل دخول .. هتدخل بالـ terminal في المسار `public_html`
- هتعمل فولدر باسم اسم مثلاً `download` حمله فيه لغة البايثون `mkdir download`
- وهتدخل جوه الفولدر `cd download`
- دلوقتي هنحمل السورس ونعمله ونعمله `build` ممكن حمله أى إصدار بس اللي جريته ومعملش معايا مشاكل هو اللي الى في الشرح على الموقع مع إنه قديم شويه
- `wget https://www.python.org/ftp/python/3.4.3/Python-3.4.3.tgz`
- طبعاً تلاقيك مش عارف تعمل `paste` في البرنامج الغبي `putty` .. هتدوس كليك يمين بالماوس مكان المؤشر بتاع الكتابه وهيعمل `paste`.
- هتفك ضغط الملف `tar xvzf Python-3.4.3.tgz`
- هتدخل في مسار المجلد اللي إتفك ضغطه `cd Python-3.4.3`
- هتفك الأمر ده اللي هيخلي بايثون يتثبت في مجلد اسمه `./home/.local`
- `./configure --prefix=$HOME/.local`
- تسنتنى وبعدها تعمل `make` وبعدين `make install` وبكده تكون عملت `build` للبايثون في المسار `./home/.local/bin` بس لو كتبت `python3` في الـ shell مش هيفتح بايثون لإننا لسه مضافهاش في الـ `environment variables`.
- كده خلصت الاوامر اللي ناسخها لك من الـ terminal فوق فمتطالعش تبص تانى 😊
- عشان نضيف `python3` في الـ `environment variable` لازم نعدل على ملف `bash_profile` وده موجود في الـ `home directory`.



- في الشرح هو فتحه بالمحرر Vim ومث عايزك تفتحه أحسن متعرفش خُرج منه 😊  
وهنشتغل من الـ file manager أسهل.
- هتفتح الـ c panel وأنت وبتفتح الـ file manger أختار home directory  
و show hidden files.
- في الـ home دور على الملف .bash\_profile. وأعمله .edit.



Name	Size
tmp	4 KB
.bash_history	34.39 KB
.bash_logout	100 bytes
.bash_profile	248 bytes
.bash_profile.swf	12 KB
.bash_profile.swm	12 KB
.bash_profile.swo	12 KB
.bash_profile.swp	12 KB
.bashrc	321 bytes
.contactemail	0 bytes

- وفي أى حته في الملف هتضيف السطر ده

```
export PATH="$HOME/.local/bin:$PATH"
```

- وأخر حاجة هترجع لك Terminal وتكتب الأمر ده عشان التغيير اللي عملته يتنفذ  
`source ~/.bash_profile`
- وأخيراً اكتب python3 وهتشتغل معاك.. ولو مشتعلتش رسرت الـ ssh client  
وشغله تانى 😊



```
[~/public_html]$ source ~/.bash_profile
[~/public_html]$ python3
Python 3.4.3 (default, Aug 6 2018, 12:43:02)
[GCC 4.4.7 20120313 (Red Hat 4.4.7-18)] on Linux
>>> quit()
[~/public_html]$ pip3 --version
pip 6.0.8 (python 3.4)
[~/public_html]$ pip3 install --upgrade pip
```

كده قدرنا نثبت python3 و pip ونقدر نضيف أى package ونستخدمها فى تطبيقات الويب.

- مهم جداً إنك تعمل upgrade لك pip عشان ميحصلش مشاكل فى تثبيت بعض الـ Packages.

## سكرت python3 CGI

هنروح فى الفولدر اللى عملناه فى public\_html وأنا سميته python وعملنا فيه ملف htaccess. عشان نشغل فيه سكرتات CGI بس من خلال python3.

- هتعمل سكرت جديد test2.py ومتنساش تخلى الـ permissions بتاعته 755.

```
#!/home/<user_name_on_host>/.local/bin/python3
print ("Content-type: text/html\n")
import os,platform
print ('<h1>Hello From Shared Hosting ^_^</h1>')
print ('<h2>My operating system is %s<h2>'%platform.system())
print ('<h2>My python version is %s<h2>'%platform.python_version())
```

Download script [test2.py](#) from GitHub



- خلى بالك جداً أو سطر عملنا تغيير لمسار python interpreter عشان نستخدم python3 بدل python2
- وعشان جيب مسار python3 من خلال الـ Terminal بالأمر .which

```
[~/public_html]$ which python
/usr/bin/python
[~/public_html]$ which python3
/home/my_usr_name/.local/bin/python3
```

- هتعدل على المسار بتاع الـ interpreter وتجرب السكربت اللي هنشغله على بايثون 3.

```
< → ↻ /python/test2.py
```

**Hello From Shared Hosting ^\_^**

**My operating system is Linux**

**My python version is 3.4.3**



## إستضافة تطبيقات فلاسك Deploying Flask App

نشر تطبيقات البايثون على الانترنت يحتاج webserver يدعم لغة البايثون بطريقة او باخرى .. زي سيرفر Apache قولنا بيتيح تشغيل سكربتات البايثون بأكثر من تقنية وموديول.. ومنها CGI command gate interface بأنه ياخذ الكود و مسار الـ interpreter ويروح ينفذ الكود ويرجع النتيجة.. دي تعتبر الطريقة الأقدم بس فيها مشاكل فى الاداء. بعدين حاولوا يحسنوا الاداء بأنهم يدمجوا الـ Interpreter بتاع البايثون فى السيرفر و ظهرت تقنيات FastCGI و SCGI.. تقدر تعرف أكثر عنهم من هنا [webservers](#). وبعدين ظهرت تقنية اسمها WSGI web server gate way interface ودى بتخليك تقدر تشغل تطبيقات البايثون لأى فرم ورك بتدعم التقنية دى على أى سيرفر.. بمعنى إنك تقدر تشغل تطبيقات Flask على سيرفر Apache من غير ما تحتاج السيرفر بتاع Flask . من الآخر هنقدر نشغل التطبيقات اللى عملناها بـ Flask على سيرفر الأباتشى اللى ثبتناه على الجهاز عندنا أو على أستضافة جودادى وهيساعدنا فى كده مكتبة اسمها [wsgiref](#)

### تشغيل فلاسك على سيرفر أباتشى

- فى عملية النشر او deploying لتطبيقات Flask على أى سيرفر أو أستضافة لازم تشيل السطر الأخير اللى كنت تشوفه فى الأبلكشين (`app.run(debug=True)` وده اللى بيشتغل سيرفر فلاسك على الجهاز واحنا مش عاوزينه دلوقتى.



أول حاجة هنجرب على سيرفر أباتشى المثبت عندنا على الجهاز.

- هتشغل سيرفر الأباتشى زى ما عرفنا فى الجزء بتاع CGI.
- هتروح المجلد cgi-bin وتنسخ فيه فولدر أى تطبيق من اللى عملناهم مثلاً `flask-test.zip`

```
-cgi-bin
-flask-test
  -index.py
  -app.py
  -templates
  -static
```

- جوة الفولدر flask-test هتعمل سكرت جديد تقدر تسميه أى اسم مثلاً هخليه index.py وهو ده هيبقى الصفحة الرئيسية للتطبيق بتاعنا لما تفتحه فى المتصفح وهيكون بالعنوان `http://localhost/cgi-bin/flask-test/index.py`

- هتفتح index.py وخط فيه الكود ده.


```
#!/python
from wsgiref.handlers import CGIHandler
from app import app
CGIHandler().run(app)
```

- طبعاً فاكر أن أول سطر ده interpreter location على ويندوز
- هتعمل import للموديول app.py اللى فيه كود Falsk
- والكلاس CGIHandler ده اللى هتشغل تطبيق Falsk باستخدام CGI.
- ونقول كمان..ياريت تتأكد إن app.py مفيهوش السطر اللى بيعمل run لسيرفر فلاسك.





- بعدين هتفتح العنوان ده <http://localhost/cgi-bin/flask-test/index.py> فى المتصفح.



## تشغيل تطبيقات فلاسك على أستضافة جودادى

طبعاً تقدر تخط التطبيق بتاعك فى أى مكان فى الأستضافة بس لازم تضيف ملف .htaccess مع ملفات التطبيق.

```
-flask-test
-index.py
-.htaccess
-app.py
-templates
-static
```

index.py

```
#!/home/<user_name_on_host>/local/bin/python3
from wsgiref.handlers import CGIHandler
from app import app
CGIHandler().run(app)
```

.htaccess

```
AddHandler cgi-script .cgi .pl .py
Options +ExecCGI
RewriteRule ^/?$ index.py/
```



- تأكد إن الـ permissions بتاعة index.py معموله 755 .
- السطر الاخير في ملف htaccess .دي بيعمل rewrite للعنوان بتاع فولدر المشروع للصفحة index.py زي ما بيحصل في صفحات php و html بحيث إنك لما تفتح الأبلكيشن بتكتب url/flask-test بدل ما تكتب العنوان كله url/flask-test/index.py

```

< > ↻ 🔍 /python/flask-test/

Hello ^_^

Local Time : Tue Oct 2 20:14:43 2018

Operating System : Linux

```

- و لو عاوز تستضيف تطبيق flask-OpenCV هتحتاج تثبت مكتبة numpy و opencv-python بالـ pip من خلال الـ ssh client .


## أستضافة pythonanywhere

خلينا نتكلم كفينين 🗣️ استخدام CGI لنشر تطبيقات البايثون مش فعال أوى و هتلاقى فيها بطء و مشاكل تانيه.

الحل أننا ننشر تطبيقاتنا على أستضافات من نوع [cloud hosting](#) .. و من إستضافات الـ cloud الجميلة و السهلة جداً واللى بتتيح عمل أكونت مجاني ورفع تطبيقات Flask أو أى فريم ورك تانية للبايثون أستضافة PythonAnywhere واللى أتكلت عنها في اول الكتاب وسجلنا عليها وأستخدمناها عشان نشغل على البايثون أونلاين وقولت إننا



هنستخدمها لنشر تطبيقات البايثون على الإنترنت.. وفاتت الأيام وجه الوقت اللي

هنستخدمها فيه 

 pythonanywhere

## Host, run, and code Python in the cloud!


Get started for free. Our basic plan gives you access to machines with a full Python environment already installed. You can develop and host your website or any other code directly from your browser without having to install software or manage your own server.

Need more power? Upgraded plans start at \$5/month.

[Start running Python online in less than a minute! »](#)

[Watch our one-minute video »](#)

Not convinced? [Read what our users are saying!](#)



باعتبار إنك مكنتش معانا في أول الكتاب أو كسملت تسجل.. فتقدر دلوقتى تسجل فيها

وتعمل أكونت مجاني بصلاحيات محدودة من هنا [PythonAnywhere](#)

### Beginner: Free!

A limited account with one web app at `your-username.pythonanywhere.com`, restricted outbound internet access from your apps, low CPU/bandwidth, no IPython/Jupyter notebook support.

It works and it's a great way to get started!

[Create a Beginner account](#)

• بعد ما تسجل هتفتح ال dashboard ومن فوق هندوس على الرابط web وبعدين

Add a new web app



+ Add a new web app

You have no web apps

To create a PythonAnywhere-hosted web app, click the 'Add a new web app' button to the left.

- هتختار الـ framework بتاعتنا وهي Flask وهتختار نسخة python اللي شغال عليها وهتكتب اسم السكرت الاساسى للتطبيق اللي كنا بنسميه app.py

- كده انت أنشأت تطبيق جديد..

- بعد كده هتدوس على الرابط Files وعلى الشمال تدخل فى الفولدر mysite وده اللي بتحط جواه ملفات الأبلكيشن بتاعك وهتلاقي فيه app.py



- تقدر تعمل edit للملف وتدخل للـ code editor اللي من خلاله تقدر تعمل run وتجرب الأكواد في online interpreter.
- بعد ما تعمل تعديلات على السكريبت بتاعك و تدوس save وعشان التعديلات تظهر على الموقع لازم تعمل reload من الزرار اللي جنب Run او من صفحة web.

```

1 # A very simple Flask Hello World app for you to get started with...
2
3
4 from flask import Flask
5
6 app = Flask(__name__)
7
8 @app.route('/')
9 def hello_world():
10     return 'Hello from Flask ^_^'
11
12
  
```

Terminal output: >>> |

- وعشان تعرف الرابط بتاع موقع هتلاقيه في صفحة web بعد جملة Configuration for

Dashboard Consoles Files **Web** Tasks Databases

Configuration for [your\\_site.pythonanywhere.com](https://your_site.pythonanywhere.com)

Reload:

[Reload your\\_site.pythonanywhere.com](#)

هتفتح الرابط في المتصفح والموقع هيشغل معاك..



## رفع تطبيق Flask

عابزين نرفع التطبيق [flask-test.zip](#) على أستضافة PythonAnywhere

- في الصفحة Files جوة المجلد mysite هتختار upload ملف التطبيق flask-test

Dashboard Consoles<sup>1</sup> Files Web Tasks Databases

3 [Open Bash console here](#) 21% full – 107.3 MB of your 512.0 MB quota

Files

Enter new file name, eg hello.py [New file](#)

app.py	2018-09-19 20:58 554 bytes
flask-test.zip	2018-10-03 04:05 33.6 KB

[Upload a file](#) 2  
100MiB maximum size

- عشان ن فك ضغط الملف مش هتلاقى أمر extract ولازم نعملها من Bash console اللي زى ssh access في أستضافة GoDaddy.

- هتختار [open Bash console here](#) لما تفتح هتكتب الامر ده `unzip file_name.zip`

```
~/mysite $ dir
__pycache__ app.py flask-test.zip
~/mysite $ unzip flask-test.zip
replace app.py? [y]es, [n]o, [A]ll, [N]one, [r]ename: y
inflating: app.py
~/mysite $ exit
Exit Console closed.
```



- لما تفك الضغط لو قالك إن ملف app.py ده موجود عاوز تعمله replace هتكتب y وياريت في الآخر تعمل الأمر .exit.
- هترجع من الـ bash console وتروح في المسار files/mysite هتلاقى الملفات كده

__pycache__/ static/ templates/		app.py			2018-09-19 20:27	2.1 KB
		flask-test.zip			2018-09-19 20:14	33.1 KB
		run.py			2018-09-18 22:20	42 bytes

متنساش في الآخر تروح صفحة web تعمل reload للموقع عشان التغيرات الجديدة تظهر ومن غيرها كأنك معملتش حاجة.

Dashboard Consoles Files **Web** Tasks Databases

Configuration for your\_site.pythonanywhere.com

Reload:

Reload your\_site.pythonanywhere.com

وبعدين أفتح الرابط في المتصفح.

← → ↻ https://your\_site.pythonanywhere.com

Hello ^\_^

Local Time : Wed Oct 3 04:21:11 2018

Operating System : Linux

- لو ظهرت معاك أخطاء errors وانت وبتجرب التطبيقات هتروح في صفحة web وتشوف الـ log files وخصوصاً error.log وحاول تشوف الاخطاء الموجودة وتصلحها.



### Log files:

The first place to look if something goes wrong.

Access log: [your\\_site.pythonanywhere.com.access.log](#)

Error log: [your\\_site.pythonanywhere.com.error.log](#)

Server log: [your\\_site.pythonanywhere.com.server.log](#)

Log files are periodically rotated. You can find old logs here: [/var/log](#)

عشان تثبت packages عن طريق pip هفتح bash console وتستخدم إصدار pip حسب إصدار البايثون اللى شغالين بيه بصلاحيات user زي كده..


```
~ $ pip3.7 install youtube-dl --user
```

- مثلاً أحنأ لما عملنا flask application فى الاول أختارنا إصدار بايثون 3.7 ببقى هنستخدم pip3.7 عشان ننزل بيه الـ Packages بدل ما ننزلها لإصدار بايثون تانى ولما نيجى نستخدمها فى تطبيقات Falsk منلاقيهاش.
  - وبعد اسم الـ package بتكتب `--user` لأن دى أقصى صلاحياتك على الأستضافة المجانية ومن غيرها مش هيرضى يثبت الـ Package.
- عموماً كفاية كده ويب .. وبعيداً عن أستضافة PythonAnywhere لو عاوز تعرف أكثر عن [الاستضافات والسيرفرات اللى تقدر تنشر عليها تطبيقات flask فمن هنا deploying](#)





## الفصل 7 - التطبيقات الرسومية GUI



منصة Kivy ✓

تطبيقات الموبايل ✓

النافذة Window ✓

التصميم Layouts ✓

العناصر Widgets ✓



من بداية الكتاب وبنعمل تطبيقات console application اللى بتشتغل فى الـ command line الشاشة السوداء .. بعد كده أشتغلنا فى تطبيقات الويب web applications اللى بتشتغل فى المتصفح .. وجه الوقت أننا نتكلم شوية عن تطبيقات الواجهة الرسومية GUI graphical user interface .

وتطبيقات GUI هى أغلب التطبيقات اللى بتتعامل معاها بشكل يومى على الكمبيوتر والموبايل اللى فيها رسومات وزراير وصور وأدوات للكتابة وأدخال البيانات بعيداً عن شاشة الكونسول السوداء اللى بتتعامل معاها فى الغالب بالكيبورد وكل اللى بتعمله إنك تكتب اوامر بس.

لبرمجة التطبيقات الرسومية بلغة البايثون فيه platforms ومكتبات كتيرة ومشهورة تقدر تعرفهم من هنا [GuiProgramming](#).

لكن أختيارنا وقع على منصة اسمها [Kivy](#)

## منصة Kivy

وهى مجموعة مكتبات مفتوحة المصدر ومن مميزاتها أنها cross platform يعنى نفس السكرتير اللى بتكتبه هيشغل معاك على نظام windows و Linux و android و ios. من غير أى تعديلات وبتقدر تعمل تطبيقات desktop application و mobile application بنفس المنصة أو المكتبات.

دى طرق تثبيت وحميل Kivy على أنظمة التشغيل المختلفة [Download](#)



- بس في الاول تأكد إنك مثبت مكتبتين cython و pygame

```
pip install cython
pip install pygame
```

بعد كده بنثبت kivy ودى طريقة تثبيتها على ويندوز [.installation-windows](#)

## كتابة أول تطبيق

هتعمل سكرت جديد وتسميه main.py وخط فيه الكود ده..

```
from kivy.app import App
from kivy.uix.button import Button
class myApp(App):
    def build(self):
        return Button(text='Hello From Kivy', color=(1,0,0,1))
myApp().run()
```

Download script [main.py](#)

- في الأول عملنا كلاس myApp ودى بترث الكلاس App وهى دى اللى هيبقى فيها أجزاء التطبيق بتاعنا.
- في آخر سطر دالة run بتشغل التطبيق بتاعنا.. لما تعمل call للدالة .run.
- أو دالة هتتنفذ دالة الكلاس myApp هى الدالة build ودى اللى بتعمل تصميم التطبيق فيها.



- دالة build بترجع الواجهة بتاعة التطبيق وهو زرار Button فيه مكتوب عليه Hello From Kivy عن طريق البرامتر text ولونه النص ده أحمر عن طريق البرامتر color.
- وبالنسبة للون color ففيه أكثر من طريقة لكتابة اللون في kivy واللى استخدمتها في الزرار `color = rgba(R,G,B,Alpha)` .. وalpha دي الـ opacity او درجة وضوح اللون.
- ولاحظ إن قيم R,G,B بتراوح بين 0 أسود و 1 أبيض على خلاف مكتبة OpenCV كانت 0 : 255.

بعد ما تعمل Run للتطبيق لو مفيش مشاكل هتظهر قدامك الشاشة دي.





## تشغيل التطبيقات على الموبايل

- قولنا تطبيقات Kivy بتشتغل على أنظمة تشغيل الموبايل زي android و ios.
- بالنسبة لأجهزة PC فأى جهاز مثبت عليه Kivy هنقدر نشغل عليه السكربت.
- بالنسبة لأجهزة الموبايل فعندك طريقتين لتشغيل تطبيقات kivy.
- ممكن تشغل التطبيق كـ script بتحطه فى فولدر اسمه kivy على ذاكرة الموبايل وتشغله عن طريق أبلكيشن تانى اسمه [Kivy Launcher](#) زي الـ Interpreter بتاع البايثون لكن على الموبايل.. والنظام ده تستخدمه فى مرحلة تجريب تطبيقاتك.
  - المرحلة الثانية وهى عمل Packaging للتطبيق عشان تقدر تنشره على play store او app store وتقدر تعرف أكثر عنها من هنا [packaging-android](#) [packaging-ios](#).

## تشغيل التطبيق عن طريق Kivy Launcher

- عاوزين تجرب التطبيق اللى لسه عاملينه على الموبايل وشرحي هنا لنظام تشغيل اندرويد.
- أول حاجة هتحمّل تطبيق [Kivy Launcher](#) من جوجال بلاي.
  - هتروح لذاكرة الهاتف هتعمل فولدر اسمه kivy وده اللى هتتحط فيه التطبيقات.

```
- kivy
- test
  - main.app
  - android.txt
```

عشان نشغل التطبيق بتاعنا واللى هنسميه مثلاً test شكل الملفات هيكون كده

- هنعمل مجلد باسم التطبيق test جوة المجلد kivy.



- جوة test هيكون فيه ملفين.. السكرت main.py وملف الأعدادات android.txt

test/main.py


```
from kivy.app import App
from kivy.uix.button import Button
class myApp(App):
    def build(self):
        return Button(text='Hello From Kivy',color=(1,0,0,1))
myApp().run()
```

test/android.txt

```
title=Test
author=Pink Python
orientation=portrait
```

- ملف android.test بتحت فيه أعدادات التطبيق زي الاسم title اللي هيظهر لما تيجي تفتحه في Kivy Launcher وصاحب التطبيق وأخر حاجة orientation ودي وضع دوران الشاشة للتطبيق لم يشتغل هل معتدل portrait ولا مائل landscape.
- بعد ما تنسخ الفولدر test اللي جواه السكرت main.py والملف android.txt في المجلد kivy..هتروح تفتح تطبيق Kivy Launcher وهتلاقى التطبيق Test ظهر فيه فهتشفله

عشان تحمل التطبيق من هنا [.test.zip](#)



وده شكل التطبيق لما تشغله على الموبايل وتدوس على الزرار.

## النافذة Window

(بالنسبة لتطبيقات الديسكتوب) لما شغلنا التطبيق الأول وبعيداً عن حجم الزرار اللي مالى الشاشة.. كان حجم النافذة قابلة للتكبير والتصغير و تقدر تعمله minimize و maximize .

لو عاوز تعمل حجم ثابت للنافذة.. بتحدد الحجم ده عن طريق كلاس Config ومن خلالها برده تقدر تتحكم في حجم النافذة ولونها ومكان ظهورها في الشاشة.



- استدعاء الكلاس Config

```
from kivy.config import Config
```

- عشان تخلى حجم النافذة ثابت

```
Config.set('graphics', 'resizable', False)
```

- عشان تحدد طول وعرض النافذة

```
Config.set('graphics', 'width', '600')
Config.set('graphics', 'height', '600')
```

- وضع fullscreen.. لو كان auto هيخلي حجم النافذة ملء الشاشة.. لو كان 1 هيخلي حجم النافذة بأبعاد **width** و **height**.. لو كان fake هيخلي النافذة من غير **borders**.

```
Config.set('graphics', 'fullscreen', 'auto')
Config.set('graphics', 'fullscreen', '1')
Config.set('graphics', 'fullscreen', 'fake')
```

- تحديد مكان ظهور النافذة بأحداثيات **top** و **left**.

```
Config.set('graphics', 'position', 'custom')
Config.set('graphics', 'top', '0')
Config.set('graphics', 'left', '0')
```





- عشان حدد لون النافذة (لونها أسود بشكل افتراضي)

```
from kivy.core.window import Window
Window.clearcolor = (R,G,B,Alpha)
```

- ده مثال بيظهر نافذة لونها أبيض من غير border حجمها 400 \* 400 في المكان (0,0) أعلى يسار الشاشة

```
from kivy.app import App
from kivy.uix.button import Button
from kivy.config import Config
from kivy.core.window import Window
Window.clearcolor = (1, 1, 1, 1)
Config.set('graphics', 'resizable', False)
Config.set('graphics', 'width', '400')
Config.set('graphics', 'height', '400')
Config.set('graphics', 'position', 'custom')
Config.set('graphics', 'top', '0')
Config.set('graphics', 'left', '0')

class myApp(App):
    def build(self):
        return Button(text='Hello From Kivy', color=(1,0,0,1))
myApp().run()
```

Download script [main.py](#)

حببت بس أكلمك عن إعدادات الـ window أو الفورم في الأول عشان لو جاي من الفيچوال

ستوديو متقولش اني حارمك من حاجة 🙄

ولو عاوز تعرف أكثر عن كلاس Config من هنا [api-kivy.config](#)



## التصميم Layouts

عشان تعمل التصميم بتاعك محتاج يكون داخل container خط جواه عناصر الصفحة أو الـ widgets زي Button و Texbox والـ tools اللي بتتعامل معاها. ومحتاج برده تحدد أماكن العناصر دي بطريقة تسمح أنها تلى التصميم متناسق على جميع أحجام الشاشات والموضوع بيفرق جداً في التطبيقات اللي بتشغلها على الموبايل.

عشان تتحكم في الموضوع ده kivy عملتك مجموعة layouts هنتكلم عن بعضهم

وتقدر تتعرف عليهم من هنا [layouts](#)

## Anchorlayout

[anchorlayout](#) دي بتخليك تحدد أماكن العناصر اللي

جواها عن طريق تحديد المحاذة على المستوى الأفقى بأن

العنصر يبقى left أو right أو center وعن طريق المحاذة

الرأسية top و bottom و center.



- استدعاء الكلاس AnchorLayout

```
from kivy.uix.anchorlayout import AnchorLayout
```

- عمل object من الكلاس AnchorLayout وتحديد محاذة العناصر بداخلها.

```
layout=AnchorLayout(anchor_x='center or left or right',
                    anchor_y='center or top or bottom'
                    )
```




ده مثال على استخدام AnchorLayout لمحاذاة زرار Button في المنتصف

```
from kivy.app import App
from kivy.uix.button import Button
from kivy.uix.anchorlayout import AnchorLayout
class myApp(App):
    def build(self):
        layout=AnchorLayout(anchor_x='center', anchor_y='center')
        btn=Button(text='Button 1',
color=(1,0,0,1), size=(200,50), size_hint=(None,None))
        layout.add_widget(btn)
        return layout
myApp().run()
```


Download script [main.py](#) , for android [anchor-layout.zip](#)

- في الكود ده عملنا layout من نوع AnchorLayout وحددنا المحاذاة الأفقية والرأسية للعناصر اللي هتكون فيها `anchor_x=center` و `anchor_y=center`
- عملنا زرار اسمه btn وهنتكلم فيما بعد هنتكلم عن خصائصه فمتشغلش نفسك دلوقتي غير إن ده زرار Button.
- و باستخدام الميثود `add_widget` أضفنا الزرار btn لـ layout.



بعد ما تشغل ده شكل الزرار في منتصف  
.anchorlayout

## FloatLayout



[floatlayout](#) من خلالها تقدر تحدد الـ position بتاع الـ widgets بحيث إنهم يكونوا في أى مكان في الصفحة عن طريق تحديد الأحداثي لكل عنصر.

- استدعاء FloatLayout

```
from kivy.uix.floatlayout import FloatLayout
```

- عمل object من FloatLayout

```
layout=FloatLayout ()
```

- محاذاة العناصر جوة FloatLayout يتم عن الخاصية pos للعنصر نفسه اللي بتحدد الأحداثيات x,y له.. مثلاً هضيف زرار وعاوز الأحداثي بتاعه (50,50)

```
Button(text='Button', pos=(50,50))
```



## مثال على استخدام FlaotLayout

```
from kivy.app import App
from kivy.uix.button import Button
from kivy.uix.floatlayout import FloatLayout
from kivy.config import Config
Config.set('graphics', 'resizable', False)
Config.set('graphics', 'width', '400')
Config.set('graphics', 'height', '400')


class myApp(App):
    def build(self):
        layout=FloatLayout()
        btn1=Button(
            text=' (0,0) ', size=(100,100), size_hint=(None,None),
            pos=(0,0)
        )
        btn2=Button(
            text=' (150,150) ', size=(100,100), size_hint=(None,None),
            pos=(150,150)
        )
        btn3=Button(
            text=' (300,300) ', size=(100,100), size_hint=(None,None),
            pos=(300,300)
        )
        layout.add_widget(btn1)
        layout.add_widget(btn2)
        layout.add_widget(btn3)
        return layout

myApp().run()
```

Download script [main.py](#) , for android [float-layout.zip](#)



## شكل التطبيق لما تشغله



- في الأول عملنا object من الكلاس FlaotLayout اسمه layout
- وبعدين عملنا 3 أزرار btn1,btn2,btn3 وخطناهم جوه layout بالدالة add\_widget
- حددت مكان كل زر عن طريق البرامتر pos(x,y) مع مراعاة إن الأحداثى (0,0) ده فى أسفل يسار الـ layout مش فى أعلى اليسار زى ما هو متوقع.
- ممكن يكون الأسلوب ده مش عاجبك ومش عاوز تتعامل بالأحداثى كأرقام عشان كده المكتبة عملتك نظام يعتمد على النسبة المئوية للإحداثيات عن طريق الخاصية pos\_hint

```
Button(text='Button', pos_hint={'x':0.5, 'y':0.4})
```

- قيم x,y بتتراوح ما بين 0 : 1.. مثلاً هنا pos\_hint={'x':0.5,'y':0.4} الزرار ده مكانه هيبقى على بعد 50% من العرض و 40% من الطول بنوع الـ layout.




لو هنعديل فى المثال الللى فات شكل الزراير هيكون كده..

```
btn1=Button(
    text=' (10%,10%) ',size=(100,100),size_hint=(None,None),
    pos_hint={'x':0.1,'y':0.1}
)
btn2=Button(
    text=' (40%,40%) ',size=(100,100),size_hint=(None,None),
    pos_hint={'x':0.4,'y':0.4}
)
btn3=Button(
    text=' (70%,70%) ',size=(100,100),size_hint=(None,None),
    pos_hint={'x':0.7,'y':0.7}
)
```

Download script [main.py](#) , for android [float-layout2.zip](#)

نظام النسبة المئوية هيكون أفضل لأنك صعب تتحكم فى الأحداثيات على شاشات الموبايل

حتى جرب الأبلكيشن ده والللى قبله على الموبايل وشوف الفرق.





## BoxLayout

لو عاوز متشغليش نفسك بالـ position والـ anchor والـ size يبقى تتعامل مع [BoxLayout](#) واللى تعتبر الأفضل فى تنسيق وتنظيم العناصر داخل التطبيق.


- استدعاء الكلاس BoxLayout

```
from kivy.uix.boxlayout import BoxLayout
```

- عمل object من BoxLayout

```
layout=BoxLayout(orientation='horizontal')
```

```
layout=BoxLayout(orientation='vertical')
```



- الكلاس بتاخذ برامتر مهم وهو orientation وده بيحدد إصطفاف العناصر جنب بعض بشكل أفقى ولا رأسى.





- في الـ `BoxLayout` مش هتحتاج حدد الأبعاد بتاعة العناصر لأنها هتقسم بالتساوي بناءً على أبعاد الـ `layout` ونوع الـ `orientation` والمثال هيوضحلك.


```

from kivy.app import App
from kivy.uix.button import Button
from kivy.uix.boxlayout import BoxLayout
class myApp(App):
    def build(self):
        layout = BoxLayout(orientation='horizontal')
        btn1 = Button(text='Button 1')
        btn2 = Button(text='Button 2')
        btn3 = Button(text='Button 3')
        layout.add_widget(btn1)
        layout.add_widget(btn2)
        layout.add_widget(btn3)
        return layout
myApp().run()

```

Download script [main.py](#) , for android [box-layout.zip](#)

لو عاوز الزراير تظهر فوق بعض هتغير الـ `orientation` وخليها `.vertical`.





- تقدر تعمل اكثر من boxlayout جوه boxlayout عشان تعمل عناصر مصطفة بشكل أفقى وعناصر بشكل رأسى مع بعض.
- الـ box layout بيحدد العرض الأرتفاع للعناصر جواه بناءً على نواع الـ orientation وبيقسم العناصر بالتساوى.
- لو عاوزين نحدد عرض او أرتفاع أى عنصر داخل الـ BoxLayout بنستخدم خاصية `size_hint=(x,y)`. حيث `x,y` قيمتهم بين 0:1 وتعبّر عن نسبة مئوية.
- مثلاً عاوز أعمل زرار داخل الـ BoxLayout أرتفاعه 100٪ من أرتفاعها وعرضه 50٪ من عرضها هيكون كده

```
Button(text='Button', size_hint=(0.5, 1))
```

وده مثال هيوضحلك.

```
from kivy.app import App
from kivy.uix.button import Button
from kivy.uix.boxlayout import BoxLayout

class myApp(App):
    def build(self):
        layout = BoxLayout(orientation='vertical')

        layout1 = BoxLayout(orientation='horizontal',
                             size_hint=(1,0.1))
        btn11 = Button(text='Button 11', size_hint=(0.8,1))
        btn12 = Button(text='Button 12', size_hint=(0.1,1))
        btn13 = Button(text='Button 13', size_hint=(0.1,1))
        layout1.add_widget(btn11)
        layout1.add_widget(btn12)
```




```
layout1.add_widget(btn13)

layout2 = BoxLayout(orientation='horizontal')
btn21 = Button(text='Button 21')
btn22 = Button(text='Button 22')
btn23 = Button(text='Button 23')
btn24 = Button(text='Button 24')
layout2.add_widget(btn21)
layout2.add_widget(btn22)
layout2.add_widget(btn23)
layout2.add_widget(btn24)

layout.add_widget(layout1)
layout.add_widget(layout2)
return layout
```

```
myApp().run()
```

Download script [main.py](#) , for android [box-layout2.zip](#)





## العناصر Widgets

الـ [widgets](#) هي العناصر التقليدية المكونة للواجهة الرسومية زي Label, Button, CheckBox, Image, Slider, Progress Bar, Text Input, Toggle button, Switch, Video

## الازرار Button

مش عاوز أوصف الـ widgets عشان ما يبقاش وصف وأهبل 😊 بس أنت المفروض عارف إن الزرار ده عنصر بتدوس عليها عشان ينفذ حاجة معينة لما تدوس عليه press او تلمسه touch أو تسببه release دي تسمى events احداث بتحصل للزرار و ينفذ تتربط بدوال عشان تنفذ حاجات معينة عند حدوثها.

- عشان تعمل import للكلاس Button

```
from kivy.uix.button import Button
```

- عشان تعمل object من الكلاس Button

```
button=Button()
```

- خصائص الزرار Button Attributes



text	النص داخل الزرار
font_size	حجم النص
Color	لون النص
background_color	خلفية أو لون الزرار
id	رقم او اسم مميز للعنصر

- الخصائص دي ممكن تمررهم كبرامتر في الـ constructor بتاع الكلاس Button او كـ attributes للـ object اللي بتعمله منها اللي بتعمله من الكلاس.

```
btn=Button(text='Hello')
btn.text='Hello World'
```

- عشان تحدد حجم الزرار في طريقتين..أما بتحدد الحجم بالبيكسل عن طريق الخاصيتين size , size\_hint

```
size=(width,height)
size_hint=(None,None)
```

- أو تستخدم الخاصية size\_hint بس عشان تحدد حجم الزرار بالنسبة المئوية من أبعاد الـ container أو الـ layout الذي بداخله الزرار.

```
size_hint=(width%,height%)
```



- النسبة بتراوح بين 0:1 .. مثلاً الزرار صاحب الخاصية دي `size_hint=(0.4,1)` عرضه 04% من عرض الـ `container` وأرتفاعه 100% يعني نفس الأرتفاع.

## الأحداث Events

الزرار ليه 3 أحداث مهمين وهم `on_press` لما تضغط عليه `on_release` لما تسيبه `on_touch` لما تلمسه على شاشات التاتش..و الحدث `event` بياخد `function` بينفذها لما يحصل الحدث ده.

```
def press(instance):
    print('pressed..')
btn=Button(on_press=press)
```

- هنا عملنا زرار `btn` لما تدوس عليه هيحصل الـ `event` بتاع `on_press` اللي هينفذ الدالة `press` وهيمرر ليها برامتر انا سميته `instance` او تقدر تسميه اي اسم. ده بيبعث الـ `object` بتاع الزرار للدالة `press` عشان لو عاوز تطلع منه أي خصائص متعلقة بالزرار زي النص أو `id` بيكون كده `instance.text` أو `instance.id`

```
from kivy.app import App
from kivy.uix.button import Button
class myApp(App):
    i=0
    def press(self,instance):
        instance.text=str(self.i)
        self.i+=1
    def build(self):
        layout=BoxLayout()
```



```


btn=Button(
    text="Press On Me",
    color=(0,0,0,1), #black
    background_color=(1,1,1,1), #white
    font_size=100,
    size_hint=(1,0.5),
    pos_hint={'y':0.25},
    on_press=self.press,
)
layout.add_widget(btn)
return layout
myApp().run()

```

Download script [main.py](#) , for android [button.zip](#)

السكرت ده عبارة عن button عرضه 100% من عرض الشاشة وأرتفاعه 50%

فيه خاصية text النص Press On Me ولما ادوس عليه on\_press يعمل للدالة  
press اللي بتعمل increment لمتغير اسمه أو تخط قيمة المتغير كـ text للزرار  
نفسه.



ولو عاوز تعرف اكثر عن الـ Button فكمّل من هنا [api-kivy.ui.button](#)



## Label

الـ [label](#) ده مكان مخصص عشان تعرض فيه نص فقط على عكس الزرار اللى بيستجيب لما تضغط عليه.

- عشان تعمله `import`

```
from kivy.uix.label import Label
```

- عشان تعمل object من الكلاس Label

```
label=Label(text="I'm A Label")
```

- الـ Label ليه نفس خصائص الـ button زى النص اللى فيها text ولون النص color وحجم الخط font\_size ويتقدر تحدد الطول والعرض بالبيكسل بخاصية size أو بالنسبة المئوية بخاصية size\_hint.

هناخد مثال على الـ Label وهو تعديل على السكرت بتاع الـ Button.. هنعط فى الـ layout زرار Button و Label .. ولما تدوس على الزرار يعمل increment للمتغير i ويخط قيمته فى الـ Label.

```
From kivy.app import App
from kivy.uix.button import Button
from kivy.uix.label import Label
from kivy.uix.boxlayout import BoxLayout


class myApp(App):
    i=0
```





```
label=Label()
def press(self,instance):
    self.label.text='count : '+str(self.i)
    self.i+=1
def build(self):
    layout=BoxLayout(orientation='vertical')
    self.label=Label(
        text="I'm A Label",
        color=(0,1,0,1), #green
        font_size=70,
    )
    btn=Button(
        text="Press On Me",
        color=(1,0,0,1), #red
        background_color=(0,1,0,1), #green
        font_size=70,
        on_press=self.press,
    )
    layout.add_widget(self.label)
    layout.add_widget(btn)
    return layout
myApp().run()
```

Download script [main.py](#) , for android [label.zip](#)





## TextInput

هو أداة إدخال أو مكان لكتابة النصوص من الكيبورد و يتم تسميته في بعض اللغات

والبرامجه التانيه EditText أو TextBox

- عشان تعمله import

```
from kivy.uix.textinput import TextInput
```

- عشان تعمل object من الكلاس TextInput.

```
label=Label(text='write anything')
```

multiline=True or False	بتحدد البوكس سطر واحد ولا متعدد الأسطر .
focus= True or False	لو True لما تفتح التطبيق هيكون المؤشر داخل البوكس ومستعد للكتاب.
allow_copy=True or False	السماح بتحديد نص من البوكس ونسخه
background_color=(R, G, B, Alpha)	لو الخلفية
color=(R, G, B, Alpha)	لون النص
text='my text'	النص بداخل البوكس
hint_text='text'	النص الإرشادي داخل البوكس (بيختفى لما تعمل focus)
hint_text_color=(R, G, B, Alpha)	لون النص الإرشادي



## الأحداث events

- لما تكون عامل خاصية multiline=False وتدوس enter مش هينزل سطر جديد. لكن هيحصل ايفنت on\_text\_validate

```
def on_enter(instance):
    print('user pressed enter')

text = TextInput(text='Hello world', multiline=False)
text.bind(on_text_validate=on_enter)
```

- لما تكتب والنص داخل الـ TextInput يتغير بيحصل ايفنت اسمه text

```
def on_text(instance, value):
    print('typing..', instance.text)

text = TextInput()
text.bind(text=on_text)
```

ده تطبيق على الـ TextInput وعلى الـ text event..

```
from kivy.app import App
from kivy.ui.boxlayout import BoxLayout
from kivy.ui.textinput import TextInput
from kivy.ui.label import Label
from kivy.core.window import Window
Window.clearcolor = (1, 1, 1, 1)

players=['Essam El Hadary',
        'Wael Gomaa',
        'Ahmed Fathy',
        'Hossam Ghaly',
        'Emad Meteb',
        'Mohamed Zidan'
        ]
```



```

class TestApp(App):
    label=Label(color=(1,0,0,1),valign="top",size_hint=(1,0.90),font_size=70)
    def text_change(self,instance,value):
        self.label.text=""
        for player in players:
            if value in player.lower():
                self.label.text+=player+'\n'

    def build(self):
        layout=BoxLayout(orientation='vertical')
        txt=TextInput(hint_text='Search For Players',
                    multiline=False,
                    size_hint=(1,0.1),
                    color=(1,0,0,1),
                    font_size=80
                    )
        txt.bind(text=self.text_change)
        layout.add_widget(txt)
        layout.add_widget(self.label)
        return layout

TestApp().run()

```

Download script [main.py](#) , for android [textinput.zip](#)

- فكرة التطبيق عبارة عن List اسمها players فيها اسامى اللاعبين.. لما تكتب حرف أو جزء من اسم اللاعب في الـ TextInput الحدث text يأخذ النص ويبحث بيه في الـ List ولو لقيه مطابق مع اسم لاعب أو أكثر يخطه في Label.



Search For Players      zi      emad

Essam El Hadary  
Wael Gomaa  
Ahmed Fathy  
Hossam Ghaly  
Emad Meteb  
Mohamed Zidan

Mohamed Zidan

Emad Meteb



موضوع الـ `TextInput` ده طويل وفيه حاجات كتير هتفيدك فلو عاوز تعرفها تقدر تكمل

في الوثيقة [api-kivy.uix.textinput](https://kivy.org/docs/api-kivy.uix.textinput)



## الصورة Image

عشان تضيف صور في التطبيق بتستخدم Image لو صورة محلية على الجهاز  
ولو صورة من على الأنترنت بتستخدم AsyncImage

- عشان تعملهم import

```
from kivy.uix.image import Image
```

```
from kivy.uix.image import AsyncImage
```

- عشان تعمل object من الكلاس .

```
img=Image()
async_img= AsyncImage()
```

### أهم الخصائص

Source	اسم أو مسار الصورة
allow_stretch = True or False	لو True هيخلي الصورة تملئ على ال Image Widget حتى لو حجمها صغير
keep_ratio = True or False	لما يعمل stretch للصورة هل يحافظ على معدل ثابت بين الطول والعرض ولا لأ.
Nocache = True or False	لو ضفت صورة من الأنترنت بيعملها cashe في الابلكيشن عشان متحملش كل مرة



```
from kivy.app import App
from kivy.uix.boxlayout import BoxLayout
from kivy.uix.button import Button
from kivy.uix.togglebutton import ToggleButton
from kivy.uix.image import AsyncImage
from kivy.core.window import Window
Window.clearcolor = (1, 1, 1, 1)
src=['https://ma7moud3ly.github.io/1.jpg',
     'https://ma7moud3ly.github.io/2.jpg',
     'https://ma7moud3ly.github.io/3.jpg',
     'https://ma7moud3ly.github.io/4.jpg',
     'https://ma7moud3ly.github.io/5.jpg']

class TestApp(App):
    i=0
    img=AsyncImage(size_hint=(1,0.9),source=src[i],keep_ratio=False)
    img.source=src[2]
    def press(self,btn):
        if btn.id=='1' and self.i<(len(src)-1):
            self.i+=1
            self.img.source=src[self.i]
        elif btn.id=='2' and self.i>0:
            self.i-=1
            self.img.source=src[self.i]
        elif btn.id=='3':self.img.allow_stretch=btn.state=='down'
        elif btn.id=='4':self.img.keep_ratio=btn.state=='down'

    def build(self):
        layout=BoxLayout(orientation='vertical')
        btns=BoxLayout(orientation='horizontal',size_hint=(1,0.1))
        btns.add_widget(Button(text='>>>',id='1',on_press=self.press))
        btns.add_widget(Button(text='<<<',id='2',on_press=self.press))

        btns.add_widget(ToggleButton(text='Stretch',id='3',on_press=self.press))
        btns.add_widget(ToggleButton(text='Ratio',id='4',on_press=self.press))


        layout.add_widget(self.img)
        layout.add_widget(btns)
        return layout

TestApp().run()
```

Download script [main.py](#) , for android [image.zip](#)



## ده تطبيق عارض صور يعتمد على AsyncImage



ده كان مدخل بسيط لبرمجة تطبيقات الديسكتوب والموبايل عن طريقة لغة البايثون ومنصة Kivy .. لو كان فيه جزء تانى من الكتاب فأكيد هتناول مكتبة kivy بشكل مكثف اكتر من كده .. لكنك تقدر تكمل عن طريق الموقع الرسمى والوثيقة اللى هتلاقى فيها كمية كبيرة من الأمثلة و التطبيقات فى المعرض [gallery](#) وتقدر تشوف باقى الأدوات وال [api-kivy.uix](#) widgets وال [tutorial](#) الجميلة دى [kivy-crash-course](#).



## المراجع

<https://docs.python.org/3/>

<http://tutorialspoint.com/python>

<https://www.w3schools.com/python>

تم بحمد الله

PINK PYTHON 2018

break